

॥ तैत्तिरीय संहिता ॥

॥ काण्डम् ७ ॥

॥ प्रथमः प्रश्नः ॥

॥ तैत्तिरीयसंहितायां सप्तमकाण्डे प्रथमः प्रश्नः ॥

प्रजननं ज्योतिरग्निर्देवतानां ज्योतिर्विराट्कुन्दसां
ज्योतिर्विराट्वाचोऽग्नौ सं तिष्ठते विराजमभि सम्पद्यते
तस्मा- तज्ज्योतिरुच्यते द्वौ स्तोमौ प्रातःसवनं वहतो यथा
प्राणश्चापानश्च द्वौ माध्यंदिनं सवनं यथा चक्षुश्च श्रोत्रं च
द्वौ तृतीयसवनं यथा वाक्च प्रतिष्ठा च पुरुषसम्मितो वा एष
यज्ञोऽस्थूरिः ॥ १ ॥

यं कामं कामयते तमेतेनाभ्यश्नुते सर्वं ह्यस्थूरिणाभ्यश्नुते
अग्निष्टोमेन वै प्रजापतिः प्रजा असृजत ता अग्निष्टोमेनैव
पर्यगृह्णात्तासाम्परिगृहीतानामश्वतरोऽत्यप्रवत् तस्यानुहाय
रेत् आदत्त तद्गर्दभे न्यमार्दस्माद्गर्दभो द्विरेता अथो
आहुर्वडबायां न्यमार्डिति तस्माद्वडबा द्विरेता अथो
आहुरोषधीषु ॥ २ ॥

न्यमा॒र्दिति॒ तस्मा॒दोष॑धयोऽन॒भ्यक्ता रेभ॑न्त्यथो॒ आहुः
 प्र॒जासु॒ न्यमा॒र्दिति॒ तस्मा॑द्य॒मौ जा॑येते॒ तस्मा॑दश्व॒तरो न
 प्र जा॑यत॒ आत्त॑रेता॒ हि तस्मा॑द्व॒र्हिष्य॑न॒वक्लृ॑प्तः सर्व॑वेद॒से
 वा॑ स॒हस्रे॒ वाव॑क्लृ॒प्तोऽति॒ ह्यप्र॑वत॒ य ए॒वं वि॒द्वान॑ग्नि॒ष्टोमे॒न
 यज॑ते॒ प्राजा॑ताः प्र॒जा ज॒नय॑ति॒ परि॒ प्रजा॑ता गृ॒ह्णाति॒
 तस्मा॑दाहु॒र्ज्येष्ठ॑य॒ज्ञ इति॑॥३॥

प्र॒जाप॑ति॒र्वाव ज्येष्ठः॒ स ह्ये॑तेनाग्रेऽय॑जत प्र॒जाप॑ति॒रकाम॑यत्
 प्र जा॑येयेति॒ स मु॑ख॒तस्त्रि॑वृ॒तं निर॑मिमीत् तम॒ग्नि-
 दे॒वता॑न्व॒सृज्य॑त गाय॒त्री छ॒न्दो रथ॑न्त॒र५ साम॑ ब्राह्म॒णो
 म॑नु॒ष्या॑णाम॒जः प॑शू॒नान्त॑स्मा॒त्ते मु॒ख्या॑ मु॒खतो॒ ह्यसृ॑ज्यन्तो॒रसो॑
 बा॒हुभ्या॑ प॒ञ्चद॑शं निर॑मिमीत् तमिन्द्रो॑ दे॒वता॑न्व॒सृज्य॑त
 त्रि॒ष्टुप्छ॒न्दो बृ॒हत्॥४॥

साम॑ राज॒न्यो म॑नु॒ष्या॑णाम॒विः प॑शू॒नान्त॑स्मा॒त्ते वी॒र्या॑वन्तो
 वी॒र्या॑द्य॒सृज्य॑न्त मध्य॒तः स॑प्तद॒शं निर॑मिमीत् तं वि॒श्वे दे॒वा
 दे॒वता॑ अन्व॒सृज्य॑न्त जग॑ती॒ छ॒न्दो वैरू॑प५ साम॑ वैश्यो॑
 म॑नु॒ष्या॑णां गा॒वः प॑शू॒नान्त॑स्मा॒त्त आ॒द्या अ॒न्नधा॑ना॒द्यसृ॑ज्यन्त
 तस्मा॒द्भूया॑ऽसोऽन्ये॒भ्यो भू॒र्यिष्ठा॒ हि दे॒वता॑ अन्व॒सृज्य॑न्त प॒त्त

एकविंशं निरमिमीत् तमनुष्टुप्छन्दः [5[]

अन्वसृज्यत वैराजं सामं शूद्रो मनुष्याणामश्वः
पशूनान्तस्मात्तौ भूतसंक्रामिणावश्वश्च शूद्रश्च तस्माच्छूद्रो
यज्ञेऽनवक्लृप्तो न हि देवता अन्वसृज्यत तस्मात्पादावुप
जीवतः पत्तो ह्यसृज्येतां प्राणा वै त्रिवृदर्धमासाः पञ्चदशः
प्रजापतिः सप्तदशस्रय इमे लोका असावादित्य एकविंश
एतस्मिन्वा एते श्रिता एतस्मिन्प्रतिष्ठिता य एवं वेदैतस्मिन्नेव
श्रयत एतस्मिन्प्रति तिष्ठति॥६॥

अस्थूरिरोषधीषु ज्येष्ठयज्ञ इति बृहदनुष्टुप्छन्दः प्रतिष्ठिता नव च॥१॥ ——— [१]

प्रातःसवने वै गायत्रेण छन्दसा त्रिवृते स्तोमाय
ज्योतिर्दधदेति त्रिवृता ब्रह्मवर्चसेन पञ्चदशाय ज्योतिर्दधदेति
पञ्चदशेनौजसा वीर्येण सप्तदशाय ज्योतिर्दधदेति सप्तदशेन
प्राजापत्येन प्रजननेनैकविंशाय ज्योतिर्दधदेति स्तोमं
एव तथस्तोमाय ज्योतिर्दधदेत्यथो स्तोमं एव स्तोममभि
प्र णयति यावन्तो वै स्तोमास्तावन्तः कामास्तावन्तो
लोकास्तावन्ति ज्योतींष्येतावन्त एव स्तोमानेतावन्तः
कामानेतावन्तो लोकानेतावन्ति ज्योतींष्यव रुद्धे॥७॥

तावन्तो लोकास्त्रयोदश च॥२॥ [२]

ब्रह्मवादिनो वदन्ति स त्वै यजेत योऽग्निष्टोमेन
यजमानोऽथ सर्वस्तोमेन यजेतेति यस्य त्रिवृतमन्तर्यन्ति
प्राणाःस्तस्यान्तर्यन्ति प्राणेषु मेऽप्यसदिति खलु वै यज्ञेन
यजमानो यजते यस्य पञ्चदशमन्तर्यन्ति वीर्यं तस्यान्तर्यन्ति
वीर्यं मेऽप्यसदिति खलु वै यज्ञेन यजमानो यजते यस्य
सप्तदशमन्तर्यन्ति॥८॥

प्रजां तस्यान्तर्यन्ति प्रजायाम्मेऽप्यसदिति खलु वै
यज्ञेन यजमानो यजते यस्यैकविंशमन्तर्यन्ति प्रतिष्ठां
तस्यान्तर्यन्ति प्रतिष्ठायाम्मेऽप्यसदिति खलु वै यज्ञेन
यजमानो यजते यस्य त्रिणवमन्तर्यन्त्यृतूँश्च तस्य
नक्षत्रियां च विराजमन्तर्यन्त्यृतुषु मेऽप्यसन्नक्षत्रियायां च
विराजीति॥९॥

खलु वै यज्ञेन यजमानो यजते यस्य त्रयस्त्रिंशमन्तर्यन्ति
देवतास्तस्यान्तर्यन्ति देवतासु मेऽप्यसदिति खलु वै यज्ञेन
यजमानो यजते यो वै स्तोमानामवमम्परमतां गच्छन्तं वेदं

पर॒मता॑मे॒व गच्छ॑ति त्रि॒वृद्वै स्तोमा॑नाम॒वम- स्त्रि॒वृत्प॑र॒मो य
ए॒वं वेद॑ पर॒मता॑मे॒व गच्छ॑ति॥१०॥

सप्तदशमन्तर्यन्ति विराजीति चतुश्चत्वारिंशच्च॥३॥ [३]

अङ्गिर॑सो॒ वै स॒त्रमा॑सत॒ ते सु॒वर्गं॑ लो॒कमा॑य॒न्तेषां॑
ह॒विष्मा॑श्च॒ हवि॑ष्कृ॒चाही॑येता॒न्ताव॑कामयेता॒ सुव॑र्गं
लो॒कमि॑यावेति॒ तावे॑तं॒ द्विरा॑त्रम॒पश्य॑ता॒न्तमा॑हर॒तान्तेना॑यजेता॒न्त
वै तौ सु॒वर्गं॑ लो॒कमै॑तां॒ य ए॒वं वि॒द्वान्द्विरा॑त्रेण॒ यज॑ते सुव॒र्गमे॒व
लो॒कमे॑ति॒ तावै॑ता॒म्पूर्वे॑णाऽह्नाऽगच्छ॑ता॒मुत्त॑रेण॥११॥

अ॒भि॒प्लुवः॑ पूर्॒वम॑हर्भवति॒ गति॑रुत्त॑रं॒ ज्योति॑ष्टोमोऽग्नि॑ष्टोमः
पूर्॒वम॑हर्भवति॒ तेज॑स्तेना॒व रु॒द्धे सर्व॑स्तोमोऽति॑रात्र॒ उत्त॑रं॒
सर्व॑स्यात्यै॒ सर्व॑स्याव॒रुद्धौ॑ गाय॒त्रम्पूर्वे॑ह॒न्थसामं॑ भवति॒ तेजो॑
वै गा॑य॒त्री गा॑य॒त्री ब्र॑ह्मवर्च॒सन्तेज॑ ए॒व ब्र॑ह्मवर्च॒स- मा॑त्मन्ध॒त्ते
त्रैष्टु॑भ॒मुत्त॑रं॒ ओजो॑ वै वी॒र्यं॑ त्रि॒ष्टुगो॑जं॒ ए॒व वी॒र्यमा॑त्मन्ध॒त्ते
रथ॑न्तर॒म्पूर्वे॑॥१२॥

अह॒न्थसामं॑ भवती॒यं वै र॑थ॒न्तर॑म॒स्यामे॒व प्र॑ति
तिष्ठ॑ति॒ बृह॑दुत्त॑रेऽसौ॒ वै बृह॑द॒मुष्या॑मे॒व प्र॑ति॒ तिष्ठ॑ति
तदा॑हुः॒ क्व ज॑गती॒ चानु॑ष्टुप्वेति॒ वैखान॑स॒म्पूर्वे॑ऽह॒न्थसामं॑

भवति तेन जगत्यै नैति षोडश्युत्तरे तेनानुष्टुभो-
 ऽथाहुर्यत्समानैऽ धर्मासे स्यातामन्यतरस्याहो वीर्यमनु
 पद्येतेत्यमावास्यायाम्पूर्वमहर्भवत्युत्तरस्मिन्नुत्तरन्नानैवार्धमासयो
 नानावीर्ये भवतो हविष्मन्निधनम्पूर्वमहर्भवति हविष्कृन्निधनमुत्तर
 प्रतिष्ठित्यै॥१३॥

उत्तरेण रथन्तरम्पूर्वेऽन्वेकविंशतिश्च॥४॥ [४]

आपो वा इदमग्रे सलिलमासीत्तस्मिन्प्रजापतिर्वायुर्भूत्वाचरत्
 इमामपश्यत्तां वराहो भूत्वाहरत्तां विश्वकर्मा भूत्वा
 व्यमाट्त्साप्रथत् सा पृथिव्यभवत्तत्पृथिव्यै पृथिवित्वन्तस्यामश्रा
 स देवानसृजत् वसून्नुद्रानादित्यान्ते देवाः प्रजापतिमब्रुवन्
 जायामहा इति सोऽब्रवीत्॥१४॥

यथाहं युष्मास्तपसासृक्ष्येवं तपसि प्रजननमिच्छध्वमिति
 तेभ्योऽग्निमायतनम्प्रायच्छदेतेनायतनेन श्राम्यतेति ते-
 ऽग्निनायतनेनाश्राम्यन्ते संवत्सर एकां गामसृजन्त तां
 वसुभ्यो रुद्रेभ्य आदित्येभ्यः प्रायच्छन्नेता रक्षध्वमिति
 तां वसवो रुद्रा आदित्या अरक्षन्त सा वसुभ्यो रुद्रेभ्य
 आदित्येभ्यः प्राजायत् त्रीणि च॥१५॥

शतानि त्रयस्त्रिंशत् चार्थं सैव सहस्रतम्यभवत्ते देवाः
 प्रजापतिमब्रुवन्सहस्रेण नो याजयेति सौऽग्निष्टोमेन
 वसूनयाजयत्त इमं लोकमजयन्तच्चाददुः स उक्थ्येन
 रुद्रानयाजयत्तेऽन्तरिक्षमजयन्तच्चाददुः सौऽतिरात्रेणा-
 दित्यानयाजयत्तेऽमुं लोकमजयन्तच्चाददुस्तदन्तरिक्षम्॥१६॥

व्यवैर्यत् तस्माद्बुद्ध्वा घातुंका अनायतना हि
 तस्मादाहुः शिथिलं वै मध्यममहस्त्रिरात्रस्य वि हि
 तदवैर्यतेति त्रैष्टुभम्मध्यमस्याह आज्यम्भवति संयानानि
 सूक्तानि शंसति षोडशिनं शंसत्यहो धृत्या
 अशिथिलम्भावाय तस्मात्त्रिरात्रस्याग्निष्टोम एव प्रथममहः
 स्यादथोक्थ्योऽथातिरात्र एषां लोकानां विधृत्यै त्रीणित्रीणि
 शतान्यनूचीनाहमव्यवच्छिन्नानि ददाति॥१७॥

एषां लोकानामनु संतत्यै दशत् न विच्छिन्द्याद्विराजं
 नेद्विच्छिनदानीत्यथ या सहस्रतम्यासीत्तस्यामिन्द्रश्च विष्णुश्च
 व्यायच्छेतां स इन्द्रोऽमन्यतानया वा इदं विष्णुः
 सहस्रं वक्ष्यत् इति तस्यामकल्पेतां द्विभाग इन्द्रस्तृतीये
 विष्णुस्तद्वा एषाभ्यनूच्यत उभा जिग्यथुरिति तां वा
 एतामच्छावाकः॥१८॥

ए॒व श॑स॒त्यथ॒ या स॑हस्र॒तमी॒ सा हो॒त्रे दे॒येति॒ होता॑रं
वा अ॒भ्यति॑रिच्यते॒ यद॑ति॒रिच्य॑ते॒ होत॑ाना॒प्तस्या॑पयिता-
था॑हुरु॒न्नेत्रे॒ देये॑त्यति॒रिक्ता॒ वा ए॒षा स॒हस्र॒स्याति॑रिक्त
उ॒न्नेत॑र्त्विजा॒मथा॑हुः सर्वे॑भ्यः सद॒स्येभ्यो॒ देये॑त्यथा॑हुरुदा॒कृत्या॒
सा व॑शं चरे॒दित्य॑था॑हर्ब्रह्म॒णे चा॒ग्नीधे॑ च॒ देये॑ति॑॥१९॥

द्विभा॑गम्ब्रह्म॒णे तृती॑यम॒ग्नीधं॒ ऐन्द्रो॒ वै ब्र॒ह्मा वैष्ण॒वो-
ऽग्नी॑द्यथै॒व ताव॑क॒ल्पेता॒मित्य॑था॑हुर्या॒ कल्या॑णी॒ बहुरू॒पा
सा दे॒येत्य॑था॑हुर्या॒ द्विरू॒पोभ॒यत॑एनी॒ सा दे॒येति॑ स॒हस्र॑स्य
परि॑गृहीत्यै॒ तद्वा ए॒तत्स॒हस्र॒स्याय॑नं॒ सह॑स्रं॒ स्तो॒त्रीयाः॑
स॒हस्रं॒ दक्षि॑णाः स॒हस्रं॑स॒म्मितः॒ सुव॑र्गो लो॒कः सु॒वर्ग॑स्य
लो॒कस्या॒भिजि॑त्यै॥२०॥

अ॒ब्रवी॑च्च॒ तद॒न्तरि॑क्ष॒न्ददा॒त्यच्छा॒वाकश्च॒ देये॑ति॒ सप्त॑च॒त्वारि॑श॒च्च॥५॥ ————— [५]

सोमो॒ वै स॒हस्रं॑मविन्द॒त्तमिन्द्रो॑ऽन्व॒विन्द॒त्तौ य॒मो
न्याग॑च्छ॒त्ताव॑ब्रवी॒दस्तु॒ मेऽत्रा॑पीत्यस्तु॒ ही ३ इत्य॑ब्रूता॒ं स
य॒म एक॑स्यां वी॒र्य॑म्पर्य॒पश्य॑दि॒यं वा अ॒स्य स॒हस्र॑स्य
वी॒र्य॑म्बिभ॒र्तीति॒ ताव॑ब्रवी॒दिय॑म्ममास्त्वे॒तद्यु॒वयो॑रिति॒
ताव॑ब्रूता॒ं सर्वे॒ वा ए॒तदे॒तस्यां॑ वी॒र्य॑म्॥२१॥

परि पश्यामोऽंशमा हंरामहा इति तस्यामंशमाहरन्त
तामप्सु प्रावेशयन्त्सोमायोदेहीति सा रोहिणी पिङ्गलैकहायनी
रूपं कृत्वा त्रयस्त्रिंशता च त्रिभिश्च शतैः सहोदैत्तस्माद्रोहिण्या
पिङ्गल्यैकहायन्या सोमं क्रीणीयाद्य एवं विद्वान्रोहिण्या
पिङ्गल्यैकहायन्या सोमं क्रीणाति त्रयस्त्रिंशता चैवास्य
त्रिभिश्च॥२२॥

शतैः सोमः क्रीतो भवति सुक्रीतेन यजते तामप्सु
प्रावेशयन्निन्द्रायोदेहीति सा रोहिणी लक्ष्मणा पंष्ठौही
वार्त्रघ्नी रूपं कृत्वा त्रयस्त्रिंशता च त्रिभिश्च शतैः
सहोदैत्तस्माद्रोहिणीं लक्ष्मणाम्पंष्ठौहीं वार्त्रघ्नीं दद्याद्य
एवं विद्वान्रोहिणीं लक्ष्मणाम्पंष्ठौहीं वार्त्रघ्नीं ददाति
त्रयस्त्रिंशच्चैवास्य त्रीणि च शतानि सा दत्ता॥२३॥

भवति तामप्सु प्रावेशयन् यमायोदेहीति सा जरती
मूर्खा तंजघ्न्या रूपं कृत्वा त्रयस्त्रिंशता च त्रिभिश्च
शतैः सहोदैत्तस्माञ्जरतीम्मूर्खा तंजघ्न्यामनुस्तरणीं कुर्वीत
य एवं विद्वान्जरतीम्मूर्खा तंजघ्न्यामनुस्तरणीं कुरुते
त्रयस्त्रिंशच्चैवास्य त्रीणि च शतानि सामुष्मिल्लोके भवति

वागेव सहस्रतमी तस्मात्॥२४॥

वरो देयः सा हि वरः सहस्रमस्य सा दत्ता भवति
तस्माद्वरो न प्रतिगृह्यः सा हि वरः सहस्रमस्य प्रतिगृहीत-
म्भवतीयं वर इति ब्रूयादथान्याम्ब्रूयादियम्ममेति तथास्य
तत्सहस्रमप्रतिगृहीतम्भवत्युभयतएनी स्यात्तदाहुरन्यत- एनी
स्यात्सहस्रम्परस्तादेतमिति यैव वरः॥२५॥

कल्याणी रूपसमृद्धा सा स्यात्सा हि वरः समृद्धौ
तामुत्तरेणाग्नीध्रम्पर्याणीयाहवनीयस्यान्ते द्रोणकलशमव
घ्रापयेदा जिघ्र कलशम्मह्युरुधारा पयस्वत्या त्वा
विशन्त्विन्दवः समुद्रमिव सिन्धवः सा मा सहस्र आ भज
प्रजया पशुभिः सह पुनर्मा विशताद्रयिरिति प्रजयैवैनम्पशुभी
रय्या सम्॥२६॥

अर्धयति प्रजावान्पशुमात्रयिमान्भवति य एवं वेद तया
सहाग्नीध्रम्परेत्यं पुरस्तात्प्रतीच्यां तिष्ठन्त्यां जुहुयादुभा
जिग्यथुर्न परा जयेथे न परा जिग्ये कतरश्चनैनोः।
इन्द्रश्च विष्णो यदपस्पृधेथां त्रेधा सहस्रं वि तदैरयेथामिति
त्रेधाविभक्तं वै त्रिरात्रे सहस्रं साहस्रीमेवैनां करोति

सहस्रस्यैवैनान्मात्राम्॥२७॥

करोति रूपाणि जुहोति रूपैरेवैना५ समर्धयति तस्या
उपोत्थाय कर्णमा जपेदिडे रन्तेऽदिते सरस्वति प्रिये प्रेयसि
महि विश्रुत्येतानि ते अघ्निये नामानि सुकृतं मा देवेषु
ब्रूतादिति देवेभ्य एवैनमा वेदयत्यन्वेन देवा बुध्यन्ते॥२८॥

एतदेतस्या वीर्यमस्य त्रिभिश्च दत्ता सहस्रतमी तस्मादेव वरः सम्मात्रमेकान्नचत्वारि५शब्द॥६॥ [६]

सहस्रतम्या वै यजमानः सुवर्गं लोकमेति सैन५ सुवर्गं
लोकं गमयति सा मा सुवर्गं लोकं गमयेत्याह सुवर्गमेवैनं
लोकं गमयति सा मा ज्योतिष्मन्तं लोकं गमयेत्याह
ज्योतिष्मन्तमेवैनं लोकं गमयति सा मा सर्वान्पुण्या-
ल्लोकान्गमयेत्याह सर्वानेवैनम्पुण्याल्लोकान्गमयति सा॥२९॥

मा प्रतिष्ठां गमय प्रजया पशुभिः सह पुनर्मा
विंशताद्रयिरिति प्रजयैवैनम्पशुर्भी रय्यां प्रतिष्ठापयति
प्रजावान्पशुमान्प्रयिमान्भवति य एवं वेद तामग्नीधे वा ब्रह्मणे
वा होत्रे वोद्गात्रे वाध्वर्यवे वा दद्यात्सहस्रमस्य सा दत्ता
भवति सहस्रमस्य प्रतिगृहीतम्भवति यस्तामविद्वान्॥३०॥

प्रतिगृह्णाति तां प्रति गृह्णीयादेकासि न सहस्रमेकां

त्वा भूतां प्रति गृह्णामि न सहस्रमेका मा भूता विश मा
 सहस्रमित्येकामेवैनं भूतां प्रति गृह्णाति न सहस्रं य एवं
 वेद स्योनासि सुषदा सुशेवा स्योना मा विश सुषदा मा
 विश सुशेवा मा विश॥३१॥

इत्याह स्योनैवैनं सुषदा सुशेवा भूता विशति नैनं
 हिनस्ति ब्रह्मवादिनो वदन्ति सहस्रं सहस्रतम्यन्वेती ३
 सहस्रतमीं सहस्रा ३ मिति यत्प्राचीमुत्सृजेत्सहस्रं
 सहस्रतम्यन्वित्युत्सृजेत्सहस्रमप्रज्ञात्रं सुवर्गं लोकं न प्र
 जानीयात्प्राचीमुत्सृजति तां सहस्रमनु पर्यावर्तते सा
 प्रजानती सुवर्गं लोकमेति यजमानमभ्युत्सृजति क्षिप्रे
 सहस्रम्प्र जायत उत्तमा नीयते प्रथमा देवान्गच्छति॥३२॥

लोकानामयति सार्विद्वान्सुशेवा माविश यजमानन्द्वादश च॥७॥ [७]

अत्रिरददादौर्वाय प्रजाम्पुत्रकामाय स रिरिचानोऽमन्यत्
 निर्वीर्यः शिथिलो यातयामा स एतं चतूरात्रमपश्यत्
 तमाहरत्तेनायजत् ततो वै तस्य चत्वारो वीरा आजायन्त
 सुहोता सूद्राता स्वध्वर्युः सुसंभयो य एवं विद्वाश्चतूरात्रेण
 यजत् आस्यं चत्वारो वीरा जायन्ते सुहोता सूद्राता

स्वध्वर्युः सुसंभेयो ये चतुर्विंशः पवंमाना ब्रह्मवर्चसं
तत्॥ ३३॥

य उद्यन्तः स्तोमाः श्रीः सात्रिः श्रद्धादेवं यजमानं
चत्वारि वीर्याणि नोपानमन्तेजं इन्द्रियम्ब्रह्मवर्चसमन्नाद्यं
स एतांश्चतुरश्रतुष्टोमान्स्वोमानपश्यत्तानाहरतैर्यजत तेजं
एव प्रथमेनावारुन्देन्द्रियं द्वितीयेन ब्रह्मवर्चसं तृतीयेनान्नाद्यं
चतुर्थेन य एवं विद्वांश्चतुरश्रतुष्टोमान्स्वोमानाहरति तैर्यजते
तेजं एव प्रथमेनावारुन्देन्द्रियं द्वितीयेन ब्रह्मवर्चसं
तृतीयेनान्नाद्यं चतुर्थेन यामेवात्रिंशद्ब्रह्मवर्चोत्तामेव यजमान
ऋध्नोति॥ ३४॥

तत्तेजं एवाष्टादश च॥८॥ [८]

जमदग्निः पुष्टिकामश्चतूरात्रेणायजत स एतान्योषां
अपुष्यत्तस्मात्पलितौ जामदग्नियौ न सं जानाते एतानेव
पोषान्पुष्यति य एवं विद्वांश्चतूरात्रेण यजते पुरोडाशिन्यं
उपसदो भवन्ति पशवो वै पुरोडाशः पशूनेवावारुन्देऽन्नं
वै पुरोडाशोऽन्नमेवावारुन्देऽन्नादः पशुमान्भवति य एवं
विद्वांश्चतूरात्रेण यजते॥ ३५॥

जुमदग्निरष्टाचत्वारिंशत्॥९॥ [९]

संवत्सरो वा इदमेकं आसीत्सोऽकामयतर्तून्सृजेयेति स
एतम्पञ्चरात्रमपश्यत्तमाहरत्तेनायजत ततो वै स ऋतूनसृजत
य एवं विद्वान्पञ्चरात्रेण यजते प्रैव जायते त ऋतवः सृष्टा न
व्यावर्तन्त त एतम्पञ्चरात्रमपश्यन् तमाहरन्तेनायजन्त ततो
वै ते व्यावर्तन्त॥३६॥

य एवं विद्वान्पञ्चरात्रेण यजते वि पाप्मना भ्रातृव्येणा
वर्तते सार्वसेनिः शौचेयोऽकामयत पशुमान्थस्यामिति स
एतम्पञ्चरात्रमाहरत्तेनायजत ततो वै स सहस्रं पशून्प्राप्नोद्य
एवं विद्वान्पञ्चरात्रेण यजते प्र सहस्रं पशूनाप्नोति
बबरः प्रावाहणिरकामयत वाचः प्रवदिता स्यामिति स
एतम्पञ्चरात्रमा॥३७॥

अहरत्तेनायजत ततो वै स वाचः प्रवदिताभवद्य एवं
विद्वान्पञ्चरात्रेण यजते प्रवदितैव वाचो भवत्यथो एनं
वाचस्पतिरित्याहुरनासश्चतूरात्रोऽतिरिक्तः षड्रात्रोऽथ वा एष
सम्प्रति यज्ञो यत्पञ्चरात्रो य एवं विद्वान्पञ्चरात्रेण यजते
सम्प्रत्यैव यज्ञेन यजते पञ्चरात्रो भवति पञ्च वा ऋतवः

संवत्सरः॥३८॥

ऋतुष्वेव सं वत्सरे प्रति तिष्ठत्यथो पञ्चाक्षरा पङ्क्तिः
पाङ्क्तो यज्ञो यज्ञमेवाव रुन्दे त्रिवृदग्निष्टोमो भवति तेजं
एवाव रुन्दे पञ्चदशो भवतीन्द्रियमेवाव रुन्दे सप्तदशो
भवत्यन्नाद्यस्यावरुद्धा अथो प्रैव तेन जायते पञ्चविंशो-
ऽग्निष्टोमो भवति प्रजापतेराप्त्यै महाव्रतवानन्नाद्यस्यावरुद्धौ
विश्वजिथ्सर्वपृष्ठोऽतिरात्रो भवति सर्वस्याभिजित्यै॥३९॥

ते व्यावर्तन्त प्रवदिता स्यामिति स एतम्पञ्चरात्रमा सं वत्सरोऽभिजित्यै॥१०॥[१०]

देवस्य त्वा सवितुः प्रसवेऽश्विनोर्बाहुभ्यां पूष्णो
हस्ताभ्यामा दद इमामगृभ्णन्नशनामृतस्य पूर्व आयुषि
विदथेषु कव्या। तया देवाः सुतमा बभूवुरऋतस्य
सामन्त्सरमारपन्ती। अभिधा असि भुवनमसि यन्तासि
धर्तासि सौऽग्निं वैश्वानरं सप्रथसं गच्छ स्वाहाकृतः
पृथिव्यां यन्ता राड्यन्तासि यमनो धर्तासि धरुणः कृष्यै त्वा
क्षेमाय त्वा रय्यै त्वा पोषाय त्वा पृथिव्यै त्वान्तरिक्षाय त्वा
दिवे त्वा सते त्वासते त्वाद्ध्यस्त्वौषधीभ्यस्त्वा विश्वेभ्यस्त्वा
भूतेभ्यः॥४०॥

धुरुणः प्रश्नविंशतिश्च॥११॥ [११]

विभूर्मात्रा प्रभूः पित्राश्वोऽसि हयोऽस्यत्योऽसि
नरोऽस्यर्वासि सप्तिरसि वाज्यसि वृषांसि नृमणा
असि ययुर्नामास्यादित्यानाम्पत्वान्विह्यग्रये स्वाहा
स्वाहेन्द्राग्निभ्यां स्वाहा प्रजापतये स्वाहा विश्वेभ्यो
देवेभ्यः स्वाहा सर्वाभ्यो देवेताभ्य इह धृतिः स्वाहेह
विधृतिः स्वाहेह रन्तिः स्वाहेह रमन्तिः स्वाहा भूरसि भुवे
त्वा भव्याय त्वा भविष्यते त्वा विश्वेभ्यस्त्वा भूतेभ्यो देवा
आशापाला एतं देवेभ्योऽश्वम्मेधाय प्रोक्षितं गोपायत॥४१॥

रन्तिः स्वाहा द्वाविंशतिश्च॥१२॥ [१२]

आयनाय स्वाहा प्रायणाय स्वाहोद्वावाय स्वाहोद्भुताय
स्वाहा शूकराय स्वाहा शूकृताय स्वाहा पलायिताय स्वाहा-
ऽऽपलायिताय स्वाहाऽऽवल्गते स्वाहा परावल्गते स्वाहा-
ऽऽयते स्वाहा प्रयते स्वाहा सर्वस्मै स्वाहा॥४२॥

आयनायोत्तरमापलायिताय षड्विंशतिः॥१३॥ [१३]

अग्रये स्वाहा सोमाय स्वाहा वायवे स्वाहापाम्मोदाय
स्वाहा सवित्रे स्वाहा सरस्वत्यै स्वाहेन्द्राय स्वाहा बृहस्पतये

स्वाहा॑ मि॒त्राय॒ स्वाहा॑ वरु॑णाय॒ स्वाहा॑ सर्व॑स्मै स्वाहा॑॥ 43॥

[१४]

पृ॒थि॒व्यै स्वाहा॑ऽन्तरि॑क्षाय॒ स्वाहा॑ दि॒वे स्वाहा॑ सू॒र्याय॒
स्वाहा॑ च॒न्द्रम॑से स्वाहा॑ नक्ष॑त्रेभ्यः स्वाहा॑ प्रा॒च्यै दि॒शे स्वाहा॑
दक्षि॑णायै दि॒शे स्वाहा॑ प्र॒तीच्यै॑ दि॒शे स्वाहा॑दी॒च्यै दि॒शे
स्वाहा॑र्ध्वायै दि॒शे स्वाहा॑ दि॒ग्भ्यः स्वाहा॑ऽ- वान्तरि॑क्षाभ्यः
स्वाहा॑ समा॑भ्यः स्वाहा॑ शर॑द्भ्यः स्वाहा॑ऽहोरा॑त्रेभ्यः स्वाहा॑-
ऽर्धमा॑सेभ्यः स्वाहा॑ मा॒सेभ्यः॑ स्वाहा॑र्तु॑भ्यः स्वाहा॑ सं॒वत्स॑राय॒
स्वाहा॑ सर्व॑स्मै स्वाहा॑॥ 44॥

[१५]

अ॒ग्नये॑ स्वाहा॑ सोमा॑य॒ स्वाहा॑ सवि॑त्रे स्वाहा॑ सर॑स्वत्यै
स्वाहा॑ पू॒ष्णे स्वाहा॑ बृह॑स्पतये॒ स्वाहा॑ऽपाम्मो॑दाय॒ स्वाहा॑
वा॒यवे॑ स्वाहा॑ मि॒त्राय॒ स्वाहा॑ वरु॑णाय॒ स्वाहा॑ सर्व॑स्मै स्वाहा॑॥
45॥

[१६]

पृ॒थि॒व्यै स्वाहा॑ऽन्तरि॑क्षाय॒ स्वाहा॑ दि॒वे स्वाहा॑ऽग्नये॑ स्वाहा॑

सोमाय॑ स्वाहा॒ सूर्याय॑ स्वाहा॑ च॒न्द्रम॑से स्वाहा॒ऽह्ने स्वाहा॑
 रात्रि॑यै स्वाहा॒र्जवे॑ स्वाहा॑ सा॒धवे॑ स्वाहा॑ सु॒क्षित्यै॑ स्वाहा॑
 क्षु॒धे स्वाहा॑ऽऽशि॒तिमे॑ स्वाहा॒ रोगा॑य॒ स्वाहा॑ हि॒माय॑ स्वाहा॑
 शी॒ताय॑ स्वाहा॑ऽऽत॒पाय॑ स्वाहा॑ऽर॒ण्याय॑ स्वाहा॑ सुव॒र्गाय॑
 स्वाहा॑ लो॒काय॑ स्वाहा॑ सर्व॑स्मै स्वाहा॑॥ 46॥

[१७]

भुवो॑ दे॒वानां॑ कर्म॒णाप॑स॒र्तस्य॑ प॒थ्यासि॑ वसु॒भिर्दे॒वेभिर्दे॒वत॑या
 गाय॑त्रेण॑ त्वा॒ छन्द॑सा युनज्मि वस॒न्तेन॑ त्व॒र्तुना॑ ह॒विषा॑
 दीक्ष॑यामि रु॒द्रेभिर्दे॒वेभिर्दे॒वत॑या त्रैष्टु॑भेन त्वा॒ छन्द॑सा युनज्मि
 ग्री॒ष्मेण॑ त्व॒र्तुना॑ ह॒विषा॑ दीक्ष॑याम्यादित्येभि॒र्दे॒वेभिर्दे॒वत॑या
 जा॒गते॑न त्वा॒ छन्द॑सा युनज्मि व॒र्षाभि॑स्त्व॒र्तुना॑ ह॒विषा॑
 दीक्ष॑यामि वि॒श्वेभिर्दे॒वेभिर्दे॒वत॑यानुष्टु॒भेन॑ त्वा॒ छन्द॑सा
 युनज्मि॥ ४७॥

श॒रदा॑ त्व॒र्तुना॑ ह॒विषा॑ दीक्ष॑याम्यङ्गि॒रोभिर्दे॒वेभिर्दे॒वत॑या
 पा॒ङ्केन॑ त्वा॒ छन्द॑सा युनज्मि हेम॒न्तशि॑शि॒राभ्या॑ त्व॒र्तुना॑
 ह॒विषा॑ दीक्ष॑याम्याहं दी॒क्षाम॑रुहमृ॒तस्य॑ प॒त्नीं गाय॑त्रेण॑
 छन्द॑सा ब्रह्म॑णा च॒र्त॑ꣳ स॒त्येऽधा॑ꣳ स॒त्यमृ॑तेऽधाम्। म॒हीमू॑

षु सुत्रामाणमिह धृतिः स्वाहेह विधृतिः स्वाहेह रन्तिः
स्वाहेह रमन्तिः स्वाहा॥ 48॥

[१८]

ईङ्गाराय स्वाहेङ्गृताय स्वाहा क्रन्दते स्वाहाऽवक्रन्दते
स्वाहा प्रोथते स्वाहा प्रप्रोथते स्वाहा गन्धाय स्वाहा घ्राताय
स्वाहा प्राणाय स्वाहा व्यानाय स्वाहाऽपानाय स्वाहा
संदीयमानाय स्वाहा संदिताय स्वाहा विचृत्यमानाय स्वाहा
विचृत्ताय स्वाहा पलायिष्यमाणाय स्वाहा पलायिताय
स्वाहोपरस्यते स्वाहोपरताय स्वाहा निवेक्ष्यते स्वाहा
निविशमानाय स्वाहा निविष्टाय स्वाहा निषथ्स्यते स्वाहा
निषीदते स्वाहा निषण्णाय स्वाहा॥ ४९॥

आसिष्यते स्वाहाऽऽसीनाय स्वाहाऽऽसिताय स्वाहा
निपथ्स्यते स्वाहा निपद्यमानाय स्वाहा निपन्नाय स्वाहा
शयिष्यते स्वाहा शयानाय स्वाहा शयिताय स्वाहा
सम्मीलिष्यते स्वाहा सम्मीलते स्वाहा सम्मीलिताय स्वाहा
स्वप्स्यते स्वाहा स्वपते स्वाहा सुप्ताय स्वाहा प्रभोथ्स्यते
स्वाहा प्रबुध्यमानाय स्वाहा प्रबुद्धाय स्वाहा जागरिष्यते
स्वाहा जाग्रते स्वाहा जागरिताय स्वाहा शुश्रूषमाणाय

स्वाहा॑ शृण्व॒ते स्वाहा॑ श्रु॒ताय॒ स्वाहा॑ वीक्षिष्य॒ते स्वाहा॑॥५०॥

वीक्ष॑मा॒णाय॒ स्वाहा॒ वीक्षि॑ताय॒ स्वाहा॑ स॒हास्य॑ते
स्वाहा॑ स॒ज्जिहा॑नाय॒ स्वाहो॒ज्जिहा॑नाय॒ स्वाहा॑ विव॒थ्स्य॑ते
स्वाहा॑ विव॒र्तमा॑नाय॒ स्वाहा॒ विवृ॑त्ताय॒ स्वाहो॑त्थास्य॒ते
स्वाहो॑त्तिष्ठ॒ते स्वाहो॑त्थि॒ताय॒ स्वाहा॑ विध॒विष्य॑ते स्वाहा॑
विधू॑न्वा॒नाय॒ स्वाहा॒ विधू॑ताय॒ स्वाहो॑त्क्र॒स्य॑ते स्वाहो॑त्क्राम॒ते
स्वाहो॑त्क्रान्ताय॒ स्वाहा॑ च॒क्रमि॑ष्य॒ते स्वाहा॑ च॒क्रम्य॑मा॒णाय॒
स्वाहा॑ च॒क्रमि॑ताय॒ स्वाहा॑ कण्डूयिष्य॒ते स्वाहा॑ कण्डूय॑मा॒नाय॒
स्वाहा॑ कण्डूयि॑ताय॒ स्वाहा॑ नि॒कषि॑ष्य॒ते स्वाहा॑ नि॒कष॑मा॒णाय॒
स्वाहा॑ नि॒कषि॑ताय॒ स्वाहा॒ यद॑त्ति॒ तस्मै॒ स्वाहा॒ यत्पि॑ब॒ति
तस्मै॒ स्वाहा॒ यन्मे॑ह॒ति॒ तस्मै॒ स्वाहा॒ यच्छ॑कृ॒त्करो॑ति॒ तस्मै॒
स्वाहा॒ रे॒तसे॑ स्वाहा॑ प्र॒जाभ्यः॒ स्वाहा॑ प्र॒जन॑नाय॒ स्वाहा॒
सर्व॑स्मै॒ स्वाहा॑॥५१॥

[१९]

अ॒ग्नये॒ स्वाहा॑ वा॒यवे॒ स्वाहा॑ सू॒र्याय॒ स्वाह॑र्तम॒स्यृत॑स्य॒र्तम॑सि
स॒त्यम॑सि॒ स॒त्यस्य॑ स॒त्यम॑स्यृत॒स्य प॑न्था॒ असि॑ दे॒वाना॑
छा॒यामृ॑तस्य॒ नाम॒ तथ्स॒त्यं य॑त्त्वं प्र॒जाप॑ति॒रस्य॑धि॒

यदस्मिन्वाजिनीव शुभः स्पर्धन्ते दिवः सूर्येण विशोऽपो
वृणानः पवते कव्यन्पशुं न गोपा इर्यः परिज्मा॥ 52॥

[२०]

॥द्वितीयः प्रश्नः॥

॥तैत्तिरीयसंहितायां सप्तमकाण्डे द्वितीयः प्रश्नः॥

साध्या वै देवाः सुवर्गकामा एत९ षड्रात्रमपश्यन्तमाहरन्तेना
ततो वै ते सुवर्गं लोकमायन् य एवं विद्वा९सः षड्रात्रमासते
सुवर्गमेव लोकं यन्ति देवसत्रं वै षड्रात्रः प्रत्यक्ष९ ह्येतानि
पृष्ठानि य एवं विद्वा९सः षड्रात्रमासते साक्षादेव देवता
अभ्यारोहन्ति षड्रात्रो भवति षड्वा ऋतवः षट्पृष्ठानि॥१॥

पृष्ठैरेवर्तूनन्वारोहन्त्यृतुभिः संवत्सरन्ते संवत्सर एव
प्रति तिष्ठन्ति बृहद्रथन्तराभ्यां यन्तीयं वाव रथन्तरमसौ
बृहदाभ्यामेव यन्त्यथो अनयोरेव प्रति तिष्ठन्त्येते वै
यज्ञस्याञ्जसायनी सुती ताभ्यामेव सुवर्गं लोकं यन्ति
त्रिवृदग्निष्टोमो भवति तेज एवाव रुन्धते पञ्चदशो
भवतीन्द्रियमेवाव रुन्धते सप्तदशः॥२॥

भवत्यन्नाद्यस्यावरुद्ध्या अथो प्रैव तेन जायन्त एकविंशो
 भवति प्रतिष्ठित्या अथो रुचमेवात्मन्दधते त्रिणवो भवति
 विजित्यै त्रयस्त्रिंशो भवति प्रतिष्ठित्यै सदोहविर्धानिन एतेन
 षड्रात्रेण यजेरन्नाश्वत्थी हविर्धानं चाग्नीध्रं च भवतस्तद्धि
 सुवर्ग्यश्चक्रीवती भवतः सुवर्गस्य लोकस्य समष्ट्या
 उलूखलबुधो यूपो भवति प्रतिष्ठित्यै प्राश्नो यान्ति प्राडिव
 हि सुवर्गः॥३॥

लोकः सरस्वत्या यान्त्येष वै देवयानः पन्थास्तमेवान्वारोहन्त
 यान्त्यवर्तिमेवान्यस्मिन्प्रतिषज्यं प्रतिष्ठां गच्छन्ति यदा दश
 शतं कुर्वन्त्यथैकमुत्थानं शतायुः पुरुषः शतेन्द्रिय
 आयुष्येवेन्द्रिये प्रति तिष्ठन्ति यदा शतं सहस्रं
 कुर्वन्त्यथैकमुत्थानं सहस्रसम्मितो वा असौ लोको-
 ऽमुमेव लोकमभि जयन्ति यदैषां प्रमीयेत यदा वा
 जीयेरन्नथैकमुत्थानन्तद्धि तीर्थम्॥४॥

पृष्ठानि सप्तदशः सुवर्गो जयन्ति यदैकादश च॥१॥ [१]

कुसुरुबिन्द औद्दालकिरकामयत पशुमान्थस्यामिति स
 एतं सप्तरात्रमाहरत्तेनायजत तेन वै स यावन्तो ग्राम्याः

प॒शव॑स्ता॒नवा॑रु॒न्द्ध य॑ ए॒वं वि॒द्वान्त्स॑प्तरा॒त्रेण॑ यज॑न्ते याव॑न्त
 ए॒व ग्रा॒म्याः प॒शव॑स्ता॒नेवा॑रु॒न्द्धे स॑प्तरा॒त्रो भ॑वति स॒प्त
 ग्रा॒म्याः प॒शवः॑ स॒प्तरा॒ण्याः स॒प्त छ॒न्दाः॑स्यु॒भय॑स्याव॑रु॒द्धौ
 त्रि॒वृ॒द॒ग्नि॒ष्टो॒मो भ॑वति तेजः॥५॥

ए॒वाव॑ रु॒न्द्धे प॑ञ्चद॒शो भ॑वतीन्द्रि॒यमे॒वाव॑ रु॒न्द्धे स॑प्तद॒शो
 भ॑वत्य॒न्नाद्य॑स्याव॑रु॒द्धा अथो॑ प्रै॒व तेन॑ जायत एकवि॑ंशो
 भ॑वति प्र॒ति॑ष्ठित्या अथो रुच॑मे॒वात्म॑न्धत्ते त्रि॒णवो॑ भ॑वति
 वि॒जित्यै॑ प॑ञ्चवि॑ंशोऽग्नि॒ष्टो॒मो भ॑वति प्र॒जाप॑ते॒राप्त्यै॑
 म॒हाव्र॑तवा॒न॒न्नाद्य॑स्याव॑रु॒द्धौ विश्व॑जि॒त्सर्व॑पृ॒ष्ठोऽति॑रा॒त्रो
 भ॑वति स॒र्वस्या॑भिजित्यै॒ यत्प्र॑त्यक्ष॒म्पूर्वे॑ष्वहः॒सु पृ॒ष्ठान्यु॑पे॒युः
 प्र॒त्यक्ष॑म्॥६॥

वि॒श्वजि॑ति॒ यथा॑ दु॒ग्धामु॑प॒सीद॑त्ये॒वमु॑त्त॒मम॑हः
 स्या॒न्नैक॑रा॒त्रश्च॑न स्या॑द्बृ॒हद्रथ॑न्तरे पूर्वे॑ष्वहः॒सूपं॑ यन्ती॒यं
 वाव॑ र॒थं॑त॒रम॑सौ बृ॒हदा॑भ्यामे॒व न॑ यन्त्यथो॒ अनयो॑रे॒व प्र॑ति
 तिष्ठ॑न्ति॒ यत्प्र॑त्यक्षं॑ वि॒श्वजि॑ति॒ पृ॒ष्ठान्यु॑प॒यन्ति॑ यथा॒ प्र॒त्तां दु॑हे
 ता॒दृगे॒व तत्॥७॥

बृहस्पतिरकामयत ब्रह्मवर्चसी स्यामिति स
 एतमष्टरात्रमपश्यत्तमाहरत्तेनायजत ततो वै स ब्रह्मवर्चस्यभवद्य
 एवं विद्वानष्टरात्रेण यजते ब्रह्मवर्चस्यैव भवत्यष्टरात्रो
 भवत्यष्टाक्षरा गायत्री गायत्री ब्रह्मवर्चसम्गायत्रियैव
 ब्रह्मवर्चसमव रुन्देऽष्टरात्रो भवति चतस्रो वै दिशश्चतस्रो-
 ऽवान्तरदिशा दिग्भ्य एव ब्रह्मवर्चसमव रुन्दे॥८॥

त्रिवृदग्निष्टोमो भवति तेज एवाव रुन्दे पञ्चदशो
 भवतीन्द्रियमेवाव रुन्दे सप्तदशो भवत्यन्नाद्यस्यावरुद्धा
 अथो प्रैव तेन जायत एकविंशो भवति प्रतिष्ठित्या
 अथो रुचमेवात्मन्धत्ते त्रिणवो भवति विजित्यै त्रयस्त्रिंशो
 भवति प्रतिष्ठित्यै पञ्चविंशोऽग्निष्टोमो भवति प्रजापतेराप्त्यै
 महाव्रतवानन्नाद्यस्यावरुद्धौ विश्वजिह्सर्वपृष्ठोऽतिरात्रो भवति
 सर्वस्याभिजित्यै॥९॥

दिग्भ्य एव ब्रह्मवर्चसमवरुन्देऽभिजित्यै॥३॥ [३]

प्रजापतिः प्रजा असृजत ताः सृष्टाः क्षुधं न्यायन्त्स एतं
 नवरात्रमपश्यत्तमाहरत्तेनायजत ततो वै प्रजाभ्योऽ कल्पत
 यर्हि प्रजाः क्षुधं निगच्छेयुस्तरहि नवरात्रेण यजेतेमे हि वा

ए॒तासां॑ लो॒का अक्लृप्ता॑ अथै॒ताः क्षुधं॑ नि गच्छन्ती॒माने॒वाभ्यो॑
लो॒कान्कल्प॑यति॒ तान्कल्प॑मानान्प्र॒जाभ्योऽनु॑ कल्पते॒
कल्प॑न्ते॥१०॥

अ॒स्मा इ॒मे लो॒का ऊ॒र्जं प्र॒जासु॑ दधाति त्रिरा॒त्रेणै॒वेमं॑
लो॒कं क॑ल्पयति त्रिरा॒त्रेणा॒न्तरि॑क्षं त्रिरा॒त्रेणा॒मुं लो॒कं
यथा॑ गु॒णे गु॒णम॒न्वस्य॑त्ये॒वमे॒व तल्लो॒के लो॒कम॒न्वस्य॑ति
धृ॒त्या अ॒शि॒थिल॑म्भावाय॒ ज्योति॒र्गौरा॒युरिति॑ ज्ञा॒ताः स्तोमा॑
भव॑न्ती॒यं वाव॑ ज्योति॒रन्तरि॑क्षं गौ॒रसा॒वायु॑रे॒ष्वेव॑ लो॒केषु॑
प्रति॑ तिष्ठन्ति ज्ञा॒त्रं प्र॒जाना॑म्॥११॥

गुच्छ॑ति न॒वरा॒त्रो भ॑वत्यभिपूर्वमे॒वास्मिन्तेजो॑ दधाति
यो ज्यो॒गाम॑यावी॒ स्यात्स न॑वरा॒त्रेण॑ यजेत प्रा॒णा हि वा
ए॒तस्या॑धृ॒ता अथै॒तस्य॑ ज्यो॒गाम॑यति प्रा॒णाने॒वास्मिन्दा॑धारो॒त
यदी॒तासु॑र्भव॑ति जी॒वत्ये॒व॥१२॥

कल्पन्ते प्र॒जाना॒न्नय॑न्ति॒ शब्द॑॥४॥ [४]

प्र॒जाप॑तिरकामयत॒ प्र जा॑येयेति॒ स ए॒तं दश॑हो॒तारम॑पश्य॒त्तमं॑
दशरा॒त्रम॑सृजत॒ तेन॑ दशरा॒त्रेण॑ प्राजा॑यत दशरा॒त्राय॑
दीक्षि॑ष्यमा॒णो दश॑हो॒तारं जुहु॑या॒द्वश॑हो॒त्रैव॑ द॒शरा॒त्रं सृ॑जते॒

तेन दशरात्रेण प्र जायते वैराजो वा एष यज्ञो यद्दशरात्रो य
 एवं विद्वान्दशरात्रेण यजते विराजमेव गच्छति प्राजापत्यो
 वा एष यज्ञो यद्दशरात्रः॥१३॥

य एवं विद्वान्दशरात्रेण यजते प्रैव जायत
 इन्द्रो वै सदृङ्देवताभिरासीत्स न व्यावृतमगच्छत्स
 प्रजापतिमुपाधावत् तस्मा एतं दशरात्रम्प्रायच्छत्तमाहरत्तेनायज
 ततो वै सोऽन्याभिर्देवताभिर्यावृतमगच्छद्य एवं
 विद्वान्दशरात्रेण यजते व्यावृतमेव पाप्मना भ्रातृव्येण
 गच्छति त्रिककुद्वै॥१४॥

एष यज्ञो यद्दशरात्रः ककुत्पञ्चदशः ककुदेकविंशः
 ककुत्रयस्त्रिंशो य एवं विद्वान्दशरात्रेण यजते त्रिककुदेव
 समानानां भवति यजमानः पञ्चदशो यजमान एकविंशो
 यजमानस्त्रयस्त्रिंशः पुर इतरा अभिचर्यमाणो दशरात्रेण
 यजेत देवपुरा एव पर्यूहते तस्य न कुतश्चनोपाव्याधो
 भवति नैनमभिचरन्त्यस्तृणुते देवासुराः संयत्ता आसन्ते देवा
 एताः॥१५॥

देवपुरा अपश्यन् यद्दशरात्रस्ताः पर्यूहन्त तेषां

न कुतश्चनोपाव्याधोऽभवत्ततो देवा अभवन्परासुरा
 यो भ्रातृव्यवान्स्यात्स दशरात्रेण यजेत देवपुरा एव
 पर्यूहते तस्य न कुतश्चनोपाव्याधो भवति भवत्यात्मना
 परास्य भ्रातृव्यो भवति स्तोमः स्तोमस्योपस्तिर्भवति
 भ्रातृव्यमेवोपस्तिं कुरुते जामि वै॥१६॥

एतत्कुर्वन्ति यज्यायाः सः स्तोममुपेत्य कनीयाः समुपयन्ति
 यदग्निष्टोमसामान्यवस्ताच्च परस्ताच्च भवन्त्यजामित्वाय
 त्रिवृदग्निष्टोमोऽग्निष्टुदाग्नेयीषु भवति तेज एवाव रुन्दे
 पञ्चदश उक्थ्य ऐन्द्रीष्विन्द्रियमेवाव रुन्दे त्रिवृदग्निष्टोमो
 वैश्वदेवीषु पुष्टिमेवाव रुन्दे सप्तदशोऽग्निष्टोमः प्राजापत्यासु
 तीव्रसोमोऽन्नाद्यस्यावरुद्धा अथो प्रैव तेन जायते॥१७॥

एकविंश उक्थ्यः सौरीषु प्रतिष्ठित्या अथो
 रुचमेवात्मन्धत्ते सप्तदशोऽग्निष्टोमः प्राजापत्यासूपहव्यं
 उपहवमेव गच्छति त्रिणवावग्निष्टोमावभित ऐन्द्रीषु विजित्यै
 त्रयस्त्रिंश उक्थ्यो वैश्वदेवीषु प्रतिष्ठित्यै विश्वजिथ्सर्वपृष्ठोऽ
 तिरात्रो भवति सर्वस्याभिजित्यै॥१८॥

ऋतवो वै प्रजाकामाः प्रजां नाविन्दन्त तैऽकामयन्त
 प्रजां सृजेमहि प्रजामव रुन्धीमहि प्रजां विन्देमहि
 प्रजावन्तः स्यामेति त एतमेकादशरात्रमपश्यन्तमाहरन्तेनायज-
 ततो वै ते प्रजामसृजन्त प्रजामवारुन्धत प्रजामविन्दन्त
 प्रजावन्तोऽभवन्त ऋतवोऽभवन्तदार्तवानामार्तवत्वमृतूनां वा
 एते पुत्रास्तस्मात्॥१९॥

आर्तवा उच्यन्ते य एवं विद्वांस एकादशरात्रमासते
 प्रजामेव सृजन्ते प्रजामव रुन्धते प्रजां विन्दन्ते प्रजावन्तो
 भवन्ति ज्योतिरतिरात्रो भवति ज्योतिरेव पुरस्ताद्वधते
 सुवर्गस्य लोकस्यानुख्यात्यै पृष्ठः षडहो भवति षड्वा ऋतवः
 षट्दृष्टानि पृष्ठैरेवर्तूनन्वारोहन्त्यृतुभिः संवत्सरन्ते संवत्सर
 एव प्रति तिष्ठन्ति चतुर्विंशो भवति चतुर्विंशत्यक्षरा
 गायत्री॥२०॥

गायत्रम्ब्रह्मवर्चसङ्गायत्रियामेव ब्रह्मवर्चसे प्रति
 तिष्ठन्ति चतुश्चत्वारिंशो भवति चतुश्चत्वारिंशदक्षरा
 त्रिष्टुगिन्द्रियं त्रिष्टुत्रिष्टुभ्येवेन्द्रिये प्रति तिष्ठन्त्यष्टाचत्वारिंशो
 भवत्यष्टाचत्वारिंशदक्षरा जगती जागताः पशवो
 जगत्यामेव पशुषु प्रति तिष्ठन्त्येकादशरात्रो भवति पञ्च वा

ऋतव॑ आ॒र्त॒वाः प॒ञ्च॒र्तु॒ष्वे॒वा॒र्त॒वेषु॑ सं॒व॒त्स॒रे प्र॑ति॒ष्ठाय॑ प्र॒जाम॑व॒
रु॒न्ध॒तेऽति॒रा॒त्रा॒व॒भि॒तो भ॑वतः प्र॒जायै॑ परि॒गृही॒त्यै॥ २१॥

तस्माद्वायुत्र्येकान्नपञ्चाशच्च॥ ६॥ [६]

ऐ॒न्द्र॒वा॒य॒वा॒ग्रा॑न्गृ॒ही॒या॒द्यः का॒म॒ये॒त य॒था॒पूर्॒वं प्र॒जाः
क॑ल्पे॒र॒न्नि॒ति य॒ज्ञ॒स्य॒ वै क्लृ॑प्ति॒मनु॑ प्र॒जाः क॑ल्प॒न्ते
य॒ज्ञ॒स्या॒क्लृ॑प्ति॒मनु॑ न क॑ल्प॒न्ते य॒था॒पूर्॒वमे॒व प्र॒जाः क॑ल्प॒यति॒ न
ज्या॒या १ सं॒ कनी॑या॒नति॑ क्रा॒म॒त्यै॒न्द्र॒वा॒य॒वा॒ग्रा॑न्गृ॒ही॒या॒दाम॒या॒वि॒न
प्रा॒णेन॒ वा ए॒ष व्यु॑ध्य॒ते य॒स्या॒म॒य॒ति प्रा॒ण ऐ॑न्द्र॒वा॒य॒वः
प्रा॒णेनै॒वैन॑ २ स॒म॒र्ध॒यति॑ मै॒त्रा॒व॒रु॒णा॒ग्रा॑न्गृ॒ही॒रन् येषा॑
दी॒क्षि॒ताना॑ प्र॒मी॒ये॒त॥ २२॥

प्रा॒णा॒पा॒ना॒भ्यां वा ए॒ते व्यु॑ध्य॒न्ते येषा॑ दी॒क्षि॒ताना॑
प्र॒मी॒ये॒ते प्रा॒णा॒पा॒नौ मि॒त्रा॒व॒रु॒णौ प्रा॒णा॒पा॒ना॒वे॒व मु॑ख॒तः
परि॑ ह॒रन्त आ॒श्वि॒ना॒ग्रा॑न्गृ॒ही॒तानु॒जा॒व॒रोऽश्वि॒नौ वै
दे॒वाना॑मा॒नु॒जा॒व॒रौ प॒श्चे॒वा॒ग्र॒म्प॒र्यै॒ताम॒श्वि॒ना॒वे॒तस्य॑ दे॒वता॒
य आ॑नु॒जा॒व॒र॒स्ता॒वे॒वैन॑म॒ग्र॒म्परि॑ ण॒यतः॑ शु॒क्रा॒ग्रा॑न्गृ॒ही॒त
ग॒त॒श्रीः॑ प्र॒ति॒ष्ठा॒का॒मोऽसौ॑ वा आ॑दि॒त्यः शु॒क्र ए॒षोऽन्तो॑-
ऽन्त॑म्मनु॒ष्यः॥ २३॥

श्रियै गुत्वा नि वर्ततेऽन्तादेवान्तमा रभते न ततः
 पापीयान्भवति मन्थ्यग्रान्गृहीताभिचरन्नार्तपात्रं वा
 एतद्यन्मन्थिपात्रम्मृत्युनैवैनं ग्राहयति ताजगार्तिमाच्छ्रत्याग्रयणा
 यस्य पिता पितामहः पुण्यः स्यादथ तन्न प्राप्नुयाद्वाचा वा
 एष इन्द्रियेण व्यूह्यते यस्य पिता पितामहः पुण्यः॥२४॥

भवत्यथ तन्न प्राप्नोत्युर इवैतद्यज्ञस्य वागिव
 यदाग्रयणो वाचैवैनमिन्द्रियेण समर्धयति न ततः
 पापीयान्भव- त्युक्थ्याग्रान्गृहीताभिचर्यमाणः सर्वेषां वा
 एतत्पात्राणामिन्द्रियं यदुक्थ्यपात्रं सर्वेणैवैनमिन्द्रियेणाति
 प्र युङ्क्ते सरस्वत्यभि नो नेषि वस्य इति पुरोरुचं
 कुर्याद्वाग्वै॥२५॥

सरस्वती वाचैवैनमति प्र युङ्क्ते मा त्वत्क्षेत्राण्यरंणानि
 गन्मेत्याह मृत्योर्वै क्षेत्राण्यरंणानि तेनैव मृत्योः क्षेत्राणि न
 गच्छति पूर्णान्ग्रहान्गृहीयादामयाविनः प्राणान् वा एतस्य
 शुगृच्छति यस्यामयति प्राणा ग्रहाः प्राणानेवास्य शुचो
 मुञ्चत्युत यदीतासुर्भवति जीवत्येव पूर्णान्ग्रहान्गृहीयाद्यर्हि
 पर्जन्यो न वर्षेत्प्राणान् वा एतर्हि प्रजानां शुगृच्छति

यर्हि पुर्जन्यो न वर्षति प्राणा ग्रहाः प्राणानेव प्रजानां
शुचो मुञ्चति ताजकप्र वर्षति॥२६॥

प्रमीयेत मनुष्यं ऋध्यते यस्य पिता पितामहः पुण्यो वाग्वा एव

पूर्णान्ग्रहान्यश्चविंशतिश्च॥७॥ [७]

गायत्रो वा ऐन्द्रवायवो गायत्रम्प्रायणीयमहस्तस्मात्प्रायणीये-
ऽहन्नैन्द्रवायवो गृह्यते स्व एवैनमायतने गृह्णाति त्रैष्टुभो
वै शुक्रस्त्रैष्टुभं द्वितीयमहस्तस्माद्वितीयेऽहञ्छुक्रो गृह्यते
स्व एवैनमायतने गृह्णाति जागंतो वा आग्रयणो जागंतं
तृतीयमहस्तस्मात्तृतीयेऽहन्नाग्रयणो गृह्यते स्व एवैनमायतने
गृह्णात्येतद्वै॥२७॥

यज्ञमापद्यच्छन्दाः स्याप्रोति यदाग्रयणः श्वो गृह्यते
यत्रैव यज्ञमदृशन्तत एवैनम्पुनः प्र युङ्क्ते जगन्मुखो वै
द्वितीयस्त्रिरात्रो जागंत आग्रयणो यच्चतुर्थेऽहन्नाग्रयणो गृह्यते
स्व एवैनमायतने गृह्णात्यथो स्वमेव छन्दोऽनु पर्यावर्तन्ते
राथंतरो वा ऐन्द्रवायवो राथंतरम्पश्चममहस्तस्मात्पश्चमे-
ऽहन्न॥२८॥

ऐन्द्रवायवो गृह्यते स्व एवैनमायतने गृह्णाति बारहतो

वै शुक्रो बार्हतः५ षष्ठमहस्तस्मात्षष्ठेऽहञ्छुक्रो गृह्यते स्व
 एवैनमायतने गृह्णात्येतद्वै द्वितीयं यज्ञमापद्यच्छन्दाः स्याप्रोति
 यच्छुक्रः श्वो गृह्यते यत्रैव यज्ञमदृशन्तत एवैनम्पुनः प्र युङ्क्ते
 त्रिष्टुङ्मुखो वै तृतीयस्त्रिरात्रस्त्रैष्टुभः॥२९॥

शुक्रो यथ्सप्तमेऽहञ्छुक्रो गृह्यते स्व एवैनमायतने
 गृह्णात्यथो स्वमेव छन्दोऽनु पर्यावर्तन्ते वाग्वा आग्रयणो
 वागष्टममहस्तस्मादष्टमेऽहन्नाग्रयणो गृह्यते स्व एवैनमायतने
 गृह्णाति प्राणो वा ऐन्द्रवायवः प्राणो नवममहस्तस्मान्नवमे-
 ऽहन्नैन्द्रवायवो गृह्यते स्व एवैनमायतने गृह्णात्येतत्॥३०॥

वै तृतीयं यज्ञमापद्यच्छन्दाः स्याप्रोति यदैन्द्रवायवः
 श्वो गृह्यते यत्रैव यज्ञमदृशन्तत एवैनम्पुनः प्र युङ्क्तेऽथो
 स्वमेव छन्दोऽनु पर्यावर्तन्ते पथो वा एतेऽध्यपथेन यन्ति
 येऽन्येनैन्द्रवायवात्प्रतिपद्यन्तेऽन्तः खलु वा एष यज्ञस्य
 यदृशममहर्दशमेऽहन्नैन्द्रवायवो गृह्यते यज्ञस्य॥३१॥

एवान्तं गत्वापथात्पन्थामपि यन्त्यथो यथा वहीयसा
 प्रतिसारं वहन्ति तादृगेव तच्छन्दाः स्यन्योन्यस्य
 लोकमभ्यध्यायन्तान्येतेनैव देवा व्यवाहयन्नैन्द्रवायवस्य

वा ए॒तदा॒यत॑नं॒ यच्च॑तु॒र्थम॑ह॒स्तस्मि॑न्नाग्र॒य॒णो गृ॑ह्यते
तस्मा॑दाग्र॒य॒णस्या॒यत॑ने न॒वमे॑ऽह॒नैन्द्र॑वा॒यवो गृ॑ह्यते शु॒क्रस्य॑
वा ए॒तदा॒यत॑नं॒ यत्प॑ञ्च॒मम्॥ ३२॥

अ॒ह॒स्तस्मि॑न्नैन्द्र॒वा॒यवो गृ॑ह्यते॒ तस्मा॑दैन्द्र॒वा॒यव॑स्या॒यत॑ने
सप्त॑मेऽह॒ज्छु॒क्रो गृ॑ह्यत आग्र॒य॒णस्य॑ वा ए॒तदा॒यत॑नं
यत्ष॑ष्ठम॒ह॒स्तस्मि॑ज्छु॒क्रो गृ॑ह्यते॒ तस्मा॑ज्छु॒क्रस्या॒यत॑नेऽष्ट॑मे-
ऽह॒न्नाग्र॑य॒णो गृ॑ह्यते॒ छन्दा॑स्ये॒व तद्वि॑ वा॒हय॑ति॒ प्र व॑स्य॒सो
विवा॑हमा॒प्नोति॑ य ए॒वं वेदा॑थो दे॒वता॑भ्य ए॒व य॒ज्ञे सं॒विदं॑
दधा॑ति॒ तस्मा॑दिद॒मन्यो॑न्यस्मै द॒दाति॥ ३३॥

ए॒तद्वै प॑ञ्चमेऽह॒नैष्ट॑म॒ एतद्गृ॑ह्यते॒ य॒ज्ञस्य॑ प॒ञ्चम॑न्यस्मा॒ एक॑ञ्च॥ ८॥ [८]

प्र॒जाप॑तिर॒काम॑यत॒ प्र जा॑येयेति॒ स ए॒तं द्वा॑दशरा॒त्रम॑पश्य॒त्तम॑
ततो॒ वै स प्रा॑जायत॒ यः का॑मये॒त् प्र जा॑येयेति॒ स द्वा॑दशरा॒त्रेण॑
यजे॑त् प्रै॒व जा॑यते॒ ब्रह्म॑वा॒दिनो॑ वदन्त्यग्नि॒ष्टोम॑प्रा॒यणा॑ य॒ज्ञा
अथ॑ कस्मा॑दतिरा॒त्रः पूर्॒वः प्र यु॑ज्यत॒ इति॑ चक्षु॒षी वा ए॒ते
य॒ज्ञस्य॑ यदतिरा॒त्रौ क॒नीनि॑के अग्नि॒ष्टोमो॑ यत्॥ ३४॥

अ॒ग्नि॒ष्टोमं॑ पूर्॒वम्प्र॑यु॒ञ्जीर॑न्ब॒हिर्धा॑ क॒नीनि॑के दध्यु॒स्तस्मा॑दतिरा॒त्रः
पूर्॒वः प्र यु॑ज्यते॒ चक्षु॒षी ए॒व य॒ज्ञे धि॒त्वा म॑ध्यतः क॒नीनि॑के

प्रति॑ दधति॒ यो वै गा॑य॒त्रीं ज्योतिः॑पक्षां वेद॒ ज्योति॑षा भा॒सा
सु॑व॒र्गं लो॒कमे॑ति॒ याव॑ग्नि॒ष्टोमौ तौ प॒क्षौ येऽन्त॑रेऽष्टावु॒क्थ्याः
स आ॒त्मैषा वै गा॑य॒त्री ज्योतिः॑पक्षा॒ य ए॒वं वेद॒ ज्योति॑षा
भा॒सा सु॑व॒र्गं लो॒कम्॥ ३५॥

ए॒ति प्र॒जाप॑तिर्वा ए॒ष द्वा॑दश॒धा विहि॑तो यद्वा॑दशरा॒त्रो
याव॑तिरा॒त्रौ तौ प॒क्षौ येऽन्त॑रेऽष्टावु॒क्थ्याः स आ॒त्मा
प्र॒जाप॑तिर्वावैष सन्ध॒सद्ध॒ वै स॒त्रेण॑ स्पृ॒णोति प्रा॒णा वै
सत्प्रा॒णाने॒व स्पृ॒णोति॑ सर्वा॑सां वा ए॒ते प्र॒जानां॑ प्रा॒णैरा॑सते
ये स॒त्रमा॑सते॒ तस्मा॑त्पृच्छन्ति॒ किमे॒ते स॒त्रिण॒ इति॑ प्रि॒यः
प्र॒जाना॑मु॒त्थि॑तो भवति॒ य ए॒वं वेद॑॥ ३६॥

अ॒ग्नि॒ष्टोमौ यथ्सु॑व॒र्गल्लो॒कं प्रि॒यः प्र॒जाना॑म्पञ्चं च॥ १॥ [९]

न वा ए॒षोऽन्य॑तो॒ वैश्वान॑रः सुव॒र्गाय॑ लो॒काय॒ प्राभ॑वद्दु॒र्ध्वो
ह॒ वा ए॒ष आ॑त॒त आसी॑त्ते दे॒वा ए॒तं वैश्वान॑रं
पर्यो॑हन्धसुव॒र्गस्य॑ लो॒कस्य॒ प्रभू॑त्या ऋ॒तवो॒ वा ए॒तेन॑
प्र॒जाप॑तिमयाजयन्तेष्वो॒र्ध्वोदधि॑ तदु॒धोति॑ ह॒ वा ऋ॒त्विक्षु॑ य
ए॒वं वि॒द्वान्द्वा॑दशा॒हेन॒ यज॑न्ते॒ तेऽस्मि॑न्नेच्छन्त॒ स र॑स॒महं॑
वस॒न्ताय॒ प्राय॑च्छत्॥ ३७॥

यवं ग्रीष्मायौषधीर्वर्षाभ्यो ब्रीहीञ्छुरदे माषतिलौ
 हैमन्तशिशिराभ्यान्तेनेन्द्र प्रजापतिरयाजयत्ततो वा
 इन्द्र इन्द्रोऽभवत्तस्मादाहुरानुजावरस्य यज्ञ इति स
 ह्येतेनाग्रेऽयंजतैष ह वै कुणपमत्ति यः सत्रे प्रतिगृह्णाति
 पुरुषकुणपमंश्चकुणपङ्गौर्वा अन्नं येन पात्रेणान्मिभ्रति यत्तन्न
 निर्णेनिजति ततोऽधि॥३८॥

मलं जायत एक एव यजेतैको हि प्रजापतिराध्रोद्वादश
 रात्रीर्दीक्षितः स्याद्वादश मासाः संवत्सरः संवत्सरः प्रजापतिः
 प्रजापतिर्वैष एष ह त्वै जायते यस्तपसोऽधि जायते चतुर्धा
 वा एतास्तिस्त्रिस्त्रिंशो रात्रयो यद्वादशोपसदो याः प्रथमा यज्ञं
 ताभिः सम्भरति या द्वितीया यज्ञं ताभिरा रभते॥३९॥

यास्तृतीयाः पात्राणि ताभिर्निर्णेनित्ते याश्चतुर्थीरपि
 ताभिरात्मानमन्तरतः शुन्यते यो वा अस्य पशुमत्ति
 मा५स५ सोऽत्ति यः पुरोडाशंमस्तिष्क५ स यः
 परिवापम्पुरीष५ स य आज्यंमज्जान५ स यः सोम५
 स्वेद५ सोऽपि ह वा अस्य शीर्षण्या निष्पदः प्रति गृह्णाति
 यो द्वादशाहे प्रतिगृह्णाति तस्माद्द्वादशाहेन न याज्यंमप्यप्मनो

व्यावृत्त्यै॥४०॥

अयच्छुदधिं रभते द्वादशाहेन चत्वारि च॥10॥_____ [१०]

एकस्मै स्वाहा द्वाभ्यां स्वाहा त्रिभ्यः स्वाहा चतुर्भ्यः
स्वाहा पञ्चभ्यः स्वाहा षड्भ्यः स्वाहा सप्तभ्यः स्वाहा ऽष्टाभ्यः
स्वाहा नवभ्यः स्वाहा दशभ्यः स्वाहैकादशभ्यः स्वाहा
द्वादशभ्यः स्वाहा त्रयोदशभ्यः स्वाहा चतुर्दशभ्यः स्वाहा
पञ्चदशभ्यः स्वाहा षोडशभ्यः स्वाहा सप्तदशभ्यः स्वाहा-
ऽष्टादशभ्यः स्वाहैकान्न विंशत्यै स्वाहा नवविंशत्यै
स्वाहैकान्न चत्वारिंशते स्वाहा नवचत्वारिंशते स्वाहैकान्न
षष्ठ्यै स्वाहा नवषष्ठ्यै स्वाहैकान्नाशीत्यै स्वाहा नवाशीत्यै
स्वाहैकान्न शताय स्वाहा शताय स्वाहा द्वाभ्यां शताभ्यां
स्वाहा सर्वस्मै स्वाहा॥४१॥

नवचत्वारिंशते स्वाहैकान्नैकविंशतिश्च॥11॥_____ [११]

एकस्मै स्वाहा त्रिभ्यः स्वाहा पञ्चभ्यः स्वाहा सप्तभ्यः
स्वाहा नवभ्यः स्वाहैकादशभ्यः स्वाहा त्रयोदशभ्यः स्वाहा
पञ्चदशभ्यः स्वाहा सप्तदशभ्यः स्वाहैकान्न विंशत्यै
स्वाहा नवविंशत्यै स्वाहैकान्न चत्वारिंशते स्वाहा

नवचत्वारिंशते स्वाहैकान्न षष्ठ्यै स्वाहा नवषष्ठ्यै
 स्वाहैकान्नाशीत्यै स्वाहा नवाशीत्यै स्वाहैकान्न शताय स्वाहा
 शताय स्वाहा सर्वस्मै स्वाहा॥४२॥

एकस्मै त्रिभ्यः पञ्चाशत्॥१२॥

[१२]

द्वाभ्यां स्वाहा चतुर्भ्यः स्वाहा षड्भ्यः स्वाहाऽष्टाभ्यः
 स्वाहा दशभ्यः स्वाहा द्वादशभ्यः स्वाहा चतुर्दशभ्यः
 स्वाहा षोडशभ्यः स्वाहाऽष्टादशभ्यः स्वाहा विंशत्यै
 स्वाहाऽष्टानवत्यै स्वाहा शताय स्वाहा सर्वस्मै स्वाहा॥४३॥

द्वाभ्यामष्टानवत्यै षड्विंशतिः॥१३॥

[१३]

त्रिभ्यः स्वाहा पञ्चभ्यः स्वाहा सप्तभ्यः स्वाहा नवभ्यः
 स्वाहैकादशभ्यः स्वाहा त्रयोदशभ्यः स्वाहा पञ्चदशभ्यः
 स्वाहा सप्तदशभ्यः स्वाहैकान्न विंशत्यै स्वाहा नवविंशत्यै
 स्वाहैकान्न चत्वारिंशते स्वाहा नवचत्वारिंशते स्वाहैकान्न
 षष्ठ्यै स्वाहा नवषष्ठ्यै स्वाहैकान्नाशीत्यै स्वाहा नवाशीत्यै
 स्वाहैकान्न शताय स्वाहा शताय स्वाहा सर्वस्मै स्वाहा॥४४॥

त्रिभ्योऽष्टचत्वारिंशत्॥१४॥

[१४]

चतुर्भ्यः स्वाहाऽष्टाभ्यः स्वाहा द्वादशभ्यः स्वाहा षोडशभ्यः

स्वाहा॑ वि॒ंश॒त्यै स्वाहा॑ षण्ण॑वत्यै स्वाहा॑ श॒ताय॑ स्वाहा॑
सर्व॑स्मै स्वाहा॑॥४५॥

चतु॑र्भ्यः षण्ण॑वत्यै षोड॑श॥15॥ [१५]

प॒ञ्चभ्यः॑ स्वाहा॑ द॒शभ्यः॑ स्वाहा॑ प॒ञ्चद॒शभ्यः॑ स्वाहा॑
वि॒ंश॒त्यै स्वाहा॑ प॒ञ्चन॑वत्यै स्वाहा॑ श॒ताय॑ स्वाहा॑ सर्व॑स्मै
स्वाहा॑॥४६॥

प॒ञ्चभ्यः॑ प॒ञ्चन॑वत्यै चतु॑र्दश॥16॥ [१६]

द॒शभ्यः॑ स्वाहा॑ वि॒ंश॒त्यै स्वाहा॑ त्रि॒ंश॒ते स्वाहा॑
चत्वारि॒ंश॒ते स्वाहा॑ प॒ञ्चा॒श॒ते स्वाहा॑ ष॒ष्ठ्यै स्वाहा॑ सप्त॑त्यै
स्वाहा॑ऽशी॒त्यै स्वाहा॑ न॒व॒त्यै स्वाहा॑ श॒ताय॑ स्वाहा॑ सर्व॑स्मै
स्वाहा॑॥४७॥

द॒शभ्यो॑ द्वावि॒ंश॒तिः॥17॥ [१७]

वि॒ंश॒त्यै स्वाहा॑ चत्वारि॒ंश॒ते स्वाहा॑ ष॒ष्ठ्यै स्वाहा॑ऽशी॒त्यै
स्वाहा॑ श॒ताय॑ स्वाहा॑ सर्व॑स्मै स्वाहा॑॥४८॥

वि॒ंश॒त्यै द्वाद॑श॥18॥ [१८]

प॒ञ्चा॒श॒ते स्वाहा॑ श॒ताय॑ स्वाहा॑ द्वाभ्या॑ं श॒ताभ्या॑ं स्वाहा॑

त्रिभ्यः शतेभ्यः स्वाहा चतुर्भ्यः शतेभ्यः स्वाहा पञ्चभ्यः
 शतेभ्यः स्वाहा षड्भ्यः शतेभ्यः स्वाहा सप्तभ्यः शतेभ्यः स्वाहा-
 ऽष्टाभ्यः शतेभ्यः स्वाहा नवभ्यः शतेभ्यः स्वाहा सहस्राय
 स्वाहा सर्वस्मै स्वाहा॥४९॥

पञ्चाशते द्वात्रिंशत्॥१९॥ [१९]

शताय स्वाहा सहस्राय स्वाहाऽयुताय स्वाहा
 नियुताय स्वाहा प्रयुताय स्वाहाऽर्बुदाय स्वाहा न्यर्बुदाय
 स्वाहा समुद्राय स्वाहा मध्याय स्वाहाऽन्ताय स्वाहा
 परार्धाय स्वाहोषसे स्वाहा व्युष्ट्यै स्वाहोदेष्ट्यते स्वाहोद्यते
 स्वाहोदिताय स्वाहा सुवर्गाय स्वाहा लोकाय स्वाहा
 सर्वस्मै स्वाहा॥५०॥

शतायाष्टात्रिंशत्॥२०॥ [२०]

प्रजवं ब्रह्मवादिनः किमेष वा आत्त आदित्या उभयोः प्रजापतिरन्वायन्निन्द्रो वै सृष्टिन्द्रो वै
 शिथिलः प्रजापतिरकामयतान्नादः सा विराडसावादित्योऽर्वाङ्मता मेऽग्निना स्वाहाधिन्द्रोऽऽयेताय
 कृष्णायोषधीभ्यो वनस्पतिभ्यो विंशतिः॥२०॥ प्रजवं प्रजापतिर्यदंछन्दोमन्तं हुवे सवाहमोषधीभ्यो
 द्विचत्वारिंशत्॥४२॥ प्रजव सर्वस्मै स्वाहा॥ [२१]

॥तृतीयः प्रश्नः॥

॥तैत्तिरीयसंहितायां सप्तमकाण्डे तृतीयः प्रश्नः॥

प्रजवं वा एतेन यन्ति यद्वंशममहः पापावहीयं वा एतेन भवन्ति यद्वंशममहुर्यो वै प्रजवं यतामपथेन प्रतिपद्यते यः स्थाणुः हन्ति यो भेषं न्येति स हीयते स यो वै दशमेऽहन्नविवाक्य उपहन्यते स हीयते तस्मै य उपहताय व्याहृतमेवान्वारभ्य समंश्नुतेऽथ यो व्याहृतः सः॥१॥

हीयते तस्माद्वशमेऽहन्नविवाक्य उपहताय न व्युच्यमथो खल्वाहुर्यज्ञस्य वै समृद्धेन देवाः सुवर्गं लोकमायन् यज्ञस्य व्युद्धेनासुरान्पराभावयन्निति यत्खलु वै यज्ञस्य समृद्धं तद्यजमानस्य यद्वृद्धं तद्भ्रातृव्यस्य स यो वै दशमेऽहन्नविवाक्य उपहन्यते स एवाति रेचयति ते ये बाह्या दृशीकवः॥२॥

स्युस्ते वि ब्रूयुर्यदि तत्र न विन्देयुरन्तःसदसाद्बुच्यं यदि तत्र न विन्देयुर्गृहपतिना व्युच्यन्तद्बुच्यमेवाथ वा एतत्सर्पराज्ञिया ऋग्भिः स्तुवन्तीयं वै सर्पतो राज्ञी यद्वा अस्यां किं चार्चन्ति यदानृचुस्तेनेयः सर्पराज्ञी ते यदेव किं

च वाचानृचुर्यदतोऽध्यर्चितारः॥३॥

तदुभयमाप्त्वावरुध्योत्तिष्ठामेति ताभिर्मनसा स्तुवते न वा
इमामंश्वरथो नाश्वतररीरथः सद्यः पर्याप्तुमर्हति मनो वा
इमां सद्यः पर्याप्तुमर्हति मनः परिभवितुमथ ब्रह्म वदन्ति
परिमिता वा ऋचः परिमितानि सामानि परिमितानि
यजूंष्यथैतस्यैवान्तो नास्ति यद्वह्न्य तत्प्रतिगृणत आ
चक्षीत स प्रतिगुरः॥४॥

व्याह स दृशीकवोऽर्चितारः स एकश्च॥१॥ [१]

ब्रह्मवादिनो वदन्ति किं द्वादशाहस्य प्रथमेनाहृत्विजां
यजमानो वृद्ध इति तेज इन्द्रियमिति किं द्वितीयेनेति
प्राणानन्नाद्यमिति किं तृतीयेनेति त्रीणिमाल्लोणकानिति
किं चतुर्थेनेति चतुष्पदः पशूनिति किम्पञ्चमेनेति
पञ्चाक्षराम्पङ्क्तिमिति किं षष्ठेनेति षडृतूनिति किं
सप्तमेनेति सप्तपदां शक्वरीमिति॥५॥

किमष्टमेनेत्यष्टाक्षरां गायत्रीमिति किं नवमेनेति
त्रिवृतं स्तोममिति किं दशमेनेति दशाक्षरां विराजमिति
किमेकादशेनेत्येकादशाक्षरां त्रिष्टुभमिति किं द्वादशेनेति

द्वादशाक्षरां जगतीमित्येतावद्वा अस्ति यावदेतद्यावदेवास्ति
तदेषां वृद्धे ॥ ६ ॥

शक्ररीमित्येकचत्वारिंशच्च ॥ २ ॥ [२]

एष वा आसौ द्वादशाहो यत्रयोदशरात्रः समानः
ह्येतदहुर्यत्प्रायणीयश्चोदयनीयश्च त्र्यतिरात्रो भवति त्रयं
इमे लोका एषां लोकानामाप्त्यै प्राणो वै प्रथमोऽतिरात्रो
व्यानो द्वितीयोऽपानस्तृतीयः प्राणापानोदानेष्वेवान्नाद्ये प्रति
तिष्ठन्ति सर्वमायुर्यन्ति य एवं विद्वांसस्रयोदशरात्रमासते
तदाहुर्वाग्वा एषा वितता ॥ ७ ॥

यद्वादशाहस्तां विच्छिन्द्युर्मध्येऽतिरात्रं कुर्युरुपदासुका
गृहपतेर्वाकस्यादुपरिष्ठाच्छन्दोमानांममहाव्रतं कुर्वन्ति
संततामेव वाचमव रुद्धतेऽनुपदासुका गृहपतेर्वाग्भवति
पशवो वै छन्दोमा अन्नममहाव्रतं यदुपरिष्ठाच्छन्दोमानां-
ममहाव्रतं कुर्वन्ति पशुषु चैवान्नाद्ये च प्रति तिष्ठन्ति ॥ ८ ॥

वितता त्रिचत्वारिंशच्च ॥ ३ ॥ [३]

आदित्या अकामयन्तोभयोर्लोकयोर्ऋध्रुयामेति त
एतं चतुर्दशरात्रमपश्यन्तमाहरन्तेनायजन्त ततो वै

त उ॒भयो॑र्लो॒कयो॑रार्ध्व॒वन्न॒स्मि॑श्च॒ामुष्मि॑श्च॒ य ए॒वं
वि॒द्वा॑संश्चतु॒र्दश॒रात्र॒मास॑त उ॒भयो॑रे॒व लो॒कयो॑र्ऋ॒ध्रुव॑न्त्य॒-
स्मि॑श्च॒ामुष्मि॑श्च॒ चतु॒र्दश॒रात्रो॑ भ॒वति॑ स॒प्त ग्राम्या॑ ओष॑धयः
स॒प्तार॒ण्या उ॒भयो॑षाम॒व॑रु॒द्धौ यत्प॑रा॒चीना॑नि पृ॒ष्ठानि॑॥९॥

भव॑न्त्य॒मुमे॒व तैर्लो॒कम॒भि ज॑यन्ति॒ यत्प्र॑ती॒चीना॑नि पृ॒ष्ठानि॑
भव॑न्ती॒ममे॒व तैर्लो॒कम॒भि ज॑यन्ति॒ त्रय॑स्त्रि॒शौ म॑ध्य॒तः स्तोमौ॑
भव॑तः॒ साम्रा॑ज्यमे॒व ग॑च्छ॒न्त्यधि॑रा॒जौ भ॑वतोऽधि॒राजा॑ ए॒व
स॑मा॒नाना॑ भवन्त्यति॒रात्रा॑व॒भितो॑ भवतः॒ परि॑गृहीत्यै॥१०॥

पृष्ठानि चतुस्त्रिंशच्च॥४॥ [४]

प्र॒जाप॑तिः सु॒व॒र्गं लो॒कमै॑त्तं दे॒वा अ॒न्वाय॑न्ताना॑दि॒त्याश्च॑
प॒शव॑श्चा॒न्वाय॑न्ते दे॒वा अ॑ब्रुवन् या॒न्प॒शून्पा॒र्जीवि॑ष्म॒
त इ॒मेऽन्वा॑ग्म॒न्निति॑ तेभ्य॑ ए॒तं च॑तु॒र्दश॒रात्र॒म्प्रत्यौ॑ह॒न्त
आ॑दि॒त्याः पृ॒ष्ठैः सु॒व॒र्गं लो॒कमा॑रोह॒त्र्यहा॑भ्या॒मस्मि॑ल्लो॒के
प॒शून्प्रत्यौ॑ह॒न्पृ॒ष्ठैरा॑दि॒त्या अ॒मुष्मि॑ल्लो॒क आ॑र्ध्व॒व॒त्र्यहा॑भ्या॒मस्मि॑न्॥

लो॒के प॒शवो॑ य ए॒वं वि॒द्वा॑संश्चतु॒र्दश॒रात्र॒मास॑त उ॒भयो॑रे॒व
लो॒कयो॑र्ऋ॒ध्रुव॑न्त्य॒स्मि॑श्च॒ामुष्मि॑श्च॒ पृ॒ष्ठैरे॒वामुष्मि॑ल्लो॒क
ऋ॒ध्रुव॑न्ति॒ त्र्यहा॑भ्या॒मस्मि॑ल्लो॒के ज्योति॑र्गौरा॒युरिति॑ त्र्य॒हो

भवती॒यं वाव॑ ज्योति॑र॒न्तरि॑क्षं गौर॒सावायु॑रि॒माने॒व
लो॒कान॒भ्यारो॑हन्ति॒ यदन्य॑तः पृ॒ष्ठानि॒ स्युर्वि॑विवधः
स्या॒न्मध्ये॑ पृ॒ष्ठानि॑ भवन्ति॒ सविवध॑त्वाय॥१२॥

ओजो॒ वै वी॒र्य॑म्पृ॒ष्ठान्यो॑ज ए॒व वी॒र्य॑म्मध्य॒तो द॑धते
बृ॒हद्रथ॑न्त॒राभ्यां॑ यन्ती॒यं वाव॑ र॒थन्त॑रम॒सौ बृ॒हदा॑भ्यामे॒व
य॒न्त्यथो॑ अनयो॒रेव॑ प्रति॒ तिष्ठ॑न्त्येते॒ वै यज्ञ॑स्या॒ञ्जसाय॑नी
स्रु॒ती ताभ्या॑मे॒व सु॒वर्गं॑ लो॒कं य॑न्ति॒ परा॑श्चो॒ वा ए॒ते
सु॒वर्गं॑ लो॒कम॒भ्यारो॑हन्ति॒ ये परा॑चीना॒नि पृ॒ष्ठान्यु॑प॒यन्ति॑
प्र॒त्यङ्मु॒हो भ॑वति॒ प्र॒त्यव॑रूढ्या॒ अथो॒ प्रति॑ष्ठित्या
उ॒भयो॑र्लो॒कयोर्ऋ॑द्धोत्तिष्ठन्ति॒ चतु॑र्दशै॒तास्ता॑सां॒ या
दश॒ दशा॑क्षरा॒ वि॒राडन्नं॑ वि॒राड्वि॒राजै॒वान्नाद्य॑म॒व रु॑न्धते
याश्च॑त॒स्रश्च॑त॒स्रो दि॒शो दि॒क्ष्वे॒व प्रति॑ तिष्ठन्त्यति॒रात्रा॑व॒भितो॑
भवतुः॒ परि॑गृहीत्यै॥१३॥

आर्ध्व॑व॒त्र्यहा॑भ्याम॒स्मिन्स॑विवध॒त्वाय॑ प्रति॑ष्ठित्या॒ एक॑त्रि॒ंशच्च॑॥५॥ [५]

इन्द्रो॒ वै स॒दृङ्दे॒वता॑भिरासी॒त्स न॒ व्या॒वृ॒तम॑गच्छ॒त्स
प्र॒जाप॑ति॒मुपा॑धाव॒त्तस्मा॑ ए॒तम्प॑ञ्चदशरा॒त्रम्प्रा॑यच्छ॒त्तमा॑हर॒त्
तेना॑यजत॒ ततो॒ वै सो॑ऽन्याभिर्दे॒वता॑भिर्व्या॒वृ॒तम॑गच्छ॒द्य

ए॒वं वि॒द्वा॑सः प॒ञ्चद॑शरा॒त्रमा॑स॒ते व्या॒वृ॒तमे॒व पा॒प्मना॒
भ्रातृ॑व्येण गच्छन्ति॒ ज्योति॒र्गौरा॒युरिति॑ त्र्य॒हो भ॑वती॒यं वा॒व
ज्योति॑रन्तरिक्षम्॥१४॥

गौर॑सावायु॒रेष्वे॒व लो॒केषु॒ प्रति॑ तिष्ठन्त्यस॒त्रं वा
ए॒तद्य॑दच्छन्दो॒मं यच्छ॑न्दो॒मा भ॑वन्ति॒ तेन॑ स॒त्रं दे॒वता॑
ए॒व पृ॒ष्ठैर॑व॒ रुन्ध॑ते प॒शूच्छ॑न्दो॒मैरो॒जो वा वी॒र्य॑म्पृ॒ष्ठानि॑
प॒शव॑श्छन्दो॒मा ओज॑स्ये॒व वी॒र्यं प॒शुषु॒ प्रति॑ तिष्ठन्ति
प॒ञ्चद॑शरा॒त्रो भ॑वति प॒ञ्चद॑शो वज्रो॒ वज्र॑मे॒व भ्रातृ॑व्येभ्यः प्र
ह॑रन्त्यतिरा॒त्राव॑भितो॒ भव॑त इन्द्रि॒यस्य॒ परि॑गृहीत्यै॥१५॥

अ॒न्तरि॑क्षमिन्द्रि॒यस्यै॑कं॥६॥ [६]

इन्द्रो॒ वै शि॑थिल इ॒वाप्र॑तिष्ठित आसीत्सोऽसु॒रेभ्यो॒
ऽबि॒भेत्स प्र॒जाप॑तिमुपा॒धाव॑त्तस्मा॑ ए॒तम्प॑ञ्चदशरा॒त्रं
वज्र॑म्प्रायच्छत् तेनासु॒रान्परा॒भाव्य॑ वि॒जित्य॒ श्रियं॑मगच्छदग्नि॒ष्टुता॑
पा॒प्मानं॒ निर॑दहत प॒ञ्चद॑शरा॒त्रेणो॒जो बल॑मिन्द्रि॒यं
वी॒र्य॑मा॒त्मन्न॑धत्त॒ य ए॒वं वि॒द्वा॑सः प॒ञ्चद॑शरा॒त्रमा॑स॒ते
भ्रातृ॑व्याने॒व प॑रा॒भाव्य॑ वि॒जित्य॒ श्रियं॑ गच्छन्त्यग्नि॒ष्टुता॑
पा॒प्मानं॒ निः॥१६॥

दहन्ते पञ्चदशरात्रेणौजो बलमिन्द्रियं वीर्यमात्मन्दधत
 एता एव पशव्याः पञ्चदश वा अर्धमासस्य रात्रयोऽ-
 र्धमासशः संवत्सर आप्यते संवत्सरम्पशवोऽनु प्र जायन्ते
 तस्मात्पशव्या एता एव सुवर्ग्याः पञ्चदश वा अर्धमासस्य
 रात्रयोऽर्धमासशः संवत्सर आप्यते संवत्सरः सुवर्गो
 लोकस्तस्मात्सुवर्ग्या ज्योतिर्गौरायुरिति त्र्यहो भवतीयं वाव
 ज्योतिरन्तरिक्षम्॥१७॥

गौरसावायुरिमानेव लोकानभ्यारोहन्ति यदन्यतः पृष्ठानि
 स्युर्विविवधः स्यान्मध्ये पृष्ठानि भवन्ति सविवधत्वायौजो
 वै वीर्यम्पृष्ठान्योज एव वीर्यम्मध्यतो दधते बृहद्रथन्तराभ्यां
 यन्तीयं वाव रथन्तरमसौ बृहदाभ्यामेव यन्त्यथो अनयोरेव
 प्रति तिष्ठन्त्येते वै यज्ञस्याञ्जसायनी स्मृती ताभ्यामेव सुवर्गं
 लोकम्॥१८॥

यन्ति पराञ्चो वा एते सुवर्गं लोकमभ्यारोहन्ति
 ये पराचीनानि पृष्ठान्युपयन्ति प्रत्यङ्महो भवति
 प्रत्यवरूढ्या अथो प्रतिष्ठित्या उभयोर्लोकयोर्ऋद्धोत्तिष्ठन्ति
 पञ्चदशैतास्तासां या दश दशाक्षरा विराडन्न विराड्विराजैवान्नाद्य-

मव रुन्धते याः पञ्च पञ्च दिशो दिक्ष्वेव प्रति
तिष्ठन्त्यतिरात्रावभितो भवत इन्द्रियस्य वीर्यस्य प्रजायै
पशूनाम्परिगृहीत्यै॥१९॥

गच्छन्त्यग्निष्टतां पाप्मानन्निरन्तरिक्षल्लोकं प्रजायै द्वे च॥७॥ [७]

प्रजापतिरकामयतान्नादः स्यामिति स एतः
सप्तदशरात्रमपश्यत्तमाहरत्तेनायजत ततो वै सौऽन्नादो-
ऽभवद्य एवं विद्वांसः सप्तदशरात्रमासतेऽन्नादा एव भवन्ति
पञ्चाहो भवति पञ्च वा ऋतवः संवत्सर ऋतुष्वेव संवत्सरे
प्रति तिष्ठन्त्यथो पञ्चाक्षरा पङ्क्तिः पाङ्क्तो यज्ञो यज्ञमेवाव
रुन्धतेऽसत्रं वा एतत्॥२०॥

यदच्छन्दोमं यच्छन्दोमा भवन्ति तेन सत्रं देवता एव पृष्ठैरव
रुन्धते पशूञ्छन्दोमैरोजो वै वीर्यम्पृष्ठानि पशवश्छन्दोमा
ओजस्येव वीर्यं पशुषु प्रति तिष्ठन्ति सप्तदशरात्रो भवति
सप्तदशः प्रजापतिः प्रजापतेरास्यां अतिरात्रावभितो भवतो-
ऽन्नाद्यस्य परिगृहीत्यै॥२१॥

एतत्सत्रिः श्रवः॥८॥ [८]

सा विराङ्गिक्रम्यातिष्ठद्ब्रह्मणा देवेष्वन्नेनासुरेषु ते देवा

अकामयन्तोभयं सं वृञ्जीमहि ब्रह्म चान्नं चेति त एता
 विंशतिं रात्रीरपश्यन्ततो वै त उभयं समवृञ्जत ब्रह्म
 चान्नं च ब्रह्मवर्चसिनोऽन्नादा अभवन् य एवं विद्वांस एता
 आसत उभयमेव सं वृञ्जते ब्रह्म चान्नं च॥२२॥

ब्रह्मवर्चसिनोऽन्नादा भवन्ति द्वे वा एते विराजौ तयोरेव
 नाना प्रति तिष्ठन्ति विंशो वै पुरुषो दश हस्त्या
 अङ्गुलयो दश पद्या यावानेव पुरुषस्तमात्वोत्तिष्ठन्ति
 ज्योतिर्गौरायुरिति त्र्यहा भवन्तीयं वाव ज्योतिरन्तरिक्षं
 गौरसावायुरिमानेव लोकानभ्यारोहन्त्यभिपूर्वं त्र्यहा
 भवन्त्यभिपूर्वमेव सुवर्गम्॥२३॥

लोकमभ्यारोहन्ति यदन्यतः पृष्ठानि स्युर्विविधः
 स्यान्मध्ये पृष्ठानि भवन्ति सविवधत्वायौजो वै
 वीर्यम्पृष्ठान्योज एव वीर्यम्मध्यतो दधते बृहद्रथन्तरा-
 भ्यां यन्तीयं वाव रथन्तरमसौ बृहदाभ्यामेव यन्त्यथो
 अनयोरेव प्रति तिष्ठन्त्येते वै यज्ञस्याञ्जसायनी सुती
 ताभ्यामेव सुवर्गं लोकं यन्ति पराञ्चो वा एते सुवर्गं
 लोकमभ्यारोहन्ति ये पराचीनानि पृष्ठान्युपयन्ति प्रत्यङ्महो

भवति प्रत्यवरूढ्या अथो प्रतिष्ठित्या उभयोर्लोकयोर्
 ऋद्धोत्तिष्ठन्त्यतिरात्रावभितो भवतो ब्रह्मवर्चसस्यान्नाद्यस्य
 परिगृहीत्यै॥ २४॥

वृञ्जते ब्रह्म चान्नश्च सुवर्गमेते सुवर्गत्रयोविंशतिश्च॥९॥ [९]

असावादित्योऽस्मिन्नल्लोक आसीत्तं देवाः पृष्ठैः परिगृह्य
 सुवर्गं लोकमंगमयन्परैरवस्तात्पर्यगृह्णन्दिवाकीर्त्येन सुवर्गे
 लोके प्रत्यस्थापयन्परैः परस्तात्पर्यगृह्णन्पृष्ठैरुपावारोहन्त्स
 वा असावादित्योऽमुष्मिन्नल्लोके परैरुभयतः परिगृहीतो
 यत्पृष्ठानि भवन्ति सुवर्गमेव तैर्लोकं यजमाना यन्ति
 परैरवस्तात्परिं गृह्णन्ति दिवाकीर्त्येन॥ २५॥

सुवर्गे लोके प्रति तिष्ठन्ति परैः परस्तात्परिं
 गृह्णन्ति पृष्ठैरुपावारोहन्ति यत्परं परस्तान्न स्युः पराश्चः
 सुवर्गाल्लोकान्निष्पद्येरन् यदवस्तान्न स्युः प्रजा निर्दहेयुरभितो
 दिवाकीर्त्यम्परःसामानो भवन्ति सुवर्ग एवैनाल्लोक उभयतः
 परि गृह्णन्ति यजमाना वै दिवाकीर्त्यं संवत्सरः
 परःसामानोऽभितो दिवाकीर्त्यम्परः सामानो भवन्ति
 संवत्सर एवोभयतः॥ २६॥

प्रति तिष्ठन्ति पृष्ठं वै दिवाकीर्त्यम्पार्श्वे परः सामानोऽभितो
 दिवाकीर्त्यम्परः सामानो भवन्ति तस्मादभितः पृष्ठम्पार्श्वे
 भूयिष्ठा ग्रहा गृह्यन्ते भूयिष्ठं शस्यते यज्ञस्यैव तन्मध्यतो
 ग्रन्थं ग्रन्थन्त्यविस्रंसाय सप्त गृह्यन्ते सप्त वै शीर्षण्याः
 प्राणाः प्राणानेव यजमानेषु दधति यत्पराचीनानि पृष्ठानि
 भवन्त्यमुमेव तैर्लोकमभ्यारोहन्ति यदिमं लोकं न॥२७॥

प्रत्यवरोहैयुरुद्धा माद्यैयुर्यजमानाः प्र वा मीयेरन्
 यत्पराचीनानि पृष्ठानि भवन्तीममेव तैर्लोकमप्रत्यवरोहन्त्यथो
 अस्मिन्नेव लोके प्रति तिष्ठन्त्यनुन्मादायेन्द्रो वा अप्रतिष्ठित
 आसीत्स प्रजापतिमुपाधावत्तस्मा एतमेकविंशतिरात्रम्प्रायच्छ
 ततो वै स प्रत्यतिष्ठद्ये बहुयाजिनोऽप्रतिष्ठिताः॥२८॥

स्युस्त एकविंशतिरात्रमासीरन्द्वादश मासाः पञ्चर्तवस्त्रय
 इमे लोका असावादित्य एकविंश एतावन्तो वै
 देवलोकास्तेष्वेव यथापूर्वं प्रति तिष्ठन्त्यसावादित्यो न
 व्यरोचत स प्रजापतिमुपाधावत्तस्मा एतमेकविंशति-
 रात्रम्प्रायच्छत्तमाहरत्तेनायजत ततो वै सोऽरोचत य एवं
 विद्वांस एकविंशतिरात्रमासते रोचन्त एवैकविंशतिरात्रो

भवति रुग्वा एकविंशो रुचमेव गच्छन्त्यथो प्रतिष्ठामेव
प्रतिष्ठा ह्येकविंशो-ऽ तिरात्रावभितो भवतो ब्रह्मवर्चसस्य
परिगृहीत्यै॥ २९॥

गृह्णन्ति दिवाकीर्त्यैवोभयतो नाप्रतिष्ठिता आसन्त एकविंशतिश्च॥ 10॥ ——— [१०]

अर्वाङ्गः सं क्रामत्वमुष्मादधि मामभि। ऋषीणां यः
पुरोहितः। निर्देवं निर्वीरं कृत्वा विष्कन्धं तस्मिन् हीयतां
योऽस्मान्द्वेष्टि। शरीरं यज्ञशमलं कुसीदं तस्मिन्सीदतु यो-
ऽस्मान्द्वेष्टि। यज्ञं यज्ञस्य यत्तेजस्तेन सं क्राम मामभि।
ब्राह्मणानृत्विजो देवान् यज्ञस्य तपसा ते सवाहमा हुवे।
इष्टेन पक्वमुप॥ ३०॥

ते हुवे सवाहम्। सन्तै वृञ्जे सुकृतं सं प्रजां
पशून्। प्रैषान्त्सामिधेनीराघारावाज्यभागावाश्रुतम्प्रत्याश्रुतमा
शृणामि ते। प्रयाजानूयाजान्त्स्विष्टकृतमिडामाशिष आ वृञ्जे
सुवः। अग्निनेन्द्रेण सोमेन सरस्वत्या विष्णुना देवताभिः।
याज्यानुवाक्याभ्यामुप ते हुवे स्वाहं यज्ञमा ददे ते वर्षद्वृतम्।
स्तुतं शस्त्रम्प्रतिगरं ग्रहमिडामाशिषः॥ ३१॥

आ वृञ्जे सुवः। पत्नीसंयाजानुप ते हुवे सवाहं

संमिष्टयजुरा ददे तव। पशून्सुतम्पुरोडाशान्सर्वनान्योत
यज्ञम्। देवान्सेन्द्रानुपं ते हुवे सवाहमग्निमुखान्सोमवतो
ये च विश्वे॥३२॥

उप ग्रहमिडांमाशिषो द्वात्रिंशच्च॥११॥ [११]

भूतम्भव्यम्भविष्यद्वषट्स्वाहा नम ऋक्साम
यजुर्वषट्स्वाहा नमो गायत्री त्रिष्टुब्जगती वषट्स्वाहा
नमः पृथिव्यन्तरिक्षं द्यौर्वषट्स्वाहा नमोऽग्निर्वायुः सूर्यो
वषट्स्वाहा नमः प्राणो व्यानोऽपानो वषट्स्वाहा नमोऽन्नं
कृषिर्वृष्टिर्वषट्स्वाहा नमः पिता पुत्रः पौत्रो वषट्स्वाहा
नमो भूर्भुवःसुवर्वषट्स्वाहा नमः॥३३॥

भुवंश्चत्वारि च॥१२॥ [१२]

आ मे गृहा भवन्त्वा प्रजा म आ मां यज्ञो विशतु
वीर्यावान्। आपो देवीर्यज्ञिया मा विशन्तु सहस्रस्य मा
भूमा मा प्र हांसीत्। आ मे ग्रहो भवत्वा पुरोरुक्स्तुतशस्त्रे
मा विशताः समीचीं। आदित्या रुद्रा वसवो मे सदस्याः
सहस्रस्य मा भूमा मा प्र हांसीत्। आ माग्निष्टोमो
विशतूक्थ्यश्चातिरात्रो मा विशत्वापिशर्वरः। तिरोअहिया मा

सुहृता आ विशन्तु सहस्रस्य मा भूमा मा प्र हांसीत्॥३४॥

अग्निष्टोमो विशत्वष्टादश च॥13॥ [१३]

अग्निना तपोऽन्वभवद्वाचा ब्रह्मं मणिना रूपाणीन्द्रेण
देवान् वातेन प्राणान्सूर्येण द्याश्चन्द्रमसा नक्षत्राणि
यमेन पितृनाज्ञा मनुष्यान्फलेन नादेयानजगरेण
सर्पान्व्याघ्रेणारण्यान्पशूञ्छेनेन पतत्रिणो वृष्णाश्चानृषभेण
गा बस्तेनाजा वृष्णिनावीर्त्रीहिणान्त्रानि यवेनौषधीर्न्यग्रोधेन
वनस्पतीनुदुम्बरेणोर्जङ्गायत्रिया छन्दांसि त्रिवृता
स्तोमान्ब्राह्मणेन वाचम्॥३५॥

ब्राह्मणेनैकं च॥14॥ [१४]

स्वाहाधिमाधीताय स्वाहा स्वाहाधीतम्मनसे स्वाहा स्वाहा
मनः प्रजापतये स्वाहा काय स्वाहा कस्मै स्वाहा कतमस्मै
स्वाहादित्यै स्वाहादित्यै मह्यै स्वाहादित्यै सुमृडीकायै स्वाहा
सरस्वत्यै स्वाहा सरस्वत्यै बृहत्यै स्वाहा सरस्वत्यै पावकायै
स्वाहा पूष्णे स्वाहा पूष्णे प्रपथ्याय स्वाहा पूष्णे नरन्धिषाय
स्वाहा त्वष्ट्रे स्वाहा त्वष्ट्रे तुरीपाय स्वाहा त्वष्ट्रे पुरुरूपाय
स्वाहा विष्णवे स्वाहा विष्णवे निखुर्यपाय स्वाहा विष्णवे

निभूयपाय स्वाहा सर्वस्मै स्वाहा॥३६॥

पुरुर्ूपाय स्वाहा दशं च॥15॥ [१५]

दद्ध्यः स्वाहा हनू॑भ्या॒५ स्वाहो॑ष्ठा॒भ्या॒५ स्वाहा मुखा॑य
स्वाहा नासिका॑भ्या॒५ स्वाहाक्षी॑भ्या॒५ स्वाहा कर्णा॑भ्या॒५
स्वाहा पार इक्षवो॑ऽवार्ये॑भ्यः पक्ष्म॑भ्यः स्वाहा॑वार इक्षवः
पार्ये॑भ्यः पक्ष्म॑भ्यः स्वाहा शीर्ष्णे स्वाहा॑ भ्रू॒भ्या॒५ स्वाहा
ल॒लाटा॑य स्वाहा मूर्ध्ने स्वाहा म॒स्तिष्का॑य स्वाहा केशे॑भ्यः
स्वाहा वहा॑य स्वाहा॑ ग्री॒वाभ्यः स्वाहा॑ स्क॒न्धेभ्यः स्वाहा
की॒र्कसा॑भ्यः स्वाहा॑ पृ॒ष्ठीभ्यः स्वाहा॑ पाज॒स्याय स्वाहा॑
पा॒र्श्वाभ्या॒५ स्वाहा॑॥३७॥

अ॒५सा॑भ्या॒५ स्वाहा दोष॑भ्या॒५ स्वाहा बा॒हुभ्या॒५
स्वाहा जङ्घा॑भ्या॒५ स्वाहा श्रोणी॑भ्या॒५ स्वाहो॑रुभ्या॒५
स्वाहा॑ष्ठीवद्भ्या॒५ स्वाहा जङ्घा॑भ्या॒५ स्वाहा भ॒सदे स्वाहा॑
शिख॑ण्डेभ्यः स्वाहा॑ वाल॒धाना॑य स्वाहा॑ण्डाभ्या॒५ स्वाहा
शेपा॑य स्वाहा॑ रेत॑से स्वाहा॑ प्र॒जाभ्यः स्वाहा॑ प्र॒जन॑नाय
स्वाहा॑ प॒द्भ्यः स्वाहा॑ श॒फेभ्यः स्वाहा॑ लोम॑भ्यः स्वाहा॑
त्व॒चे स्वाहा॑ लोहि॑ताय स्वाहा॑ मा॒५साय स्वाहा॑ स्नाव॑भ्यः

स्वाहास्थभ्यः स्वाहा मञ्जभ्यः स्वाहाङ्गैभ्यः स्वाहात्मने स्वाहा
सर्वस्मै स्वाहा॥३८॥

पार्श्वभ्यां स्वाहा मञ्जभ्यः स्वाहा षट्॥१६॥

अ॒ञ्जे॒ताय॒ स्वाहा॑ञ्जि॒स॒क्थाय॒ स्वाहा॑ शि॒ति॒पदे॒ स्वाहा॑
शि॒ति॒क॒कुदे॒ स्वाहा॑ शि॒ति॒र॒न्ध्राय॒ स्वाहा॑ शि॒ति॒पृ॒ष्ठाय॒
स्वाहा॑ शि॒त्य॒साय॒ स्वाहा॑ पु॒ष्प॒कर्णाय॒ स्वाहा॑ शि॒त्यो॒ष्ठाय॒
स्वाहा॑ शि॒ति॒भ्रवे॒ स्वाहा॑ शि॒ति॒भ॒सदे॒ स्वाहा॑ श्वे॒तानू॒काशाय॒
स्वाहा॑ञ्जये॒ स्वाहा॑ ल॒लामाय॒ स्वाहा॑सि॒त॒ज्ञवे॒ स्वाहा॑
कृ॒ष्णै॒ताय॒ स्वाहा॑ रोहि॒तै॒ताय॒ स्वाहा॑रु॒णै॒ताय॒ स्वाहा॑दृ॒शाय॒
स्वाहा॑ की॒दृशाय॒ स्वाहा॑ ता॒दृशाय॒ स्वाहा॑ स॒दृशाय॒ स्वाहा॑
वि॒स॒दृशाय॒ स्वाहा॑ सु॒स॒दृशाय॒ स्वाहा॑ रू॒पाय॒ स्वाहा॑ सर्व॑स्मै
स्वाहा॑॥३९॥

रूपाय स्वाहा द्वे च॥१७॥

कृ॒ष्णाय॒ स्वाहा॑ श्वे॒ताय॒ स्वाहा॑ पि॒शंगा॑य॒ स्वाहा॑ सा॒रंगा॑य॒
स्वाहा॑रु॒णाय॒ स्वाहा॑ गौ॒राय॒ स्वाहा॑ ब॒भ्रवे॒ स्वाहा॑ न॒कुलाय॒
स्वाहा॑ रोहि॒ताय॒ स्वाहा॑ शो॒णाय॒ स्वाहा॑ श्या॒वाय॒ स्वाहा॑
श्या॒माय॒ स्वाहा॑ पा॒क॒लाय॒ स्वाहा॑ सु॒रूपाय॒ स्वाहा॑नु॒रूपाय॒

स्वाहा विरूपाय स्वाहा सरूपाय स्वाहा प्रतिरूपाय स्वाहा
 शबलाय स्वाहा कमलाय स्वाहा पृश्नये स्वाहा पृश्निसक्थाय
 स्वाहा सर्वस्मै स्वाहा ॥ ४० ॥

कृष्णाय षट्त्वारिंशत् ॥ 18 ॥ [१८]

ओषधीभ्यः स्वाहा मूलेभ्यः स्वाहा तूलेभ्यः स्वाहा
 काण्डेभ्यः स्वाहा वल्शेभ्यः स्वाहा पुष्पेभ्यः स्वाहा फलेभ्यः
 स्वाहा गृहीतेभ्यः स्वाहागृहीतेभ्यः स्वाहावपन्नेभ्यः स्वाहा
 शयानेभ्यः स्वाहा सर्वस्मै स्वाहा ॥ ४१ ॥

ओषधीभ्यश्चतुर्विंशतिः ॥ 19 ॥ [१९]

वनस्पतिभ्यः स्वाहा मूलेभ्यः स्वाहा तूलेभ्यः स्वाहा
 स्कन्धेभ्यः स्वाहा शाखाभ्यः स्वाहा पुर्णेभ्यः स्वाहा
 पुष्पेभ्यः स्वाहा फलेभ्यः स्वाहा गृहीतेभ्यः स्वाहागृहीतेभ्यः
 स्वाहावपन्नेभ्यः स्वाहा शयानेभ्यः स्वाहा शिष्टाय
 स्वाहातिशिष्टाय स्वाहा परिशिष्टाय स्वाहा सःशिष्टाय
 स्वाहोच्छिष्टाय स्वाहा रिक्ताय स्वाहारिक्ताय स्वाहा
 प्ररिक्ताय स्वाहा सःरिक्ताय स्वाहोद्रिक्ताय स्वाहा सर्वस्मै
 स्वाहा ॥ ४२ ॥

वनस्पतिभ्यः स्कन्धोभ्यः शिष्टाय रिक्ताय षट्त्वारिंशत्॥२०॥—————[२०]

बृहस्पतिः श्रद्धया वा ऋक्षा वै प्रजापतिर्येनयेन द्वे वाव देवसूत्रे आदित्या अकामयन्त
सुवर्गं वसिष्ठः सं वत्सरायं सुवर्गं ये सत्रम्ब्रह्मवादिनोऽतिरात्रो ज्योतिष्टोमं मेघः कूप्याभ्योऽज्यो
यो नमो मयोभूः किं स्विदम्बे भूः प्राणायं सिताय द्वाविंशतिः॥२२॥ बृहस्पतिः प्रतितिष्ठन्ति
वै दंशरात्रेण सुवर्गं यो अर्वन्तं भूस्त्रिंशत्॥२३॥ बृहस्पतिः सर्वस्मै स्वाहा॥—[२१]

॥चतुर्थः प्रश्नः॥

॥तैत्तिरीयसंहितायां सप्तमकाण्डे चतुर्थः प्रश्नः॥

बृहस्पतिरकामयत् श्रन्मे देवा दधीरन्गच्छेयम्पुरोधामिति
स एतं चतुर्विंशतिरात्रमपश्यत्तमाहरत्तेनायजत्
ततो वै तस्मै श्रद्धेवा अदधतागच्छत्पुरोधां य एवं
विद्वांसश्चतुर्विंशतिरात्रमासते श्रदेभ्यो मनुष्या दधते
गच्छन्ति पुरोधां ज्योतिर्गौरायुरिति त्र्यहा भवन्तीयं वाव
ज्योतिरन्तरिक्षं गौरसावायुः॥१॥

इमानेव लोकानभ्यारोहन्त्यभिपूर्वं त्र्यहा भवन्त्यभिपूर्वमेव
सुवर्गं लोकमभ्यारोहन्त्यसत्रं वा एतद्यदच्छन्दोमं यच्छन्दोमा
भवन्ति तेन सत्रं देवता एव पृष्ठैरव रुन्धते पशूञ्छन्दोमैरोजो
वै वीर्यं पृष्ठानि पशवश्छन्दोमा ओजस्येव वीर्यं पशुषु

प्रति तिष्ठन्ति बृहद्रथन्तराभ्यां यन्तीयं वाव रथन्तरमसौ
बृहदाभ्यामेव॥ २॥

यन्त्यथो अनयोरेव प्रति तिष्ठन्त्येते वै यज्ञस्याञ्जसायनी
स्रुती ताभ्यामेव सुवर्गं लोकं यन्ति चतुर्विंशतिरात्रो भवति
चतुर्विंशतिरर्धमासाः संवत्सरः संवत्सरः सुवर्गो लोकः
संवत्सर एव सुवर्गे लोके प्रति तिष्ठन्त्यथो चतुर्विंशत्यक्षरा
गायत्री गायत्री ब्रह्मवर्चसङ्गायत्रियैव ब्रह्मवर्चसमव रुन्धते-
ऽतिरात्रावभितो भवतो ब्रह्मवर्चसस्य परिगृहीत्यै॥ ३॥

असावायुराभ्यामेव पञ्चचत्वारिंशच्च॥ १॥ [१]

यथा वै मनुष्या एव देवा अग्र आसन्ते-
ऽकामयन्तावर्तिम्पाप्मानंमृत्युमपहत्य दैवीं ससदं
गच्छेमेति त एतं चतुर्विंशतिरात्रमपश्यन्तमाहरन्तेनायजन्त
ततो वै तेऽवर्तिम्पाप्मानंमृत्युमपहत्य दैवीं ससदमगच्छन्
य एवं विद्वांसश्चतुर्विंशतिरात्रमासतेऽवर्तिमेव
पाप्मानमपहत्य श्रियं गच्छन्ति श्रीर्हि मनुष्यस्य॥ ४॥

दैवीं ससद्भ्योतिरतिरात्रो भवति सुवर्गस्य लोकस्यानुख्यात
पृष्ठः षडहो भवति षड्वा ऋतवः संवत्सरस्तम्मासा

अर्धमा॒सा ऋ॒तवः॑ प्र॒विश्य॑ दैवी॑ स॒सद॑मगच्छन् य
 एवं वि॒द्वा स॑श्चतुर्वि॑ंशतिरा॒त्रमा॑सते संवत्स॒रमे॒व प्र॒विश्य॑
 वस्य॑सी॑ स॒सद॑ गच्छन्ति त्रय॑स्त्रयस्त्रि॑ंशा अवस्ता॑द्भवन्ति
 त्रय॑स्त्रयस्त्रि॑ंशाः प॒रस्ता॑त्रयस्त्रि॑ंशैरे॒वोभ॑यतोऽव॒र्तिम्पा॒प्मान॑मप
 दैवी॑ स॒सद॑म्मध्यतः॥५॥

गच्छन्ति पृ॒ष्ठानि॒ हि दैवी॑ स॒सज्जामि॑ वा ए॒तत्कु॑र्वन्ति
 यत्रय॑स्त्रयस्त्रि॑ंशा अ॒न्वश्चो॒ मध्येऽनि॑रुक्तो भवति
 तेनाजा॑म्यूर्ध्वानि॑ पृ॒ष्ठानि॑ भवन्त्यूर्ध्वाश्छ॑न्दो॒मा उ॒भाभ्या॑
 रूपाभ्या॑ सुव॒र्गं लो॒कं य॒न्त्यस॑त्रं वा ए॒तद्य॑द॒छन्दो॑मं
 यच्छ॑न्दो॒मा भव॑न्ति तेन॑ स॒त्रं दे॒वता॑ ए॒व पृ॒ष्ठैर॑व रुन्धते
 प॒शूञ्छ॑न्दो॒मैरोजो॑ वै वी॒र्य॑म्पृष्ठानि॑ प॒शवः॑॥६॥

छन्दो॒मा ओज॑स्ये॒व वी॒र्यं प॒शुषु॑ प्रति॑ तिष्ठन्ति
 त्रय॑स्त्रयस्त्रि॑ंशा अ॒वस्ता॑द्भवन्ति त्रय॑स्त्रयस्त्रि॑ंशाः
 प॒रस्ता॑न्मध्ये॑ पृ॒ष्ठान्युरो॑ वै त्रय॑स्त्रि॑ंशा आ॒त्मा पृ॒ष्ठान्या॒त्मन॑
 ए॒व तद्य॑ज॒मानाः शर्म॑ न ह्य॒न्तेऽना॑त्यै बृह॒द्रथ॑न्तराभ्यां यन्ती॒यं
 वाव र॑थन्तरम॒सौ बृ॒हदा॒भ्यामे॒व य॒न्त्यथो॑ अ॒नयो॑रे॒व प्रति॑
 तिष्ठ॑न्त्ये॒ते वै य॒ज्ञस्या॑ञ्ज॒साय॑नी स्मृती॑ ताभ्यामे॒व॥७॥

सुवर्गं लोकं यन्ति पराश्चो वा एते सुवर्गं
 लोकमभ्यारोहन्ति ये पराचीनानि पृष्ठान्युपयन्ति
 प्रत्यङ्महो भवति प्रत्यवरूढ्या अथो प्रतिष्ठित्या
 उभयोर्लोकयोर्ऋद्धोत्तिष्ठन्ति त्रिवृतोऽधि त्रिवृतमुप
 यन्ति स्तोमानां सम्पत्तयै प्रभवाय ज्योतिरग्निष्टोमो
 भवत्ययं वाव स क्षयोऽस्मादेव तेन क्षयान्न यन्ति
 चतुर्विंशतिरात्रो भवति चतुर्विंशतिरर्धमासाः संवत्सरः
 संवत्सरः सुवर्गो लोकः संवत्सर एव सुवर्गे लोके
 प्रति तिष्ठन्त्यथो चतुर्विंशत्यक्षरा गायत्री गायत्री
 ब्रह्मवर्चसङ्गायत्रियैव ब्रह्मवर्चसमव रुन्धतेऽतिरात्रावभितो
 भवतो ब्रह्मवर्चसस्य परिगृहीत्यै॥८॥

मनुष्यस्य मध्यतः पशवस्ताभ्यामेव सं वत्सरश्चतुर्विंशतिश्च॥२॥ [२]

ऋक्षा वा इयमलोकमासीत्साकामयतौषधीभिर्वनस्पतिभिः
 प्र जायेयेति सैतास्त्रिंशतं रात्रीरपश्यत्ततो वा
 इयमौषधीभिर्वनस्पतिभिः प्राजायत ये प्रजाकामाः
 पशुकामाः स्युस्त एता आसीरन्मैव जायन्ते प्रजया
 पशुभिरियं वा अक्षुध्यत्सैतां विराजमपश्यत्तामात्मन्धित्वान्नाद्यम

वनस्पतीन्प्रजां पशून्तेनावर्धत सा जेमानंमहिमानंमगच्छद्य
 एवं विद्वांस एता आसन्ते विराजमेवात्मन्धित्वा- ऽन्नाद्यमव
 रुन्धते वर्धन्ते प्रजयां पशुभिर्जेमानंमहिमानं गच्छन्ति
 ज्योतिरतिरात्रो भवति सुवर्गस्य लोकस्यानु- ख्यात्यै पृष्ठः
 षडहो भवति षड्वा ऋतवः षट्षानि पृष्ठैरेवतूनन्वारोहन्त्यृतुभिः
 संवत्सरन्ते संवत्सर एव॥१०॥

प्रति तिष्ठन्ति त्रयस्त्रिंशत्त्रयस्त्रिंशमुप यन्ति यज्ञस्य
 संतत्या अथो प्रजापतिर्वै त्रयस्त्रिंशः प्रजापतिमेवा
 रभन्ते प्रतिष्ठित्यै त्रिणवो भवति विजित्या एकविंशो
 भवति प्रतिष्ठित्या अथो रुचमेवात्मन्दधते त्रिवृदग्निष्टुद्भवति
 पाप्मानमेव तेन निर्दहन्तेऽथो तेजो वै त्रिवृत्तेज एवात्मन्दधते
 पञ्चदश इन्द्रस्तोमो भवतीन्द्रियमेवाव॥११॥

रुन्धते सप्तदशो भवत्यन्नाद्यस्यावरुद्धा अथो प्रैव
 तेन जायन्त एकविंशो भवति प्रतिष्ठित्या अथो
 रुचमेवात्मन्दधते चतुर्विंशो भवति चतुर्विंशतिरर्धमासाः
 संवत्सरः संवत्सरः सुवर्गो लोकः संवत्सर एव सुवर्गे
 लोके प्रति तिष्ठन्त्यथो एष वै विषूवान् विषूवन्तो भवन्ति

य ए॒वं वि॒द्वा॒ंस ए॒ता आ॒स॒ते च॒तुर्वि॒ं॒शात्पृ॒ष्ठान्यु॒प॒ य॒न्ति
सं॒व॒त्स॒र ए॒व प्र॒ति॒ष्ठा॒य॥१२॥

दे॒वता॑ अ॒भ्या॒रो॒ह॒न्ति त्र॒यस्त्रि॒ं॒शात्र॒यस्त्रि॒ं॒शमु॒प॒ य॒न्ति
त्र॒यस्त्रि॒ं॒शद्वै दे॒वता॑ दे॒वता॑स्वे॒व प्र॒ति॒ ति॒ष्ठ॒न्ति त्रि॒ण॒वो भ॑व॒ती॒मे
वै लो॒कास्त्रि॒ण॒व ए॒ष्वे॒व लो॒केषु॒ प्र॒ति॒ ति॒ष्ठ॒न्ति द्वा॒वे॒कवि॒ं॒शौ
भ॑व॒तः प्र॒ति॒ष्ठि॒त्या अथो॒ रुच॑मे॒वात्म॑न्द॒ध॒ते ब॒हवः॑ षोड॒शि॒नो
भ॑व॒न्ति तस्मा॑द्ब॒हवः॑ प्र॒जासु॑ वृ॒षा॒णो य॒दे॒ते स्तो॒मा व्य॑ति॒षक्ता
भ॑व॒न्ति तस्मा॑दि॒यमोष॑धीभिर्व॒नस्प॑तिभिर्व्य॒ति॒षक्ता॥१३॥

व्य॒ति॒ष॒ज्य॒न्ते प्र॒जया॑ प॒शुभि॑र्य ए॒वं वि॒द्वा॒ंस ए॒ता
आ॒स॒तेऽक्लृ॑प्ता वा ए॒ते सु॒व॒र्गं लो॒कं य॑न्त्युच्चाव॒चान् हि
स्तो॒मा॒नु॒प॒य॒न्ति य॒दे॒त ऊ॒र्ध्वाः क्लृ॑प्ताः स्तो॒मा भ॑व॒न्ति
क्लृ॑प्ता ए॒व सु॒व॒र्गं लो॒कं य॑न्त्यु॒भयो॑रे॒भ्यो लो॒कयोः॑ क॒ल्प॒ते
त्रि॒ं॒शदे॒तास्त्रि॒ं॒शद॑क्षरा वि॒राड॒न्नं वि॒राड्वि॒राजै॒वान्नाद्य॑म॒व
रु॒न्ध॒तेऽति॒रा॒त्राव॑भि॒तो भ॑व॒तोऽन्नाद्य॑स्य॒ परि॑गृही॒त्यै॥१४॥

ओषधीः सं वत्सर एवाव प्रतिष्ठाय व्यतिषक्तैकान्नपञ्चाशच्च॥३॥ [३]

प्र॒जाप॑तिः सु॒व॒र्गं लो॒कमै॒त्तं दे॒वा येन॑येन॒ छन्द॑सानु
प्रायु॑ञ्ज॒त तेन॑ नाप्नु॒वन्त ए॒ता द्वात्रि॑ं॒शत्॒ रात्री॑रपश्यन्

द्वात्रिंशदक्षरानुष्टुगानुष्टुभः प्रजापतिः स्वेनैव छन्दसा
 प्रजापतिमात्वाभ्यारुह्य सुवर्गं लोकमायन् य एवं विद्वांसं
 एता आसन्ते द्वात्रिंशदेता द्वात्रिंशदक्षरानुष्टुगानुष्टुभः
 प्रजापतिः स्वेनैव छन्दसा प्रजापतिमात्वा श्रियं
 गच्छन्ति॥१५॥

श्रीर्हि मनुष्यस्य सुवर्गो लोको द्वात्रिंशदेता
 द्वात्रिंशदक्षरानुष्टुगवानुष्टुप्सर्वामेव वाचमाप्नुवन्ति सर्वे
 वाचो वदितारो भवन्ति सर्वे हि श्रियं गच्छन्ति
 ज्योतिर्गौरायुरिति त्र्यहा भवन्तीयं वाव ज्योतिरन्तरिक्षं
 गौरसावायु- रिमानेव लोकानभ्यारोहन्त्यभिपूर्वं त्र्यहा
 भवन्त्यभिपूर्वमेव सुवर्गं लोकमभ्यारोहन्ति बृहद्रथन्तराभ्यां
 यन्ति॥१६॥

इयं वाव रथन्तरमसौ बृहदाभ्यामेव यन्त्यथो अनयोरेव
 प्रति तिष्ठन्त्येते वै यज्ञस्याञ्जसायनी स्मृती ताभ्यामेव सुवर्गं
 लोकं यन्ति पराञ्चो वा एते सुवर्गं लोकमभ्यारोहन्ति
 ये पराचरन्त्यहानुपयन्ति प्रत्यङ्महो भवति प्रत्यवरूढ्या
 अथो प्रतिष्ठित्या उभयोर्लोकयोर्ऋद्धोत्तिष्ठन्ति

द्वात्रिंशद॑तास्तासां यास्त्रिंश॑त्रिंशद॑क्षरा विराड॑न्नं
 विराड्विराजै॑वान्नाद्य॒मव॑ रुन्धते ये द्वे अ॑होरात्रे ए॒व ते
 उ॒भाभ्यां॑ रू॒पाभ्यां॑ सुव॒र्गं लो॒कं य॑न्त्यतिरात्राव॒भितो॑
 भवतुः परि॑गृहीत्यै॥१७॥

गच्छन्ति यन्ति त्रिंशदक्षरा द्वाविंशतिश्च॥४॥ [४]

द्वे वाव दे॒वस॒त्रे द्वा॑द॒शाह॒श्चै॒व त्र॑यस्त्रिंशद॒हश्च॑ य
 ए॒वं वि॒द्वां॑ सं॒स्त्रय॑स्त्रिंशद॒हमा॑स॒ते सा॒क्षादे॒व दे॒वता॑
 अ॒भ्यारो॑हन्ति यथा खलु वै श्रेया॑न॒भ्यारूढः॑ का॒मय॑ते तथा
 करो॑ति यद्य॒ववि॑ध्यति पापी॑यान्भवति यदि ना॒ववि॑ध्यति
 स॒दृड्य॑ ए॒वं वि॒द्वां॑ सं॒स्त्रय॑स्त्रिंशद॒हमा॑स॒ते वि पा॒प्मना॑
 भ्रातृ॑व्येणा वर्तन्तेऽह॒र्भाजो॑ वा ए॒ता दे॒वा अग्र॑ आह॑रन्॥१८॥

अह॒रेकोऽभ॑ज॒ताह॑रेक॒स्ताभि॑र्वै ते प्र॒बाहु॑गार्ध्व॒वन् य ए॒वं
 वि॒द्वां॑ सं॒स्त्रय॑स्त्रिंशद॒हमा॑स॒ते सर्व॑ ए॒व प्र॒बाहु॑गृध्र॒वन्ति सर्वे॑
 ग्राम॑णीय॒म्प्राप्नु॑वन्ति पश्चा॒हा भ॑वन्ति पश्च॒ वा ऋ॒तवः॑ सं॒वत्स॑र
 ऋ॒तुष्वे॒व सं॒वत्स॑रे प्रति तिष्ठ॑न्त्यथो पश्चा॑क्षरा प॒ङ्क्तिः पाङ्क्तौ॑
 य॒ज्ञ य॒ज्ञमे॒वाव॑ रुन्धते त्री॒ण्यांश्चि॑नानि भवन्ति त्रय॑ इ॒मे लो॒का
 ए॒षु॥१९॥

ए॒व लो॒केषु॒ प्रति॑ तिष्ठन्त्यथो॒ त्रीणि॒ वै य॒ज्ञस्येन्द्रि॑याणि
 तान्ये॒वाव॑ रुन्धते विश्व॒जिद्ध॑वत्य॒न्नाद्य॒स्याव॑रुद्धौ सर्व॑पृष्ठो
 भवति॒ सर्व॑स्या॒भिजि॑त्यै वा॒ग्वै द्वा॑दशा॒हो यत्पु॑रस्ता॒द्द्वाद॑शा॒हमु॑पे॒य
 वाच॑मु॒पेयु॑रु॒पदा॑सु॒कैषां॑ वाक्स्या॑दु॒परि॑ष्टाद्द्वाद॑शा॒हमु॑पे
 यन्त्या॒प्तमे॒व वाच॑मु॒पे यन्ति॒ तस्मा॑दु॒परि॑ष्टाद्द्वा॒चा व॑दामो॒
 ऽवान्तर॑म्॥ २०॥

वै द॑शरा॒त्रेण॑ प्र॒जाप॑तिः प्र॒जा अ॑सृजत् यद॑शरा॒त्रो
 भव॑ति प्र॒जा ए॒व तद्य॑ज॒मानाः॑ सृजन्त ए॒ताः ह॒ वा
 उ॒दङ्कः॑ शौ॒ल्बाय॑नः स॒त्रस्य॑र्द्धिमुवाच यद॑शरा॒त्रो यद॑शरा॒त्रो
 भव॑ति स॒त्रस्य॑र्द्ध्या अथो॒ यदे॒व पूर्वे॑ष्वहः॒सु विलो॑म क्रियते
 तस्यै॒वैषा॑ शान्ति॒र्द्धनी॒का वा ए॒ता रा॒त्रयो॑ यज॒माना
 विश्व॒जित्स॒हाति॑रा॒त्रेण॑ पूर्वाः षोड॑श स॒हाति॑रा॒त्रेणोत्तराः॑
 षोड॑श य ए॒वं वि॒द्वाः सं॒स्रय॑स्त्रि॒ंशद्द॑हमास॒त ए॑षां॒ द्व्यनी॒का
 प्र॒जा जा॑यतेऽतिरा॒त्राव॑भितो॒ भवतः॑ परिगृहीत्यै॥ २१॥

अ॒हुर॒त्रेष्वा॒न्तर॑ः षोड॑श स॒ह स॒प्तद॑श च॥ ५॥ [५]

आ॒दि॒त्या अ॑का॒मय॑न्त सु॒वर्गं॑ लो॒कमि॑या॒मेति॒ ते
 सु॒वर्गं॑ लो॒कं न प्राजा॑न॒न्त सु॒वर्गं॑ लो॒कमा॑य॒न्त ए॒तः

षट्त्रिंशद्वात्रमपश्यन्तमाहरन्तेनायजन्तु ततो वै ते सुवर्गं
 लोकम्प्राजानन्त्सुवर्गं लोकमायन् य एवं विद्वांसः
 षट्त्रिंशद्वात्रमासते सुवर्गमेव लोकम्प्राजानन्ति सुवर्गं लोकं
 यन्ति ज्योतिरतिरात्रः॥२२॥

भवति ज्योतिरेव पुरस्ताद्वधते सुवर्गस्य लोकस्यानुख्यात्यै
 षड्हा भवन्ति षड्वा ऋतव ऋतुष्वेव प्रति तिष्ठन्ति चत्वारो
 भवन्ति चतस्रो दिशो दिक्ष्वेव प्रति तिष्ठन्त्यसत्रं वा
 एतद्यदच्छन्दोमं यच्छन्दोमा भवन्ति तेन सत्रं देवता
 एव पृष्ठैरव रुन्धते पशूच्छन्दोमैरोजो वै वीर्यम्पृष्ठानि
 पशवश्छन्दोमा ओजस्येव॥२३॥

वीर्यं पशुषु प्रति तिष्ठन्ति षट्त्रिंशद्वात्रो भवति
 षट्त्रिंशदक्षरा बृहती बार्हताः पशवो बृहत्यैव पशूनव
 रुन्धते बृहती छन्दसां स्वाराज्यमाश्रुताश्रुवते स्वाराज्यं
 य एवं विद्वांसः षट्त्रिंशद्वात्रमासते सुवर्गमेव
 लोकं यन्त्यतिरात्रावभितो भवतः सुवर्गस्य लोकस्य
 परिगृहीत्यै॥२४॥

वसिष्ठो हृतपुत्रोऽकामयत विन्देयं प्रजामभि
 सौदासान्भवेयमिति स एतमेकस्मान्नपञ्चाशमपश्यत्तमाहरत्तेनाय
 ततो वै सोऽविन्दत प्रजामभि सौदासान्भवद्य एवं विद्वांसं
 एकस्मान्नपञ्चाशमासते विन्दन्ते प्रजामभि भ्रातृव्यान्भवन्ति
 त्रयस्त्रिवृतोऽग्निष्टोमा भवन्ति वज्रस्यैव मुखं सः श्यन्ति
 दशं पञ्चदशा भवन्ति पञ्चदशो वज्रः॥२५॥

वज्रमेव भ्रातृव्येभ्यः प्र हरन्ति षोडशिमद्वंशममहर्भवति
 वज्र एव वीर्यं दधति द्वादश सप्तदशा भवन्त्यन्नाद्यस्यावरुद्ध्या
 अथो प्रैव तैर्जायन्ते पृष्ठः षडहो भवति षड्वा ऋतवः
 षट्पृष्ठानि पृष्ठैरेवर्तूनन्वारोहन्त्यृतुभिः संवत्सरन्ते संवत्सर
 एव प्रति तिष्ठन्ति द्वादशैकविंशा भवन्ति प्रतिष्ठित्या अथो
 रुचमेवात्मन्॥२६॥

दधते बहवः षोडशिनो भवन्ति विजित्यै षडांश्चिनानि
 भवन्ति षड्वा ऋतवः ऋतुष्वेव प्रति तिष्ठन्त्यूनातिरिक्ता वा एता
 रात्रय ऊनास्तद्यदेकस्यै न पञ्चाशदतिरिक्तास्तद्यद्भूयसीरष्टाचत्व
 ऊनाच्च खलु वा अतिरिक्ताच्च प्रजापतिः प्राजायत ये
 प्रजाकामाः पशुकामाः स्युस्त एता आसीरन्मैव जायन्ते

प्रजयां पशुभिर्वैराजो वा एष यज्ञो यदैकस्मान्नपञ्चाशो य एवं
विद्वांसं एकस्मान्नपञ्चाशमासते विराजमेव गच्छन्त्यन्नादा
भवन्त्यतिरात्रावभितो भवतोऽन्नाद्यस्य परिगृहीत्यै॥ २७ ॥

वज्रं आत्मन्प्रजया द्वाविंशतिश्च॥ ७ ॥ [७]

संवत्सराय दीक्षिष्यमाणा एकाष्टकायां दीक्षेरन्नेषा
वै संवत्सरस्य पत्नी यदैकाष्टकैतस्यां वा एष एतां
रात्रिं वसति साक्षादेव संवत्सरमारभ्य दीक्षन्त आर्तं वा
एते संवत्सरस्याभि दीक्षन्ते य एकाष्टकायां दीक्षन्ते-
ऽन्तनामानावृतू भवतो व्यस्तं वा एते संवत्सरस्याभि
दीक्षन्ते य एकाष्टकायां दीक्षन्तेऽन्तनामानावृतू भवतः
फल्गुनीपूर्णमासे दीक्षेरन्मुखं वा एतत्॥ २८ ॥

संवत्सरस्य यत्फल्गुनीपूर्णमासो मुखत एव
संवत्सरमारभ्य दीक्षन्ते तस्यैकैव निर्या यथ्साम्मेध्ये
विष्वान्सम्पद्यते चित्रापूर्णमासे दीक्षेरन्मुखं वा
एतत्संवत्सरस्य यच्चित्रापूर्णमासो मुखत एव संवत्सरमारभ्य
दीक्षन्ते तस्य न का चन निर्या भवति चतुरहे
पुरस्तात्पौर्णमास्यै दीक्षेरन्तेषामेकाष्टकायां क्रयः सम्पद्यते

तेनैकाष्टकां न छुम्बद्गुर्वन्ति तेषाम्॥२९॥

पूर्वपक्षे सुत्या सम्पद्यते पूर्वपक्षम्मासां अभि सम्पद्यन्ते
ते पूर्वपक्ष उत्तिष्ठन्ति तानुत्तिष्ठत ओषधयो वनस्पतयो-
ऽनुत्तिष्ठन्ति तान्कल्याणी कीर्तिरनुत्तिष्ठत्यरात्सुरिमे
यजमाना इति तदनु सर्वे राधुवन्ति॥३०॥

एतच्छुम्बद्गुर्वन्ति तेषांशतुस्त्रिंशच्च॥८॥ [८]

सुवर्गं वा एते लोकं यन्ति ये सत्रमुपयन्त्यभीन्धत
एव दीक्षाभिरात्मानं श्रपयन्त उपसद्भिर्द्वाभ्यां लोमाव
द्यन्ति द्वाभ्यान्त्वचन्द्राभ्यामसृद्वाभ्याम्मां सन्द्वाभ्यामस्थि
द्वाभ्याम्मज्जानमात्मदक्षिणं वै सत्रमात्मानमेव दक्षिणां नीत्वा
सुवर्गं लोकं यन्ति शिखामनु प्र वपन्त ऋद्ध्या अथो
रधीयांसः सुवर्गं लोकमयामेति॥३१॥

सुवर्गम्पञ्चाशत्॥९॥ [९]

ब्रह्मवादिनो वदन्त्यतिरात्रः परमो यज्ञक्रतूनां
कस्मात्तम्प्रथममुप यन्तीत्येतद्वा अग्निष्टोमम्प्रथममुप
यन्त्यथोक्थ्यमथ षोडशिनमथातिरात्रमनुपूर्वमेवैतद्यज्ञक्रतूनुपेत्य
तानालभ्य परिगृह्य सोममेवैतत्पिबन्त आसते ज्योतिष्टोमम्प्रथम

यन्ति ज्योतिष्ठोमो वै स्तोमानाम्मुखम्मुखत एव स्तोमान्प्र
युञ्जते ते॥ ३२॥

संस्तुता विराजमभि सम्पद्यन्ते द्वे चर्चावति रिच्येते
एकया गौरतिरिक्त एकयायुरूनः सुवर्गो वै लोको
ज्योतिरूर्ग्विराड्वर्गमेव तेन लोकं यन्ति रथंतरं दिवा
भवति रथंतरं नक्तमित्याहुर्ब्रह्मवादिनः केन तदजामीति
सौभरं तृतीयसवने ब्रह्मसामम्बृहत्तन्मध्यतो दधति विधृत्यै
तेनाजामि॥ ३३॥

त एकात्रपञ्चाशच्च॥ १०॥ [१०]

ज्योतिष्ठोमम्प्रथममुप यन्त्यस्मिन्नेव तेन लोके
प्रति तिष्ठन्ति गोष्ठोमं द्वितीयमुप यन्त्यन्तरिक्ष एव
तेन प्रति तिष्ठन्त्यायुष्ठोमं तृतीयमुप यन्त्यमुष्मिन्नेव
तेन लोके प्रति तिष्ठन्तीयं वाव ज्योतिरन्तरिक्षं
गौरसावायुर्यदेतान्थस्तोमानुपयन्त्येष्वेव तल्लोकेषु सन्निः
प्रतितिष्ठन्तो यन्ति ते संस्तुता विराजम्॥ ३४॥

अभि सम्पद्यन्ते द्वे चर्चावति रिच्येते एकया गौरतिरिक्त
एकयायुरूनः सुवर्गो वै लोको ज्योतिरूर्ग्विराडूर्जमेवाव

रुन्धते ते न क्षुधार्तिमार्च्छन्त्यक्षौधुका भवन्ति क्षुधसम्बाधा
इव हि सन्निधौऽग्निष्टोमावभितः प्रधी तावुक्थ्या मध्ये नभ्यं
तत्तदेतत्परियद्देवचक्रं यदेतेन॥३५॥

षडहेन यन्ति देवचक्रमेव समारोहन्त्यरिष्ट्यै ते स्वस्ति
समंश्रुवते षडहेन यन्ति षड्वा ऋतवं ऋतुष्वेव प्रति
तिष्ठन्त्युभयतोज्योतिषा यन्त्युभयत एव सुवर्गे लोके
प्रतितिष्ठन्तो यन्ति द्वौ षडहौ भवतस्तानि द्वादशाहानि
सम्पद्यन्ते द्वादशो वै पुरुषो द्वे सुक्थ्यौ द्वौ बाहू आत्मा च
शिरश्च चत्वार्यङ्गानि स्तनौ द्वादशौ॥३६॥

तत्पुरुषमनु पर्यावर्तन्ते त्रयः षडहा भवन्ति
तान्यष्टादशाहानि सम्पद्यन्ते नवान्यानि नवान्यानि नव वै
पुरुषे प्राणास्तत्प्राणाननु पर्यावर्तन्ते चत्वारः षडहा भवन्ति
तानि चतुर्विंशतिरहानि सम्पद्यन्ते चतुर्विंशतिरर्धमासाः
संवत्सरस्तत्संवत्सरमनु पर्यावर्तन्तेऽप्रतिष्ठितः संवत्सर
इति खलु वा आहुर्वर्षीयान्प्रतिष्ठाया इत्येतावद्वै संवत्सरस्य
ब्राह्मणं यावन्मासो मासिमास्येव प्रतितिष्ठन्तो यन्ति॥३७॥

मे॒षस्त्वा॑ पच॒तैर॑वतु॒ लोहि॑तग्रीव॒श्छा॑गैः शल्म॒लिर्वृ॑द्धा
 पु॒र्णो ब्र॑ह्म॒णा प्ल॑क्षो मे॒धेन॑ न्य॒ग्रोध॑श्चम॒सैरु॑दु॒म्बर॑ ऊ॒र्जा गा॑य॒त्री
 छ॒न्दोभि॑स्त्रिवृ॒स्तोमै॑रव॒न्तीः स्था॑व॒न्तीस्त्वा॑वन्तु॒ प्रि॒यं त्वा॑
 प्रि॒याणां॑ व॒र्षिष्ठ॑मा॒प्यानां॑ नि॒धीनां॑ त्वा॑ निधि॒पति॑ हवामहे
 वसो॑ मम॥३८॥

मे॒षष्व॑द्रि॒शत्॥१२॥ [१२]

कू॒प्या॑भ्यः स्वाहा॒ कू॒ल्या॑भ्यः स्वाहा॑ वि॒क॒र्या॑भ्यः स्वाहा॑-
 ऽव॒ट्या॑भ्यः स्वाहा॒ ख॒न्या॑भ्यः स्वाहा॒ ह॒द्या॑भ्यः स्वाहा॑
 सू॒द्या॑भ्यः स्वाहा॑ सर॒स्या॑भ्यः स्वाहा॑ वैश॒न्ती॑भ्यः स्वाहा॑
 प॒ल्व॒ल्या॑भ्यः स्वाहा॒ व॒र्ष्या॑भ्यः स्वाहा॑ ऽव॒र्ष्या॑भ्यः स्वाहा॑
 हा॒दुनी॑भ्यः स्वाहा॒ पृ॒ष्वा॑भ्यः स्वाहा॒ स्य॑न्द॒माना॑भ्यः स्वाहा॑
 स्था॒व॒रा॑भ्यः स्वाहा॑ ना॒देयी॑भ्यः स्वाहा॑ सै॒न्ध॒वी॑भ्यः स्वाहा॑
 स॒मु॒द्रि॒या॑भ्यः स्वाहा॒ सर्वा॑भ्यः स्वाहा॑॥३९॥

कू॒प्या॑भ्यश्चत्वारि॒शत्॥१३॥ [१३]

अ॒द्भ्यः स्वाहा॒ वह॑न्तीभ्यः स्वाहा॑ परि॒वह॑न्तीभ्यः स्वाहा॑
 स॒मु॒न्तं वह॑न्तीभ्यः स्वाहा॒ शीघ्रं॑ वह॑न्तीभ्यः स्वाहा॒ शी॒भं
 वह॑न्तीभ्यः स्वाहा॒ भी॒मं वह॑न्तीभ्यः स्वाहा॑

स्वाहाऽम्भोभ्यः स्वाहा नभोभ्यः स्वाहा महोभ्यः स्वाहा
सर्वस्मै स्वाहा॥४०॥

अथ एकात्रिंशत्॥14॥ [१४]

यो अर्वन्तं जिघांसति तमभ्यमीति वरुणः। पुरो मर्तः
पुरः श्वा। अहं च त्वं च वृत्रहन्सम्बभूव सनिभ्य आ।
अरातीवा चिदद्रिवोऽनु नौ शूर मंसतै भद्रा इन्द्रस्य रातयः।
अभि ऋत्वेन्द्र भूरधु जमन्न ते विव्यङ्गहिमान् रजांसि।
स्वेना हि वृत्रं शवसा जघन्थ न शत्रुरन्तं विविदद्युधा
ते॥४१॥

विविदद्वे च॥15॥ [१५]

नमो राज्ञे नमो वरुणाय नमोऽश्वाय नमः प्रजापतये
नमोऽधिपतयेऽधिपतिरस्यधिपतिं मा कुर्वधिपतिरहं प्रजानां
भूयासुम्मां धेहि मयि धेह्युपाकृताय स्वाहाऽऽलब्धाय स्वाहा
हुताय स्वाहा॥४२॥

नम एकात्रिंशत्॥16॥ [१६]

मयोभूर्वातो अभि वातूस्त्रा ऊर्जस्वतीरोषधीरा रिशन्ताम्।

पीव॑स्वती॒र्जीव॑ध॒न्याः पि॑बन्त्वव॒साय॑ प॒द्वते॑ रु॒द्र मृ॑ड। याः
 स॒रूपा॒ वि॒रूपा॒ एक॑रूपा॒ यासा॑म॒ग्निरि॑ष्ट्या॒ नामा॑नि॒ वेद॑। या
 अ॒ङ्गिर॑स॒स्तप॑से॒ह च॒क्रुस्ता॑भ्यः प॒र्जन्य॑ म॒हि श॑र्म॒ यच्छ॑। या
 दे॒वेषु॑ त॒नुव॑मैर॒यन्त॑ यासा॒५ सोमो॑ वि॒श्वा रू॒पाणि॑ वेद॑। ता
 अ॒स्मभ्य॑म्प॒यसा॑ पि॒न्वमा॑नाः प्र॒जाव॑तीरिन्द्र॥४३॥

गो॒ष्ठे रि॑रीहि। प्र॒जाप॑तिर्म॒ह्यमे॒ता ररा॑णो॒ विश्वै॑र्दे॒वैः पि॒तृभिः॑
 संवि॑दानः। शि॒वाः स॒तीरु॑पं नो गो॒ष्ठमा॑क॒स्तासा॑ व॒यम्प्र॑जया॒
 स॑५ स॒देम॑। इ॒ह धृ॑तिः स्वाहे॒ह वि॑धृतिः स्वाहे॒ह रन्तिः॑ स्वाहे॒ह
 रम॑तिः स्वाहा॑ म॒हीमू॒ षु सु॒त्रामा॑णम्॥४४॥

इन्द्रा॒ष्टात्रि॑५शच्च॥१७॥ [१७]

कि॑५ स्वि॒दासी॑त्पूर्वचि॒त्तिः कि॑५ स्वि॒दासी॑द्बृह॒द्वयः॑।
 कि॑५ स्वि॒दासी॑त्पिशं॒गिला॑ कि॑५ स्वि॒दासी॑त्पिलि॒प्पिला॑।
 द्यौरा॑सीत्पूर्वचि॒त्तिर॑श्च॒ आसी॑द्बृह॒द्वयः॑। रा॒त्रिरा॑सीत्पिशं॒गिला॑वि॒रा
 कः॑ स्वि॒देका॑की च॒रति॑ क॒ उ॒ स्वि॒ज्जाय॑ते पुनः॑। कि॑५
 स्वि॒द्धिम॑स्य॒ भेष॑जं कि॑५ स्वि॒दाव॑प॒नम्म॑हत्। सूर्य॑ एका॒की
 च॒रति॑॥४५॥

च॒न्द्रमा॑ जायते पुनः॑। अ॒ग्निर्हि॒मस्य॑ भेष॒जम्भूमि॑रा॒वप॑नम्म॒ह

पृच्छामि त्वा परमन्तम्पृथिव्याः पृच्छामि त्वा भुवनस्य
 नाभिम्। पृच्छामि त्वा वृष्णो अश्वस्य रेतः पृच्छामि वाचः
 परमं व्योम। वेदिमाहुः परमन्तम्पृथिव्या यज्ञमाहुर्भुवनस्य
 नाभिम्। सोममाहुर्वृष्णो अश्वस्य रेतो ब्रह्मैव वाचः परमं
 व्योम॥४६॥

सूर्य एकाकी चरति पट्वत्वारिंशच्च॥१८॥ [१८]

अम्बे अम्बाल्यम्बिके न मां नयति कश्चन। ससस्त्यश्वकः।
 सुभगे काम्पीलवासिनि सुवर्गे लोके सं प्रोर्ण्वाथाम्।
 आहमंजानि गर्भधमा त्वमंजासि गर्भधम्। तौ सह
 चतुरः पदः सम्प्र सारयावहै। वृषा वा९ रेतोधा रेतो
 दधातूथ्सक्थ्योर्गृदं धैह्यञ्जिमुदञ्जिमन्वज। यः स्त्रीणां
 जीवभोजनो य आसाम्॥४७॥

बिलधावनः। प्रियः स्त्रीणामपीच्यः। य आसां कृष्णे
 लक्ष्मणि सदिगृदिम्परावधीत्। अम्बे अम्बाल्यम्बिके न मां
 यमति कश्चन। ससस्त्यश्वकः। ऊर्ध्वामेनामुच्छ्रयताद्वेणुभारं
 गिराविंवा। अथास्या मध्यमेधता९ शीते वार्ते पुनन्निवा।
 अम्बे अम्बाल्यम्बिके न मां यमति कश्चन। ससस्त्यश्वकः।

यद्धरिणी यवमत्ति न॥४८॥

पुष्टम्पशु मन्यते। शूद्रा यदर्यजारा न पोषाय धनायति।
अम्बे अम्बाल्यम्बिके न मां यमति कश्चन। ससस्त्यश्वकः।
इयं यका शंकुन्तिकाहलमिति सर्पति। आहतं गृभे पसो नि
जलंगुलीति धाणिका। अम्बे अम्बाल्यम्बिके न मां यमति
कश्चन। ससस्त्यश्वकः। माता च ते पिता च तेऽग्रं वृक्षस्य
रोहतः॥४९॥

प्र सुलामीति ते पिता गृभे मुष्टिमंतसयत्। दधिक्राव्णो
अकारिषं जिष्णोरश्वस्य वाजिनः। सुरभि नो मुखा करत्प्र
ण आयूषि तारिषत्। आपो हि ष्ठा मयोभुवस्ता न ऊर्जे
दधातन। महे रणाय चक्षसे। यो वः शिवतमो रसस्तस्य
भाजयतेह नः। उशतीरिव मातरः। तस्मा अरं गमाम वो
यस्य क्षयाय जिन्वथ। आपो जनयथा च नः॥५०॥

आसामत्ति न रोहतो जिन्वथ चत्वारि च॥१९॥

भूर्भुवः सुवर्वसवस्त्वाञ्जन्तु गायत्रेण छन्दसा रुद्रास्त्वाञ्जन्तु
त्रैष्टुभेन छन्दसादित्यास्त्वाञ्जन्तु जागतेन छन्दसा यद्वातो
अपो अगमदिन्द्रस्य तनुवम्प्रियाम्। एतं स्तोतरेतेन पथा

पुनरश्वमा वर्तयासि नः। लाजी (३) ज्छाची (३) न् यशो
 ममा (4)म्। यव्यायै गव्याया एतद्देवा अन्नमत्तैतदन्नमद्धि
 प्रजापते। युञ्जन्ति ब्रध्नमरुषं चरन्तम्परि तस्थुषः। रोचन्ते
 रोचना दिवि। युञ्जन्त्यस्य काम्या हरी विपक्षसा रथे। शोणा
 धृष्णू नृवाहसा। केतुं कृण्वन्नकेतवे पेशो मर्या अपेशसे।
 समुषद्विरजायथाः॥५१॥

ब्रध्नम्पञ्चविंशतिश्च॥२०॥ [२०]

प्राणाय स्वाहा व्यानाय स्वाहाऽपाणाय स्वाहा स्नावभ्यः
 स्वाहा संतानेभ्यः स्वाहा परिसंतानेभ्यः स्वाहा पर्वभ्यः स्वाहा
 संधानेभ्यः स्वाहा शरीरेभ्यः स्वाहा यज्ञाय स्वाहा दक्षिणाभ्यः
 स्वाहा सुवर्गाय स्वाहा लोकाय स्वाहा सर्वस्मै स्वाहा॥५२॥

प्राणायष्टाविंशतिः॥२१॥ [२१]

सिताय स्वाहाऽसिताय स्वाहाऽभिहिताय स्वाहा-
 ऽनभिहिताय स्वाहा युक्ताय स्वाहाऽयुक्ताय स्वाहा
 सुयुक्ताय स्वाहोद्युक्ताय स्वाहा विमुक्ताय स्वाहा प्रमुक्ताय
 स्वाहा वञ्चते स्वाहा परिवञ्चते स्वाहा संवञ्चते स्वाहा-
 ऽनुवञ्चते स्वाहोद्वञ्चते स्वाहा यते स्वाहा धावते स्वाहा

तिष्ठते स्वाहा सर्वस्मै स्वाहा॥५३॥

सितायाष्टात्रिंशत्॥२२॥ [२२]

गावो गावः सिषांसन्तीः प्रथमे मासि संमान्यो यदि सोमौ षडहैरुत्सृज्या(३)ं देवानामर्क्येण चर्माव पृथिव्यै दत्वते कस्त्वाग्नये यो वै यः प्राणतो य आत्मदा आ ब्रह्मन्नाक्रञ्जि बीजमाग्नेयोऽष्टाकपालोऽग्नयेऽहोमुचेऽष्टाकपालोऽग्नये समनमद्ये ते पन्थानो यो वा अश्वस्य मेध्यस्य शिरः प्रश्नविंशतिः॥२५॥ गावः समान्यः सर्वनमष्टाभिर्वा एते देवकृतश्चाभिमजित्या इत्याहुर्वरुणोऽद्विः साम्ने चतुःपञ्चाशत्॥५४॥ गावो योनिः समुद्रो बन्धुः॥ [२३]

॥पञ्चमः प्रश्नः॥

॥तैत्तिरीयसंहितायां सप्तमकाण्डे पञ्चमः प्रश्नः॥

गावो वा एतत्सत्रमासताशृङ्गाः सुतीः शृङ्गाणि नो जायन्ता इति कामेन तासां दश मासा निषण्णा आसन्नथ शृङ्गाण्यजायन्त ता उदतिष्ठन्नराथस्मेत्यथ यासां नाजायन्त ताः संवत्सरमाह्वोदतिष्ठन्नराथस्मेति यासां चाजायन्त यासां च न ता उभयीरुदतिष्ठन्नराथस्मेति गोसत्रं वै॥१॥

संवत्सरो य एवं विद्वांसः संवत्सरमुपयन्त्यध्रुवन्त्येव तस्मात्तूपरा वार्षिकौ मासौ पत्वा चरति सत्राभिमजित्

ह्यस्यै तस्मात्संवत्सरसदो यत्किं च गृहे क्रियते
तदाप्तमवरुद्धमभिजितं क्रियते समुद्रं वा एते प्र प्लवन्ते ये
संवत्सरमुपयन्ति यो वै समुद्रस्य पारं न पश्यति न वै स
तत् उदैति संवत्सरः ॥ २ ॥

वै समुद्रस्तस्यैतत्पारं यदतिरात्रौ य एवं विद्वांसः
संवत्सरमुपयन्त्यनार्ता एवोदचं गच्छन्तीयं वै पूर्वोऽतिरात्रो-
ऽ- सावुत्तरो मनः पूर्वो वागुत्तरः प्राणः पूर्वोऽपान उत्तरः
प्ररोधनम्पूर्वं उदयनमुत्तरो ज्योतिष्ठोमो वैश्वानरोऽतिरात्रो
भवति ज्योतिरेव पुरस्ताद्वधते सुवर्गस्य लोकस्यानुख्यात्यै
चतुर्विंशः प्रायणीयो भवति चतुर्विंशतिरर्धमासाः ॥ ३ ॥

संवत्सरः प्रयन्त एव संवत्सरे प्रति तिष्ठन्ति तस्य त्रीणि
च शतानि षष्टिश्च स्तोत्रीयास्तावतीः संवत्सरस्य रात्रय उभे
एव संवत्सरस्य रूपे आप्रवन्ति ते सऽस्थित्या अरिष्ट्या
उत्तरैरहोभिश्चरन्ति षड्हा भवन्ति षड्वा ऋतवः संवत्सर
ऋतुष्वेव संवत्सरे प्रति तिष्ठन्ति गौश्चायुश्च मध्यतः स्तोमौ
भवतः संवत्सरस्यैव तन्मिथुनम्मध्यतः ॥ ४ ॥

दधति प्रजननाय ज्योतिरभितो भवति विमोचनमेव

तच्छ्रन्दाँस्येव तद्विमोक्तं यन्त्यथो उभयतोऽज्योतिषैव
 षडहेन सुवर्गं लोकं यन्ति ब्रह्मवादिनो वदन्त्यासन्ते केन
 यन्तीति देवयानेन पथेति ब्रूयाच्छ्रन्दाँसि वै देवयानः पन्था
 गायत्री त्रिष्टुब्जगती ज्योतिर्वै गायत्री गौस्त्रिष्टुगायुर्जगती
 यदेते स्तोमा भवन्ति देवयानेनैव॥५॥

तत्पथा यन्ति समानं सामं भवति देवल्लोको
 वै सामं देवल्लोकादेव न यन्त्यन्याअन्या ऋचो
 भवन्ति मनुष्यलोको वा ऋचो मनुष्यलोकादेवान्यमन्यं
 देवल्लोकमभ्यारोहन्तो यन्त्यभिवर्तो ब्रह्मसामम्भवति
 सुवर्गस्य लोकस्याभिवृत्त्या अभिजिद्धवति सुवर्गस्य
 लोकस्याभिजित्यै विश्वजिद्धवति विश्वस्य जित्यै मासिमांसि
 पृष्ठान्युप यन्ति मासिमांस्यतिग्राह्या गृह्यन्ते मासिमांस्येव
 वीर्यं दधति मासां प्रतिष्ठित्या उपरिष्ठान्मासाम्पृष्ठान्युप
 यन्ति तस्मादुपरिष्ठादोषधयः फलं गृह्णन्ति॥६॥

गोसत्रं वा एति सं वत्सरोऽर्धमासा मिथुनमध्यतो देवयानेनैव वीर्यत्रयोदश च॥१॥[१]

गावो वा एतत्सत्रमासताशृङ्गाः सतीः शृङ्गाणि
 सिषासन्तीस्तासां दश मासा निषण्णा आसन्नथ

शृङ्गाण्यजायन्त ता अंब्रुवन्नराथ्स्मोत्तिष्ठामाव तं
 कामंमरुथ्स्महि येन कामेन न्यषदामेति तासामु त्वा
 अंब्रुवन्नर्धा वा यावतीर्वासामहा एवेमौ द्वादशौ मासौ
 संवत्सरः सम्पाद्योत्तिष्ठामेति तासाम्॥७॥

द्वादशे मासि शृङ्गाणि प्रावर्तन्त श्रद्धया वाश्रद्धया वा ता
 इमा यास्तूपरा उभय्यो वाव ता आर्ध्रुवन् याश्च शृङ्गाण्यसन्वन्
 याश्चोर्जमवारुन्धतर्धोति दशसु मासूत्तिष्ठन्वृधोति द्वादशसु य
 एवं वेद पदेन खलु वा एते यन्ति विन्दति खलु वै पदेन
 यन्तद्वा एतदृद्धमयनन्तस्मादेतद्गोसनि॥८॥

तिष्ठामेति तासान्तस्माद्दे च॥२॥ [२]

प्रथमे मासि पृष्ठान्युप यन्ति मध्यम उप यन्त्युत्तम
 उप यन्ति तदाहुर्या वै त्रिरेकस्याह उपसीदन्ति दहं
 वै सापराभ्यां दोहाभ्यां दुहेऽथ कुतः सा धौक्ष्यते यां
 द्वादश कृत्वा उपसीदन्तीति संवत्सरः सम्पाद्योत्तमे मासि
 सकृत्पृष्ठान्युपैयुस्तद्यजमाना यज्ञं पशूनव रुन्धते समुद्रं
 वै॥९॥

एतेऽनवारमपारम्प प्लवन्ते ये संवत्सरमुपयन्ति

यद्बृहद्रथन्तरे अन्वर्जयुर्यथा मध्ये समुद्रस्य प्लवमन्वर्जयुस्तादृक्त
 दनुश्सर्गम्बृहद्रथन्तराभ्यामित्वा प्रतिष्ठां गच्छन्ति सर्वेभ्यो वै
 कामेभ्यः सन्धिर्दुहे तद्यजमानाः सर्वान्कामानव रुन्धते॥१०॥

समुद्रं वै चतुस्त्रिंशच्च॥३॥ [३]

सामान्यं ऋचो भवन्ति मनुष्यलोको वा ऋचो
 मनुष्यलोकादेव न यन्त्यन्यदन्यथ्सामं भवति देवलोको
 वै सामं देवलोकादेवान्यमन्यम्मनुष्यलोकमप्रत्यवरोहन्तो
 यन्ति जगतीमग्र उप यन्ति जगतीं वै छन्दांसि
 प्रत्यवरोहन्त्याग्रयणं ग्रहा बृहत्पृष्ठानि त्रयस्त्रिंशः
 स्तोमास्तस्माज्ज्यायांसं कनीयान्प्रत्यवरोहति वैश्वकर्मणो
 गृह्यते विश्वान्येव तेन कर्माणि यजमाना अव रुन्धत
 आदित्यः॥११॥

गृह्यत इयं वा अदितिर्स्यामेव प्रति तिष्ठन्त्यन्योन्यो
 गृह्येते मिथुनत्वाय प्रजात्या अवान्तरं वै दशरात्रेण प्रजापतिः
 प्रजा असृजत यद्दशरात्रो भवति प्रजा एव तद्यजमानाः
 सृजन्त एता ह वा उदङ्कः शौल्बायनः सत्रस्यर्द्धिमुवाच
 यद्दशरात्रो यद्दशरात्रो भवति सत्रस्यर्द्धा अथो यदेव

पूर्वेष्वहःसु विलोम क्रियते तस्यैवैषा शान्तिः॥१२॥

अदित्यस्तस्यैव द्वे च॥४॥ [४]

यदि सोमौ स० सुतौ स्यातांममहति रात्रियै
प्रातरनुवाकमुपाकुर्यात्पूर्वो वाचम्पूर्वो देवताः पूर्वश्छन्दांसि
वृद्धे वृषण्वतीं प्रतिपदं कुर्यात्प्रातःसवनादेवैषामिन्द्रं
वृद्धेऽथो खल्वाहुः सवनमुखेसवनमुखे कार्येति
सवनमुखात्सवनमुखादेवैषामिन्द्रं वृद्धे संवेशायोपवेशाय
गायत्रियास्त्रिष्टुभो जगत्या अनुष्टुभः पङ्क्त्या अभिभूत्यै स्वाहा
छन्दांसि वै संवेश उपवेशश्छन्दोभिरेवैषाम्॥१३॥

छन्दांसि वृद्धे सजनीय० शस्यं विहव्य०
शस्यमगस्त्यस्य कयाशुभीय० शस्यमेतावद्वा अस्ति
यावदेतद्यावदेवास्ति तदैषां वृद्धे यदि प्रातःसवने
कलशो दीर्येत वैष्णवीषु शिपिविष्टवंतीषु स्तुवीरन्
यद्वै यज्ञस्यातिरिच्यते विष्णुं तच्छिपिविष्टमभ्यतिरिच्यते
तद्विष्णुः शिविपिष्टोऽतिरिक्त एवातिरिक्तं दधात्यथो
अतिरिक्तेनैवातिरिक्तमात्स्वावं रुन्धते यदि मध्यंदिने दीर्येत

वषट्कारनिधनुः॑ सामं कुर्युर्वषट्कारो वै युज्ञस्य॑ प्रतिष्ठा
प्रतिष्ठामेवैनं॑द्रमयन्ति॒ यदि॑ तृतीयसवन॑ एतदेव॥१४॥

छन्दोभिरेवेषामवैकान्नविंशतिश्च॥५॥ [५]

षड्॒हैर्मासा॑न्थ्सम्पाद्या॒हुरु॒थ्सृजन्ति॑ षड्॒हैर्हि॑ मासा॑न्थ्सम्पश्यं॒
मासा॑न्थ्सम्पश्यन्त्य॒मावा॒स्यया॒ मासा॑न्थ्सम्पाद्या॒हुरु॒थ्सृजन्त्य॒मा
हि मासा॑न्थ्सम्पश्यन्ति॒ पौर्ण॒मास्या॒ मासा॑न्थ्सम्पाद्या॒हुरु॒थ्सृजन्ति॑
पौर्ण॒मास्या॒ हि मासा॑न्थ्सम्पश्यन्ति॒ यो वै पूर्ण॑ आ॒सिञ्चति॑
परा॒ स सिञ्चति॑ यः पूर्णा॑दुदच॑ति॥१५॥

प्रा॒णम॑स्मिन्थ्स द॑धाति॒ यत्पौ॑र्ण॒मास्या॒ मासा॑न्थ्सम्पाद्या॒हुरु॒थ्सृजन्ति॑
संव॑थ्सरा॒यैव॒ तत्प्रा॒णं द॑धति॒ तदनु॑ स॒त्रिणः॑ प्रा॒णन्ति॑
यद॒हर्नो॑थ्सृजेयुर्यथा॒ दृतिरु॑प॒नद्धो॑ वि॒पत॑त्येव॑ संव॑थ्सरो वि
प॑ते॒दार्ति॑मा॒र्च्छेयुर्य॑त्पौ॑र्ण॒मास्या॒ मासा॑न्थ्सम्पाद्या॒हुरु॒थ्सृजन्ति॑
संव॑थ्सरा॒यैव॒ तदु॑दा॒नं द॑धति॒ तदनु॑ स॒त्रिण॑ उ॒त्॥१६॥

अ॒नन्ति॑ ना॒र्तिमा॒र्च्छन्ति॑ पूर्ण॑मा॒से वै दे॒वानां॑
सु॒तो यत्पौ॑र्ण॒मास्या॒ मासा॑न्थ्सम्पाद्या॒हुरु॒थ्सृजन्ति॑
दे॒वानां॑मे॒व तद्य॒ज्ञेन॑ य॒ज्ञम्प्र॒त्यव॑रोहन्ति॒ वि वा ए॒तद्य॒ज्ञं
छि॑न्दन्ति॒ यत्ष॑ड॒हस॑त॒तं स॒न्तम॒थाह॑रु॒थ्सृजन्ति॑

प्राजापत्यम्पशुमालभन्ते प्रजापतिः सर्वा देवता देवताभिरेव
यज्ञं सं तन्वन्ति यन्ति वा एते सर्वनाद्येऽहः॥१७॥

उत्सृजन्ति तुरीयं खलु वा एतत्सर्वनं यत्सान्नाय्यं
यत्सान्नाय्यम्भवति तेनैव सर्वनान्न यन्ति समुपहूय
भक्षयन्त्येतत्सोमपीथा ह्येतर्हि यथायतनं वा एतेषां
सर्वनाजो देवता गच्छन्ति येऽहरुत्सृजन्त्यनुसर्वनं
पुरोडाशान्निर्वपन्ति यथायतनादेव सर्वनाजो देवता अव
रुन्धतेऽष्टाकपालान्प्रातःसर्वन एकादशकपाला-
न्माध्यन्दिने
सर्वने द्वादशकपालांस्तृतीयसर्वने छन्दांस्येवात्वाव
रुन्धते वैश्वदेवं चरुं तृतीयसर्वने निर्वपन्ति वैश्वदेवं वै
तृतीयसर्वनन्तेनैव तृतीयसर्वनान्न यन्ति॥१८॥

उदच्युद्येऽहरास्वा पञ्चदश च॥६॥ [६]

उत्सृज्या (३) नोत्सृज्या (३) मिति मीमांसन्ते
ब्रह्मवादिनस्तद्वाहुरुत्सृज्यमेवेत्यमावास्यायां च पौर्णमास्यां
चोत्सृज्यमित्याहुरेते हि यज्ञं वहत इति ते त्वाव
नोत्सृज्ये इत्याहुर्ये अवान्तरं यज्ञम्भेजाते इति या प्रथमा
व्यष्टका तस्यामुत्सृज्यमित्याहुरेष वै मासो विश्व इति

नादिष्टम्॥१९॥

उत्सृजेयुर्यदादिष्टमुत्सृजेयुर्यादृशे पुनः पर्याप्तावे मध्ये
षडहस्यं सम्पद्येत षडहैर्मासान्त्सम्पाद्य यत्सप्तममह-
स्तस्मिन्नुत्सृज्येयुस्तदग्नये वसुमते पुरोडाशमष्टाकपालं
निर्वपेयुरेन्द्रं दधीन्द्राय मरुत्वते पुरोडाशमेकादशकपालं
वैश्वदेवं द्वादशकपालमग्नेर्वै वसुमतः प्रातःसवनं यदग्नये
वसुमते पुरोडाशमष्टाकपालं निर्वपन्ति देवतामेव तद्वाग्निनीं
कुर्वन्ति॥२०॥

सवनमष्टाभिरुपं यन्ति यदैन्द्रं दधि भवतीन्द्रमेव
तद्वाग्धेयान्न च्यावयन्तीन्द्रस्य वै मरुत्वतो माध्यंदिनं
सवनं यदिन्द्राय मरुत्वते पुरोडाशमेकादशकपालं
निर्वपन्ति देवतामेव तद्वाग्निनीं कुर्वन्ति सवनमेकादशभिरुपं
यन्ति विश्वेषां वै देवानामृभुमतां तृतीयसवनं यद्वैश्वदेवं
द्वादशकपालं निर्वपन्ति देवता एव तद्वाग्निनीः कुर्वन्ति
सवनं द्वादशभिः॥२१॥

उपं यन्ति प्राजापत्यम्पशुमा लभन्ते यज्ञो वै
प्रजापतिर्यज्ञस्याननुसर्गायाभिवर्त इतः षण्मासो

ब्रह्मसामम्भवति ब्रह्म वा अभिवर्तो ब्रह्मणैव तत्सुवर्गं
 लोकमभिवर्तयन्तो यन्ति प्रतिकूलमिव हीतः सुवर्गो
 लोक इन्द्र क्रतुं न आ भर पिता पुत्रेभ्यो यथा। शिक्षा
 नो अस्मिन्पुरुहूत यामनि जीवा ज्योतिरशीमहीत्यमुत
 आयताः षण्मासो ब्रह्मसामम्भवत्ययं वै लोको ज्योतिः
 प्रजा ज्योतिरिममेव तल्लोकम्पश्यन्तोऽभिवदन्त आ
 यन्ति॥ २२॥

नादिष्टकुर्वन्ति द्वादशभिरिति विंशतिश्च॥ ७॥ [७]

देवानां वा अन्तं जग्मुषामिन्द्रियं वीर्यमपाक्रामत्तत्क्रोशेनाव
 रुन्धत तत्क्रोशस्य क्रोशत्वं यत्क्रोशेन चात्वालस्यान्ते
 स्तुवन्ति यज्ञस्यैवान्तं गृत्वेन्द्रियं वीर्यमव रुन्धते
 सत्रस्यर्द्धाहवनीयस्यान्ते स्तुवन्त्यग्निमेवोपद्रष्टारं कृत्वर्द्धिमुप
 यन्ति प्रजापतेरहृदयेन हविर्धानेऽन्तः स्तुवन्ति प्रेमाणमेवास्य
 गच्छन्ति श्लोकेन पुरस्तात्सदसः॥ २३॥

स्तुवन्त्यनुश्लोकेन पश्चाद्यज्ञस्यैवान्तं गृत्वा श्लोकभाजो
 भवन्ति नवभिरध्वर्युरुद्रायति नव वै पुरुषे प्राणाः
 प्राणानेव यजमानेषु दधाति सर्वा ऐन्द्रियो भवन्ति

प्रा॒णेष्वे॒वेन्द्रि॒यं द॑ध॒त्यप्र॑ति॒हृताभि॑रु॒द्गाय॑ति॒ तस्मा॑त्पु॒रुषः॑
सर्वा॑ण्य॒न्यानि॑ शी॒र्ष्णोऽङ्गा॑नि॒ प्रत्य॑चति॒ शिर॑ ए॒व न पञ्च॑द॒शः
र॑थन्त॒रम्भ॑वतीन्द्रि॒यमे॒वाव॑ रु॒न्धते॑ सप्तद॒शम्॥२४॥

बृ॒हद॒न्नाद्य॒स्याव॑रु॒द्ध्या अ॒थो प्रै॒व तेन॑ जा॒यन्त॑
एक॑वि॒ंशम्भ॑द्रं द्वि॒पदा॑सु॒ प्रति॑ष्ठित्यै॒ पत्न्य॑ उ॒पं गा॑यन्ति
मिथु॑न॒त्वाय॑ प्रजा॑त्यै प्र॒जाप॑तिः प्र॒जा अ॑सृ॒जत् सो॒-
ऽका॑मयता॒साम॑ह॒ राज्य॑म्परी॒यामि॑ति॒ तासा॑ं राज॒नेनै॒व
रा॒ज्यम्पर्यै॑त्तद्रा॒ज॒नस्य॑ राज॒नत्वं॑ यद्रा॒ज॒नम्भ॑वति प्र॒जाना॑मे॒व
तद्य॑ज॒माना॑ रा॒ज्यम्परि॑ यन्ति पञ्च॑वि॒ंशम्भ॑वति
प्र॒जाप॑तेः॥२५॥

आ॒प्त्यै पञ्च॑भि॒स्तिष्ठ॑न्तः स्तु॒वन्ति॑ दे॒वल॒ोकमे॒वाभि॑ ज॒यन्ति॑
पञ्च॑भि॒रासी॑ना म॒नुष्य॑लो॒कमे॒वाभि॑ ज॒यन्ति॑ द॒श स॑म्प॒द्यन्ते॑
द॒शाक्ष॑रा वि॒राड॒न्नं वि॒राजै॑वान्नाद्य॒मव॑ रु॒न्धते॑ पञ्च॑धा वि॒निष॑द्य
स्तु॒वन्ति॑ पञ्च॑ दि॒शो दि॒क्ष्वे॒व प्रति॑ तिष्ठ॒न्त्येकै॑क॒यास्तु॑तया
स॒माय॑न्ति दि॒ग्भ्य ए॒वान्नाद्य॑ सं॒भर॑न्ति॒ ताभि॑रु॒द्गातो॑द्गायति
दि॒ग्भ्य ए॒वान्नाद्य॑म्॥२६॥

स॒म्भृत्य॑ तेज॑ आ॒त्मन्द॑धते॒ तस्मा॑दे॒कः प्रा॒णः

सर्वाण्यङ्गान्यवत्यथो यथा सुपूर्ण उत्पत्तिष्यञ्छिरं
 उत्तमं कुरुत एवमेव तद्यजमानाः प्रजानामुत्तमा
 भवन्त्यासन्दीमुद्गाता रोहति साम्राज्यमेव गच्छन्ति
 प्लेङ्गः होता नाकस्यैव पृष्ठः रोहन्ति कूर्चावध्वर्युर्ब्रध्नस्यैव
 विष्टपं गच्छन्त्येतावन्तो वै देवलोकास्तेष्वेव यथापूर्वं प्रति
 तिष्ठन्त्यथो आक्रमणमेव तथ्येतुं यजमानाः कुर्वते सुवर्गस्य
 लोकस्य समष्टौ॥२७॥

सदसः सप्तदशं प्रजापतेर्गायति दिग्भ्य एवान्नाद्यम्पत्येकादश च॥८॥—[८]

अर्क्येण वै सहस्रशः प्रजापतिः प्रजा असृजत ताभ्य
 इलान्देनेरां लूतामवारुन्ध्र यदर्क्यम्भवति प्रजा एव
 तद्यजमानाः सृजन्त इलान्दम्भवति प्रजाभ्य एव सृष्टाभ्य
 इरां लूतामव रुन्धते तस्माद्याः समाः सत्रः समृद्धं
 क्षोधुकास्ताः समां प्रजा इषः ह्यासामूर्जमाददते याः
 समां व्यृद्धमक्षोधुकास्ताः समां प्रजाः॥२८॥

न ह्यासामिषमूर्जमाददत उत्क्रोदं कुर्वते यथा
 बन्धान्मुमुचाना उत्क्रोदं कुर्वत एवमेव तद्यजमाना
 देवबन्धान्मुमुचाना उत्क्रोदं कुर्वत इषमूर्जमात्मन्दधाना

वा॒णः श॒तत॑न्तुर्भवति श॒तायुः पुरु॑षः श॒तेन्द्रि॑य आ॒युष्ये॑वेन्द्रि॒ये
प्रति॑ तिष्ठन्त्या॒जिं धा॑वन्त्यन॑भिजितस्या॒भिजित्यै॑
दुन्दु॑भीन्त्स॒माघ्न॑न्ति पर॒मा वा ए॒षा वा॒ग्या दु॑न्दु॒भौ
पर॒मामे॒व॥ २९॥

वाच॑मव॑ रुन्धते भूमिदुन्दु॒भिमा घ्न॑न्ति यैवेमां वाक्प्रविंष्टा
तामे॒वाव॑ रुन्धतेऽथो॑ इ॒मामे॒व ज॑यन्ति सर्वा॒ वाचो॑
वदन्ति॒ सर्वा॑सां वा॒चामव॑रुद्धा आ॒र्द्रे च॒र्मन्व्या॑यच्छेते
इन्द्रि॑यस्याव॑रुद्धा आ॒न्यः क्रोश॑ति प्रा॒न्यः श॑सति॒ य
आ॒क्रोश॑ति पु॒नात्ये॒वैनान्त्स स यः प्र॒श॑सति पू॒तेष्वे॒वान्नाद्य॑
दधा॒त्यृषि॑कृतं च॥ ३०॥

वा ए॒ते दे॒वकृ॑तं च॒ पूर्वे॑र्मासै॒रव॑ रुन्धते॒ यद्भू॑तेच्छ॒दाः
सामा॑नि॒ भव॑न्त्यु॒भय॑स्याव॑रुद्धौ यन्ति॒ वा ए॒ते मि॑थु॒नाद्ये
संव॑त्सरमु॒पय॑न्त्यन्तर्वे॒दि मि॑थु॒नौ सम्भ॑वत॒स्तेनै॒व मि॑थु॒नान्न
य॑न्ति॥ ३१॥

व्य॒द्धम॑क्षो॒धुका॒स्ताः समा॑ प्र॒जाः पर॑मामे॒व च त्रि॑श॒च्च॥ १॥ [१]

च॒र्माव॑ भिन्दन्ति पा॒प्मान॑मे॒वैषा॑मव॑ भिन्दन्ति माप॑
रा॒थ्सी॒र्माति॑ व्या॒थ्सी॒रित्या॑ह॒ सम्प्र॑त्ये॒वैषां॑ पा॒प्मान॑मव॑

भिन्दन्त्युदकुम्भानधिनिधाय दास्यो मार्जालीयम्परि
 नृत्यन्ति पदो निघ्नतीरिदम्भुं गायन्त्यो मधु वै देवानां
 परममन्नाद्यम्परममेवान्नाद्यमव रुन्धते पदो नि घ्नन्ति
 महीयामेवैषु दधति॥३२॥

चर्मैकान्नपञ्चाशत्॥१०॥ [१०]

पृथिव्यै स्वाहान्तरिक्षाय स्वाहा दिवे स्वाहा सम्प्लोष्यते
 स्वाहा सम्प्लवमानाय स्वाहा सम्प्लुताय स्वाहा मेघायिष्यते
 स्वाहा मेघायते स्वाहा मेघिताय स्वाहा मेघाय स्वाहा
 नीहाराय स्वाहा निहाकायै स्वाहा प्रासृचाय स्वाहा
 प्रचलाकायै स्वाहा विद्योतिष्यते स्वाहा विद्योतमानाय
 स्वाहा संविद्योतमानाय स्वाहा स्तनयिष्यते स्वाहा स्तनयते
 स्वाहोग्रः स्तनयते स्वाहा वर्षिष्यते स्वाहा वर्षते
 स्वाहाभिवर्षते स्वाहा परिवर्षते स्वाहा संवर्षते॥३३॥

स्वाहानुवर्षते स्वाहा शीकायिष्यते स्वाहा शीकायते
 स्वाहा शीकिताय स्वाहा प्रोषिष्यते स्वाहा पुष्णते स्वाहा
 परिपुष्णते स्वाहोद्गहीष्यते स्वाहोद्गृह्यते स्वाहोद्गृहीताय
 स्वाहा विप्लोष्यते स्वाहा विप्लवमानाय स्वाहा विप्लुताय

स्वाहा॑तप्स्य॒ते स्वाहा॑तप॒ते स्वाहो॑ग्रमा॒तप॒ते स्वाह॑र्भ्यः
 स्वाहा॑ यजु॑र्भ्यः स्वाहा॑ साम॑र्भ्यः स्वाहा॑ङ्गि॑रोभ्यः स्वाहा॑
 वेदे॑र्भ्यः स्वाहा॑ गाथा॑र्भ्यः स्वाहा॑ नारा॑श॒सी॒र्भ्यः स्वाहा॑
 रैभी॑र्भ्यः स्वाहा॑ सर्व॑स्मै स्वाहा॑॥ ३४॥

सं वर॑ण॒ते रैभी॑र्भ्यः स्वाहा॑ द्वे च॑॥ 11॥ ————— [११]

द॒त्व॒ते स्वाहा॑ऽद॒न्तका॑य॒ स्वाहा॑ प्रा॒णिने॒ स्वाहा॑ऽप्रा॒णाय॒
 स्वाहा॑ मुख॑व॒ते स्वाहा॑ऽमुखा॑य॒ स्वाहा॑ ना॒सिक॑व॒ते स्वाहा॑-
 ऽना॒सिका॑य॒ स्वाहा॑ऽक्ष॑ण्व॒ते स्वाहा॑ऽन॒क्षिका॑य॒ स्वाहा॑ क॒र्णिने॒
 स्वाहा॑ऽक॒र्णका॑य॒ स्वाहा॑ शी॒र्षण्व॑ते॒ स्वाहा॑ऽ- शी॒र्षका॑य॒
 स्वाहा॑ प॒द्वते॒ स्वाहा॑ऽपा॒दका॑य॒ स्वाहा॑ प्रा॒णते॒ स्वाहा॑ऽप्रा॒णते॒
 स्वाहा॑ व॒दते॒ स्वाहा॑ऽव॒दते॒ स्वाहा॑ प॒श्यते॒ स्वाहा॑ऽप॒श्यते॒
 स्वाहा॑ शृ॒ण्वते॒ स्वाहा॑ऽशृ॒ण्वते॒ स्वाहा॑ मन॒स्विने॒ स्वाहा॑॥ ३५॥

अ॒म॒न॒से स्वाहा॑ रे॒त॒स्विने॒ स्वाहा॑ऽरे॒तस्का॑य॒ स्वाहा॑
 प्र॒जा॒र्भ्यः स्वाहा॑ प्र॒जन॑नाय॒ स्वाहा॑ लो॒म॑व॒ते स्वाहा॑-
 ऽलो॒मका॑य॒ स्वाहा॑ त्व॒चे स्वाहा॑ऽत्व॒क्का॑य॒ स्वाहा॑ च॒र्म॑ण्व॒ते
 स्वाहा॑ऽच॒र्मका॑य॒ स्वाहा॑ लो॒हि॒तव॑ते॒ स्वाहा॑ऽलो॒हि॒ताय॒
 स्वाहा॑ मा॒स॒न्वते॒ स्वाहा॑ऽमा॒स॒काय॒ स्वाहा॑ स्ना॒व॑र्भ्यः

स्वाहा॑ऽस्त्रा॒वका॑य॒ स्वाहा॑ऽस्थ॒न्वते॒ स्वाहा॑ऽनु॒स्थिका॑य॒ स्वाहा॑
म॒ञ्ज॒न्वते॒ स्वाहा॑ऽम॒ञ्जका॑य॒ स्वाहा॑ऽङ्गि॒ने स्वाहा॑ऽन॒ङ्गाय॒
स्वाहा॑ऽऽत्म॒ने स्वाहा॑ऽना॑त्म॒ने स्वाहा॑ सर्व॒स्मै स्वाहा॑॥३६॥

मु॒न॒स्विने॒ स्वाहा॑ऽना॑त्म॒ने स्वाहा॑ द्वे च॥१२॥ [१२]

क॒स्त्वा यु॒नक्ति॒ स त्वा॑ यु॒नक्तु॒ विष्णु॑स्त्वा यु॒नक्त॒स्य
य॒ज्ञस्य॑र्द्धे॒ मह्य॑ सं॒न॒त्या अ॒मुष्मै॒ कामा॑यायुषे॒ त्वा प्रा॑णाय॒
त्वाऽपा॒नाय॑ त्वा व्या॒नाय॑ त्वा व्यु॒ष्ट्यै त्वा र॒य्यै त्वा रा॒ध॒से त्वा
घोषा॑य॒ त्वा पोषा॑य॒ त्वारा॑द्धोषाय॒ त्वा प्र॒च्यु॒त्यै त्वा॥३७॥

क॒स्त्वाऽष्टा॑त्रिंशत्॥१३॥ [१३]

अ॒ग्नये॑ गाय॒त्राय॑ त्रि॒वृते॒ राथ॑तराय॒ वास॒न्ताया॑ष्टाक॒पाल॑
इन्द्रा॑य॒ त्रैष्टु॑भाय॒ पञ्च॑द॒शाय॒ बार्ह॑ताय॒ ग्रैष्मा॑यैका॒दश॑क॒पालो॑
विश्वे॑भ्यो॒ देवे॑भ्यो॒ जाग॑तेभ्यः॒ सप्त॑द॒शेभ्यो॑ वैरू॒पेभ्यो॑
वा॒र्षिके॑भ्यो॒ द्वाद॑शक॒पालो॑ मि॒त्रावरु॑णाभ्या॒मानु॑ष्टुभाभ्यामेक॒
वि॒ंशाभ्या॑ वैरा॒जाभ्या॑ शार॒दाभ्या॑ पय॒स्या बृ॒हस्प॑तये॒
पाङ्गा॑य॒ त्रिण॑वाय॒ शाक॑राय॒ हैम॑न्तिकाय॒ चरुः॑ स॒वित्र॑
आ॒तिच्छ॑न्दसाय॒ त्रय॑स्त्रिंशाय॒ रैव॑ताय॒ शैशि॑राय॒
द्वाद॑शक॒पालो॑ऽदित्यै॒ विष्णु॑प॒त्यै च॒रुर॑ग्नये॒ वैश्वान॑राय॒

द्वादशकपालोऽनुमत्यै चरुः काय एककपालः ॥ ३८ ॥

अग्नयेऽदित्या अनुमत्यै सप्तचत्वारिंशत् ॥ १४ ॥

यो वा अग्नावग्निः प्रहियते यश्च सोमो राजा तयोरेष
आतिथ्यं यदग्नीषोमीयोऽथेष रुद्रो यश्चीयते यत्संचिते-
ऽग्नावेतानि हवींषि न निर्वपेदेष एव रुद्रोऽशान्त उपोत्थाय
प्रजां पशून् यजमानस्याभि मन्येत यत्संचितेऽग्नावेतानि
हवींषि निर्वपति भागधेयेनैवैनं शमयति नास्य
रुद्रोऽशान्तः ॥ ३९ ॥

उपोत्थाय प्रजां पशून्भि मन्यते दशं हवींषि भवन्ति
नव वै पुरुषे प्राणा नाभिर्दशमी प्राणानेव यजमाने दधात्यथो
दशाक्षरा विराडन्नं विराज्येवान्नाद्ये प्रति तिष्ठत्यृतुभिर्वा
एष छन्दोभिः स्तोमैः पृष्ठैश्चेतव्यं इत्याहुयदेतानि हवींषि
निर्वपत्यृतुभिरेवैनं छन्दोभिः स्तोमैः पृष्ठैश्चिनुते दिशः
सुषुवाणेन ॥ ४० ॥

अभिजित्या इत्याहुयदेतानि हवींषि निर्वपति
दिशामभिजित्या एतया वा इन्द्रं देवा अयाजयन्तस्मादिन्द्रसुव
एतया मनुम्मनुष्यास्तस्मान्मनुसुवो यथेन्द्रो देवानां यथा

मनु॑र्मनु॒ष्या॑णामे॒वम्भ॑वति॒ य ए॒वं वि॒द्वाने॒तये॑ष्ट्या॒ यज॑ते
दि॒ग्वतीः॑ पु॒रोनु॒वाक्या॑ भवन्ति॒ सर्वा॑सां दि॒शाम॒भिजि॑त्यै॥ ४१॥

अशान्तः सुषुवाणेनैकचत्वारिंशच्च॥ 15॥ [१५]

यः प्रा॑ण॒तो नि॑मिष॒तो म॑हि॒त्वैक॒ इद्रा॑जा जग॑तो ब॒भूव॑।
य ई॒शे अ॒स्य द्वि॒पद॑श्चतु॒ष्पदः॑ कस्मै॑ दे॒वाय॑ ह॒विषा॑ वि॒धेम।
उ॒प॒या॒मगृ॑हीतोऽसि प्र॒जाप॑तये त्वा जुष्टं॑ गृह्णामि॒ तस्य॑ ते
द्यौर्म॑हि॒मा नक्ष॑त्राणि रू॒पमा॑दित्यस्ते तेज॒स्तस्मै॑ त्वा म॒हिम्ने॑
प्र॒जाप॑तये॒ स्वाहा॑॥ ४२॥

यः प्राणतो द्यौरादित्योऽष्टात्रिंशत्॥ 16॥ [१६]

य आ॑त्म॒दा ब॑ल॒दा यस्य॑ वि॒श्वं उ॒पास॑ते प्र॒शिषं॑ यस्य॑
दे॒वाः। यस्य॑ छा॒यामृ॑तं यस्य॑ मृ॒त्युः कस्मै॑ दे॒वाय॑ ह॒विषा॑
वि॒धेम। उ॒प॒या॒मगृ॑हीतोऽसि प्र॒जाप॑तये त्वा जुष्टं॑ गृह्णामि॒ तस्य॑
ते पृ॒थि॒वी म॑हि॒मौष॑धयो वन॒स्पत॑यो रू॒पम॑ग्निस्ते तेज॒स्तस्मै॑
त्वा म॒हिम्ने॑ प्र॒जाप॑तये॒ स्वाहा॑॥ ४३॥

य आत्मदाः पृथिव्याग्निकान्नचत्वारिंशत्॥ 17॥ [१७]

आ ब्रह्म॑न्ब्राह्म॒णो ब्र॑ह्मवर्च॒सी जा॑यता॒माऽस्मिन्ना॒ष्ट्रे रा॑ज॒न्यं

इषव्यः शूरो महारथो जायतान्दोग्ध्रीं धेनुर्वोढाऽ- नृद्वानाशुः
 सप्तिः पुरंधिर्योषां जिष्णू रथेष्टाः सभेयो युवाऽस्य यजमानस्य
 वीरो जायतान्निकामेनिकामे नः पर्जन्यो वर्षतु फलिन्यो न
 ओषधयः पच्यन्तां योगक्षेमो नः कल्पताम्॥४४॥

आ ब्रह्मत्रेकचत्वारिंशत्॥१८॥ [१८]

आक्रान् वाजी पृथिवीमग्निं युजमकृत वाज्यर्वाक्रान्
 वाज्यन्तरिक्षं वायुं युजमकृत वाज्यर्वा द्यां वाज्याऽक्रष्ट
 सूर्यं युजमकृत वाज्यर्वाग्निस्ते वाजिन् युङ्क्षुः त्वा रभे
 स्वस्ति मा सम्पारय वायुस्ते वाजिन् युङ्क्षुः त्वा रभे स्वस्ति
 मा सम्॥४५॥

पारयादित्यस्ते वाजिन् युङ्क्षुः त्वा रभे स्वस्ति मा
 सम्पारय प्राणधृगंसि प्राणं मे दृह व्यानधृगंसि व्यानं
 मे दृहापानधृगस्यपानं मे दृह चक्षुरसि चक्षुर्मयि धेहि
 श्रोत्रमसि श्रोत्रम्मयि धेह्यायुरस्यायुर्मयि धेहि॥४६॥

वायुस्ते वाजिन् युङ्क्षुः त्वा रभे स्वस्ति मा सन्निचत्वारिंशच्च॥१९॥ [१९]

जज्ञि बीजं वर्षा पर्जन्यः पक्ता सस्यः सुपिप्पला
 ओषधयः स्वधिचरणेयः सूपसदनोऽग्निः स्वध्यक्षमन्तरिक्षः

सुपावः पवमानः सूपस्थाना द्यौः शिवमसौ तपन्
 यथापूर्वमहोरात्रे पञ्चदशिनोऽर्धमासास्त्रिंशिनो मासाः कृता
 ऋतवः शान्तः संवत्सरः॥४७॥

जज्ञि बीजमेकत्रिंशत्॥२०॥ [२०]

आग्नेयोऽष्टाकपालः सौम्यश्चरुः सावित्रोऽष्टाकपालः
 पौष्णश्चरु रौद्रश्चरुरग्नये वैश्वानराय द्वादशकपालो मृगाखरे
 यदि नागच्छेद्ग्नयेऽहोमुचेऽष्टाकपालः सौर्यम्पयो वायव्यं
 आज्यभागः॥४८॥

आग्नेयश्चतुर्विंशतिः॥२१॥ [२१]

अग्नयेऽहोमुचेऽष्टाकपाल इन्द्रायाऽहोमुच एकादशकपालो
 मित्रावरुणाभ्यामागोमुग्भ्यां पयस्या वायोसावित्र
 आगोमुग्भ्यां चरुरश्विभ्यामागोमुग्भ्यां धाना मरुद्भ्य
 एनोमुग्भ्यः सप्तकपालो विश्वेभ्यो देवेभ्य एनोमुग्भ्यो
 द्वादशकपालोऽनुमत्यै चरुरग्नये वैश्वानराय द्वादशकपालो
 द्यावापृथिवीभ्यामहोमुग्भ्यां द्विकपालः॥४९॥

अग्नयेऽहोमुचै त्रिंशत्॥२२॥ [२२]

अग्नये समनमत्पृथिव्यै समनमद्यथाग्निः पृथिव्या

स॒म॒न॒म॒दे॒व॒म॒म॒ह्य॑म्भ॒द्राः॒ सं॒न॒त॒यः॒ सं॒ न॑मन्तु वा॒य॒वे॒
 स॒म॒न॒म॒द॒न्त॒रि॒क्षाय॑ स॒म॒न॒म॒द्य॒था॑ वा॒यु॒र॒न्त॒रि॒क्षेण॑ सू॒र्या॒य॒
 स॒म॒न॒म॒द्वि॒वे स॒म॒न॒म॒द्य॒था॑ सू॒र्यो॑ दि॒वा च॒न्द्रम॑से॒
 स॒म॒न॒म॒न्त्र॑क्ष॒त्रेभ्यः॑ स॒म॒न॒म॒द्य॒था॑ च॒न्द्रमा॑ नक्ष॒त्रैर्व॑रु॒णाय॑
 स॒म॒न॒म॒द॒द्भ्यः॑ स॒म॒न॒म॒द्य॒था॑ ॥५०॥

वरु॑णोऽद्भिः॒ साम्ने॑ स॒म॒न॒म॒दृ॒चे स॒म॒न॒म॒द्य॒था॑ साम॒र्चा
 ब्रह्म॑णे स॒म॒न॒म॒त्क्ष॒त्राय॑ स॒म॒न॒म॒द्य॒था॑ ब्रह्म॑ क्ष॒त्रेण॑ रा॒ज्ञे
 स॒म॒न॒म॒द्वि॒शे स॒म॒न॒म॒द्य॒था॑ रा॒जा वि॒शा र॒थाय॑ स॒म॒न॒म॒द॒श्वेभ्यः॑
 स॒म॒न॒म॒द्य॒था॑ र॒थोऽश्वैः॑ प्र॒जाप॑तये स॒म॒न॒म॒द्भू॒तेभ्यः॑
 स॒म॒न॒म॒द्य॒था॑ प्र॒जाप॑तिर्भूतैः स॒म॒न॒म॒दे॒व॒म॒म॒ह्य॑म्भ॒द्राः॒ सं॒न॒त॒यः॒
 सं॒ न॑मन्तु ॥५१॥

अ॒द्भ्यः स॒म॒न॒म॒द्य॒था॑ म॒ह्यंश्च॑त्वारि च॥23॥ [२३]

ये ते॒ प॒न्था॑नः स॒वि॒तः पू॒र्व्यासो॑ऽरे॒णवो॑ वि॒त॑ता अ॒न्त॒रि॒क्षे।
 तेभि॑र्नो अ॒द्य प॒थिभिः॑ सु॒गेभी॑ र॒क्षा च॑ नो अ॒धि च॑ दे॒व ब्रू॑हि।
 नमो॑ऽग्नये॑ पृथि॒वि॒क्षिते॑ लो॒क॒स्पृते॑ लो॒क॒म॒स्मै यज॑मा॒नाय॑ दे॒हि
 नमो॑ वा॒यवे॑ऽन्त॒रि॒क्ष॒क्षिते॑ लो॒क॒स्पृते॑ लो॒क॒म॒स्मै यज॑मा॒नाय॑
 दे॒हि नमः॑ सू॒र्या॒य दि॒वि॒क्षिते॑ लो॒क॒स्पृते॑ लो॒क॒म॒स्मै यज॑मा॒नाय॑

देहि॥५२॥

ये ते चतुश्चत्वारिंशत्॥24॥ [२४]

यो वा अश्वस्य मेध्यस्य शिरो वेदं शीर्षण्वान्मेध्यो
भवत्युषा वा अश्वस्य मेध्यस्य शिरः सूर्यश्चक्षुर्वीतः
प्राणश्चन्द्रमाः श्रोत्रन्दिशः पादा अवान्तरदिशाः पर्शवो-
ऽहोरात्रे निमेषोऽर्धमासाः पर्वाणि मासाः संधानान्यृतवो-
ऽङ्गानि संवत्सर आत्मा रश्मयः केशा नक्षत्राणि रूपन्तारका
अस्थानि नभो मांसान्योषधयो लोमानि वनस्पतयो वाला
अग्निर्मुखं वैश्वानरो व्यात्तम्॥५३॥

समुद्र उदरं मन्तरिक्षं प्यायुर्द्यावापृथिवी आण्डौ ग्रावा शेषः
सोमो रेतो यज्ज्जभ्यते तद्वि द्योतते यद्विधूनुते तथ्स्तनयति
यन्मेहति तद्वर्षति वागेवास्य वागहर्वा अश्वस्य जायमानस्य
महिमा पुरस्ताज्जायते रात्रिरेनम्महिमा पश्चादनु जायत एतौ
वै महिमानावश्वमभितः सम्बभूवतुर्हयो देवानवहृदर्वसुरान्
वाजी गन्धर्वानश्वो मनुष्यान्थ्समुद्रो वा अश्वस्य योनिः समुद्रो
बन्धुः॥५४॥

व्यात्तमवहृद्वादश च॥25॥ [२५]

This PDF was downloaded from <http://stotrasamhita.github.io>.

GitHub: <http://stotrasamhita.github.io> | <http://github.com/stotrasamhita>

Credits: <http://stotrasamhita.github.io/about/>